

100 китоб түплами

ҚИШЛОҚ ХҮЖАЛИГИДА ИШЛАТИЛАДИГАН ЎҒИТЛАР ВА УЛАРНИ ҚҰЛЛАШ

91-китоб



**Қишлоқ хұжалигини илмий асосда йүлга қўймас эканмиз,
соҳада ривожланиш бўлмайди.**

Ш. МИРЗИЁЕВ.

Хурматли дәхқонлар, чорвадорлар, тадбиркорлар!

Жаҳон миқёсида аҳолининг озиқ-овқат хавфислизигини таъминлашда аграр соҳанинг ўрни ва аҳамияти кундан-кунга ошиб бормоқда. Жумладан, мамлакатимизда ҳам мавжуд ресурс ва имкониятлардан оқилона фойдаланиб, аҳолини қишлоқ хұжалик маҳсулотлари билан кафолатти таъминлаш, ҳосилдорлик ва манбаатдорликни янада ошириш, соҳага илм-фан ютуқлари ҳамда замонавий ёндашувларни жорий этиш долзарб масаладир.

Мухтарам Президентимиз Шавкат Мирзиёев 2020 йил 29 декабрь куни Олий Мажлисга йўллаган Мурожаатномасида, камбагалликни қисқартириш ва қишлоқ аҳолиси даромадларини кўпайтиришда энг тез натижа берадиган омил бу – қишлоқ хұжалигида ҳосилдорлик ва самарадорликни кескин ошириш эканлигини алоҳида таъкидлаб ўтдилар.

Бу жараёнда ҳар гектар ердан олинадиган даромадни ҳозирги ўртacha 2 минг доллардан камида 5 минг долларгача етказиш устувор вазифа қилиб қўйилди ва қишлоқ хұжалигига энг илғор технологиялар, сувни тежайдиган ва биотехнологияларни, уруғчилик, илм-фан ва инновациялар соҳасидаги ютуқларни кенг жорий этишимиз лозимиги белгилаб берилди.

«Агробанк» АТБ мамлакатимизда қишлоқ хұжалиги соҳасининг барқарор ривожланишига ҳисса қўшиш учун нафақат молиявий, балки ижтимоий лойиҳалар билан ҳам аграр соҳага сармоя киритишга эътибор қаратмоқда.

Жумладан, ривожланган давлатлар қишлоқ хұжалигига эришилган ютуқлар ҳамда тажрибалар асосида соҳанинг етук мутахассислари, олимлари билан ҳамкорликда фермерлар ва аҳоли учун дастлабки босқичда ушбу 100 та китобдан иборат қўлланмалар тўплами тайёрланди.

Тўпламда қишлоқ хұжалиги соҳаси, жумладан, мева-сабзавот ва полиз экинларини асосий ҳамда такрорий экиш муддатида етиштириш, иссиқхоналарда маҳсулот ишлаб чиқариш, ғаллачилик, дон ва дуккакли экинлар, чорвачилик, балиқчилик, асаларичилик каби тармоқларнинг энг илғор тажрибаларига оид кенг қамровли илмий ва амалий маълумотлар берилган.

Ушбу лойиҳани келажакда тажрибали дәхқон ва фермерларимиз, чорвадор ва ветеринарларимиз, аграр соҳа вакиллари ва бошқа китобхонларимиз фикр-мулоҳазалари ҳамда таклифлари асосида янада такомиллаштирамиз.

Умид қиласизки, ушбу қўлланмалар тўплами Сиз – дәхқонлар, чорвадорлар ва тадбиркорларимиз учун фойдали бўлади.

Ҳосилингиз мўл-кўл, даромадингиз баракали бўлсин!

**Рустам МАМАТҚУЛОВ,
“Агробанк” АТБ бошқарув раиси**

УЎК 631.8
КБК 40.40
Ў 99

Лойиҳа ғояси муаллифи ва ташкилотчи: “Агробанк” АТБ

Тузувчи:

М.У. Каримов – Тошкент давлат аграр университети Агрокимё ва тупроқшунослик кафедраси мудири, қ.х.ф.н. доцент.

Г.С. Мирхайдарова – Тошкент давлат аграр университети Агрокимё ва тупроқшунослик кафедраси доценти б.ф.н.

Такризчилар:

Б.И. Ниязалиев – Пахта селекцияси, уруғчилиги ва етиштириш агротехнологиялари илмий-тадқиқот институти Минерал, органик ва ноанъанавий ўғитларни кўллаш технологиясини ишлаб чиқиш ва оммавий таҳлиллар лабораторияси қ.х.ф.д. катта илмий ходим.

С.С. Асатова – Тошкент давлат аграр университети Агрокимё ва тупроқшунослик кафедраси доценти.

Лойиҳа иштирокчилари: У. Ф. Файзуллаев, М. С. Ҳайитбоев.

Муҳаррир: Т.Долиев – “Ўзбекистон қишлоқ ва сув хўжалиги” журнали бош муҳаррири.

Ушбу қўлланма “Агробанк” АТБ муассислигида тайёрланди ҳамда нашр эттирилди. Билдирилган фикр-мулоҳаза, хуоса ва тавсияларга тузувчи муаллифлар масъулдир.

Ижтимоий лойиҳалар билан аграр соҳага сармоя киритиш доирасида “Агробанк” АТБ томонидан 100 та китобдан иборат қўлланмалар тўплами тайёрланди. Тўпламда қишлоқ ҳўжалиги соҳаси, жумладан, мева-сабзавот ва полиз экинлари, ғаллачилик, чорвачилик, балиқчилик, асаларичилик каби тармоқларнинг энг илгор тажрибаларига оид ривожланган давлатлар ва юртимизда эришилган кенг қамровли илмий ва амалий маълумотлар қамраб олинган.

Тўплам мазкур йўналишдаги биринчи нашр бўлиб, келгусида ушбу лойиҳани давом эттириш мақсадида билдирилган фикр-мулоҳазалар ва таклифлар асосида янада бойитиб бориш кўзда тутилган.

Кўлланма соҳа мутахассислари, фермерлар ва кенг жамоатчилик учун мўлжалланган.

Ушбу қўлланма “Агробанк” АТБ тухфасидир

© “Агробанк” АТБ – 2021
© Нашриёт уйи “Тасвир” – 2021
© “Colorpack” МЧЖ – 2021

ISBN 978-9943-7174-7-3

МУНДАРИЖА

Үғитлар. Азотли үғитлар.....	7
Фосфорли үғитлар	15
Калийли үғитлар.....	21
Олтингүргүртли, магнийли ва темирли үғитлар.....	31
Микроүғитлар.....	35
Комплекс үғитлар.....	45
Органик үғитлар.....	50
Үғит құллаш тизими.....	77
Минерал ва органик үғитларни биргаликда құллаш.....	82
Асосий қишлоқ хұжалик әқинларини үғитлаш.....	93
Ғұзани үғитлаш.....	93
Күзги буғдой ва жавдарни үғитлаш.....	98
Баҳори буғдой, арпа ва сулинини үғитлаш.....	101
Маккажүхорини үғитлаш.....	103
Дуккакли-дон әқинларни үғитлаш.....	105
Шолини үғитлаш.....	108
Сабзавот әқинларни үғитлашнинг үзига хос томонлари	111
Карамни үғитлаш	112
Бодрингни үғитлаш.....	114
Помидорни үғитлаш	115
Пиёзни үғитлаш	117
Сабзини үғитлаш	118
Қандлавлагини үғитлаш	119
Картошкани үғитлаш.....	121
Бедани үғитлаш.....	124

Тамакини ўғитлаш	125
Мевали дарахтлар, ток ва тутни ўғитлаш.....	127
Фойдаланилган адабиётлар	134

■ | ҮҒИТЛАР. АЗОТЛИ ҮҒИТЛАР

Таркибида үсімликлар учун зарур бўлган озиқ моддаларни тутган ва инсон томонидан тупроққа солинадиган моддаларга үғитлар дейилади.

Үғитлар ўз навбатида минерал ва органик үғитларга бўлинади.

Минерал үғитлар эса оддий ва комплекс үғитларга бўлинади.

Оддий үғитлар таркибида үсімликлар учун зарур бўлган битта озуқа модда тутади. Буларга азотли, фосфорли, калийли ва микроўғитлар киради.

Азотли үғитлар ҳам ўз навбатида тўрт гурухга бўлинади: нитратли (натрий нитрат, калий нитрат ва кальций нитрат), амидли (карбамид), аммиакли (аммоний сульфат, аммоний хлорид) ва аммиак-нитратли (аммиакли селитра).

Азотнинг үсімликлар озиқланишидаги аҳамияти

Азот үсімликлар учун зарур озиқ элементларидан бириди. У барча оддий ва мураккаб оқсиллар, нуклеин кислоталар (РНК ва ДНК), хлорофилл, фосфатидлар, алкалоидлар, айрим дармондорилар ва ферментлар таркибига киради.

Үсімликлар озиқланишида азот манбай бўлиб аммоний (NH_4) ва нитрат (NO_3) тузлари хизмат қиласи.

Тупроқдан энг кўп азот үсімликлар жадал ривожланиб, тана қўядиган даврда ўзлаштирилади. Айни пайтнинг ўзида оқсилнинг парчаланиши ҳам содир бўлади: ёш, ўсаётган аъзоларда оқсил синтези устунлик қиласа, қари, ўсишдан тўхтаган аъзоларда оқсилнинг парчаланиши кучлироқ намоён бўлади.

Барглар (айниқса ёш барглар) азотга бой бўлиб, поя ва илдизларда унинг миқдори бир мунча камдир.

Азот билан озиқлантириш шароитлари ўсимликларнинг ўсиши ва ривожланишига кучли таъсир қўрсатади. Азот танқис бўлган шароитда ўсимликнинг ўсиши кескин секинлашади. Барглари майдалашиб, оч яшил тус олади, анча эрта сарғаяди. Пояси ингичка тортиб, яхши шохламайди.

Ҳосил органларининг шаклланиши, ривожланиши ва доннинг қўйилиши ёмонлашади.

Азот билан меъёрида озиқлантирилган ўсимликларда оқсил моддалар жадал синтезланади, ўсимликнинг ўсиши ва ҳаёт фаолияти кучаяди, узоқ давом этади, баргларнинг қариши секинлашади, бақувват поя ва тўқ яшил тусдаги барглар шаклланади, ўсиш, шохланиш ҳамда ҳосил органларининг ривожланиши яхшиланади. Натижада, ҳосил ва унинг таркибидаги оқсил миқдори кўпаяди. Лекин ўсиш даврида бир томонлама, фақат азот билан озиқлантиришга ружу қўйиш ҳосилнинг пишиб етилишини орқага суради, ўсиш органлари кучли ривожланиб, ўсимликнинг ғовлаб кетишига сабаб бўлади.

Оқсил миқдорининг ортиши ҳосил сифатини яхшилайди, лекин азотли моддалар миқдорининг кўпайиши ҳамма вақт ҳам маҳсулот қимматини оширавермайди.

Ҳосил сифати, шунингдек, қўлланиладиган азотли ўғит турига ҳам боғлиқ. Чунончи, аммиакли азот билан озиқлантирилган ўсимлик ҳужайрасининг қайтарувчанлик, нитрат шаклидаги азот қўлланилганда эса оксидлаш қобилияти кучаяди.

Тадқиқотлари асосида ўсимликлар ҳаётида аммиак ва нитрат шаклдаги азот teng кучли эканлиги аниқланган.

Тупроқ муҳити мўътадил бўлса, ўсимликлар аммиак шаклдаги азотни нитратларга қараганда яхши ўзлаштиради, нордон муҳитда эса аксинча, нитрат шаклдаги азот яхшироқ ўзлаштирилади. Тупроқда кальций, магний ва калийнинг кўп бўлиши аммиак азотини, фосфорнинг мўллиги эса нитратларнинг ўзлаштирилиши учун қулай шароит яратади. Тупроқда молибден танқислиги нитратларнинг қайтарилишини секинлаштиради ва ўсимликларнинг айни шаклдаги азотни ассимиляциялашини чеклайди.

Азотли ўғитлар: турлари ва хоссалари

Ҳозирги кунда қуйидаги турдаги азотли ўғитлар ишлаб чиқарилмоқда:

1. Аммиакли-нитратли ўғитлар – аммиакли селитра, аммоний сульфат-нитрат.
2. Аммиакли ўғитлар – аммоний сульфат, аммоний хлорид, аммоний карбонат, суюлтирилган аммиак, аммиакли сув ва аммиакатлар.
3. Нитратли ўғитлар – натрийли селитра, кальцийли селитра, калийли селитра.
4. Амидли ўғитлар – мочевина.

Аммиакли-нитратли ўғитлар

Аммиакли-нитратли ўғитларнинг асосий вакили аммиакли селитра – (NH_4NO_3) .

Аммиакли селитра ўз таркибида ўртача 34,6% нитрат ва аммиак шаклдаги азот тутади.

Аммиакли селитра гигроскопик бўлгани боис тезда нам тортиб, муштлашиб қолади. Бу хусусиятни йўқотиш учун унга фосфорит ёки сукралони, гипс, каолинит каби моддалар қўшилади. Бу қўшилмалар унга сарғиш тус беради. Аммиакли селитра асосан гранулаланган (донадорланган) ҳолатда ишлаб чиқарилади.

Аммиакли селитра таркибидаги соф азотнинг миқдори 34,6% дан кам бўлмаслиги, намлиги 0,4% дан, қўшилмалар миқдори 0,1% дан ошиб кетмаслиги, муҳити мўътадил ёки кучсиз нордон бўлиши лозим. Тайёр ўғит нам тортмайдиган целлофан қопларда сақланади.



Аммиакли селитра

Аммиакли селитранинг тупроқ билан ўзаро таъсири

Осон эрувчан аммиакли селитра тупроқ намлиги таъсирида тўла эрийди. У физиологик жиҳатдан нордон ўғит ҳисобланади.

Серкарбонат тупроқлар учун аммиакли селитра энг яхши азотли ўғитлардан бири ҳисобланади.

Аммиакли селитранинг самарадорлигини ошириш йўллари ва қўллаш усувлари.

Одатда минерал ўғитларни тупроққа солишнинг асосий (шудгор остига), экиш олдидан ва қўшимча озиқлантириш усувлари фарқланади.

Аммиакли селитра таркибидаги азотнинг бир қисми ҳаракатчан (NO_3) ва бир қисми кам ҳаракат (NH_4) шаклда

бўлгани боис уни табақалаштирилган ҳолда, ўғитлашнинг барча муддатларида қўллаш мумкин.

Нам иқлимли шароитларда, айниқса, енгил механикавий таркибли тупроқларда уни кузда, асосий ўғитлашда қўллаш яхши натижа бермайди, чунки бунда нитрат шаклдаги азот ювилиб кетади.

Аммиакли селитрани кам миқдорларда (10-15 кг/га) қандлавлаги ва ғалла экинлари қатор ораларига, картошка ва сабзавот экинларининг уяларига қўшимча озиқлантириш сифатида қўллаш яхши самара беради. Пахтачиликда ҳозирги кунда ҳам аммиакли селитранинг олдига тушадиган азотли ўғит йўқ.

Аммиакли азотли ўғитлар

Аммоний сульфат. Аммоний сульфат $(\text{NH}_4)_2\text{SO}_4$ ўз таркибида 20,5-21,0% азот тутади. У кулранг, кўкимтири ёки қизғиши тусда бўлиши мумкин. Аммоний сульфат кучсиз гигроскопик, сочилювчан, таркибида 24% атрофида олтингугурт бор, қайсики, ўсимликларнинг озиқланишида ўзига хос аҳамиятга эга. Аммоний сульфат физиологик нордон ўғит ҳисобланади.

Бу ўғитни ўсимликлар яхши ўзлаштиради. Тупроқдаги ҳаракатчанлиги ва ювилиб кетиш хавфи кам бўлганлиги боис аммоний сульфатни асосий ўғитлаш даврида, яъни кузги шудгор остига солиш мумкин. Баъзи холларда NH_4 нинг кўп миқдорда тупроққа ютилиши салбий оқибатларга олиб келади. Қўшимча озиқлантириш пайтида ёки экиш билан қатор ораларига солингандা, илдиз тизими яхши ривожланмаган ёш ниҳоллар аммоний сульфат таркибидаги азотдан яхши фойдалана олмайди.

Бўз тупроқларда унинг самарадорлиги аммиакли

селитрадан юқори бўлади. Суфориладиган экинларга, айниқса, шолига аммоний сульфат қўллаш яхши самара беради.



Аммоний сульфат

Нитратли азотли ўғитлар

Нитратли азотли ўғитлар жумласига натрийли, кальцийли ва калийли селитра NaNO_3 , $\text{Ca}(\text{NO}_3)_2$ ва KNO_3 лар киради.

Натрийли селитра – NaNO_3 .

Оқ ёки оқиши тусли заррабин туз. Таркибида 15-16% азот тутади, сувда яхши эрийди, гигроскопиклиги юқори бўлгани учун қотиб қолади.

Кальцийли селитра – $\text{Ca}(\text{NO}_3)_2$. Таркибида 13-15% азот тутади.

У ўта гигроскопик бўлгани сабабли одатдаги шароитда гидрат ҳолатига ўтиб қолади. Мазкур хусусиятни ҳисобга олиб, $\text{Ca}(\text{NO}_3)_2$ алоҳида таркибли модда шимдирилган намтортмас қопларда сақланади.

Натрийли ва кальцийли селитралар — физиологик

ишқорий ўғитлар. Ўсимликлар бу ўғитлар таркибидаги №₃ – нитрат моддасини ўзлаштиради. Натрийли селитрани турли тупроқларда барча экинларга қўллаш мумкин. Айrim экинлар (масалан, илдизмевалилар) таркибида натрий бўлган азотли ўғитларга ўта талабчан бўлиб, ҳосилдорлик билан бир қаторда маҳсулот сифатини ҳам яхшилайди. Тадқиқотларнинг кўрсатишича, ўғит таркибидаги натрий қанд моддаларни баргдан илдизга томон қўпроқ оқиб ўтишига имкон беради.

Кальцийли селитра асослар билан кам тўйинган нордон тупроқларга солинганда, нордонлик камайиши билан бирга, тупроқнинг физикавий хоссалари ҳам яхшиланади.

Амидли азотли ўғитлар

Мочевина (карбамид) – CO(NH₂)₂. Синтетик мочевина оқ тусли заррабин модда бўлиб, таркибида 46% азот тутади.

Мочевина сувда яхши эрийди, гигроскопикилиги ҳароратнинг ошишига мос равишда ортиб боради.

Мочевина уруғларни экишдан 20-30 кун олдин тупроққа солинса, экинларга салбий таъсир кўрсатмайди. Мочевина тупроқда тўла эрийди.

Бу жараён гумусга бой тупроқларда 2-3 кун ичида тугалланса, қумли ва ботқоқ тупроқларда нисбатан секин кечади. Мочевина юза кўмилса ёки тупроқнинг бетига тушса, азотнинг аммиак сифатида исроф (учиб кетиши) бўлиши содир бўлади.

Мочевина – энг яхши азотли ўғитлардан бири бўлиб, самарадорлиги бўйича аксарият экинлар учун аммиакли селитрага, шоли учун аммоний сульфатга teng келади. Мочевинани асосий ўғит сифатида ишлатиш ёки барча



Мочевина (карбамид)

экинларга қўшимча озиқлантиришда, сабзавотлар ва мевали дараҳтларга илдиздан ташқари озиқлантиришда қўллаш мумкин. Донли экинлар мочевина билан кеч муддатларда озиқлантирилса, оқсил миқдори сезиларли даражада ошади. Мочевина бошқа азотли ўғитлардан фарқли ўларок, юқори концентрацияси ҳам (5% дан ортиқ) баргларни куидирмайди. Суспензия тайёрлашда энг мақбул ўғит ҳисобланади. Ем-хашакка қўшиб берилган мочевина чорва молларининг жадал ривожланишига ёрдам беради.

АЗОТ



ЕТИШМАСЛИГИ

ОРТИҚЧАСИ

■ | ФОСФОРЛИ ЎҒИТЛАР

Фосфорнинг ўсимликлар озиқланишидаги аҳамияти

Ўсимликлар таркибида фосфор минерал ва органик ҳолатда учрайди. Улар оқсил синтези, ўсиш ва ривожланиш, насл ташиб каби муҳим ҳаётий жараёнларда фаол иштирок этади. Ўсимлик барг ва поялари қуруқ, массасининг 0,1-1,0% ини нуклеин кислоталар ташкил қиласи. Уруғ, муртак, чангчилар ва илдиз қинчаси нуклеин кислоталарга бой.

Ўсимликларда фосфорнинг асосий қисми фитин кўринишда учрайди. Фитин ўсимликларнинг ёш аъзо ва тўқималарида, айниқса, уруғларида кўп бўлади. Дуккакли-дон ва мойли экинлар уруғининг 1-2, ғалла экинлари уруғининг 0,5-1,0% ини фитин ташкил қиласи. Углевод алмашинувидаги фосфор катта роль ўйнаганлиги сабабли фосфорли ўғитлар қандлавлагида шакар, картошка туганакларида крахмал тўпланишига ижобий таъсир этади. Фосфор ўсимликларда азотли моддаларнинг алмашинувидаги муҳим аҳамиятга эга.

Озиқланиш муҳитида фосфор жуда кам бўлганда, ўсимликнинг поя ва барглари ўсишдан тўхтайди, уруғларнинг маҳсулдорлиги пасаяди. Ташқи белгилар сифатида эса барг чеккаларининг буралиши ва бинафша тусга ўтишини кўрсатиш мумкин.

Фосфорнинг сувда осон эрийдиган бирикмалари микдори жуда кам, айрим ҳоллардагина 1 кг тупроқда 1 мг дан ошади. Агар 1 кг тупроқда 1 мг сувда осон эрийдиган фосфор бор деб ҳисобласак, 1 га майдоннинг ҳайдалма қатламида унинг микдори атиги 4,5 кг ни ташкил этади. Донли экинлардан ўртача ҳосил олиш учун камида 20 кг фосфор талаб этилади.

Бундан тупроқдаги сувда эрувчан фосфатларнинг миқдори ҳатто ўртача ҳосил етиштириш учун ҳам етарли эмас, деган хулоса келиб чиқади. Кўриниб турибдики, экинлардан мўл ва сифатли ҳосил етиштириш учун фосфорли ўғитларни қўллаш ҳаётий заруратдир.

Фосфорли ўғитлар: хоссалари ва қўлланилиши



Фосфорли ўғитларни эрувчанилиги ва ўсимликлар томонидан ўзлаштирилишига қараб уч гурухга бўлиш мумкин:

1) Сувда яхши эрийдиган фосфорли ўғитлар – оддий суперфосфат ва қуш

суперфосфат;

2) Сувда камрок, лекин кучсиз кислоталарда яхши эрийдиган ўғитлар – преципитат, томасшлак, фторсизлантирилган фосфат, термофосфатлар;

3) Сувда умуман эримайдиган, кучсиз кислоталарда ҳам кам миқдорда эрийдиган фосфорли ўғитлар – фосфорит уни, сукк талқони.

Сувда яхши эрийдиган фосфорли ўғитлар

Суперфосфат. Таркибида 14-16% фосфор бўлади.

Донадорлаштирилган суперфосфатнинг тупроқ билан таъсиралиши юзаси кам бўлганлиги сабабли бу ўғит узоқ муддат таъсири этади.

Донадор суперфосфатни уруғ, картошка тугунаклари ва кўчкатларнинг илдизи атрофига солиш яхши самара беради.

1 ц донадор суперфосфат 3 ц кукунсимон суперфосфатнинг ўрнини босади.

Қўш суперфосфат. Қўш суперфосфат оддий суперфосфатдан таркибида гипс бўлмаслиги ва шу боис фосфор миқдорининг кўплиги (42-49%) билан фарқланади.

Қўш суперфосфатнинг кимёвий ва физикавий хоссалари, ишлатилиши ва самарадорлиги оддий суперфосфатга яқин. Фақат уни олтингурутга ўта талабчан экинлар (масалан, бутгулдошлар ва дуккаклилар)га мунтазам равишда қўллаб бўлмайди.

Преципитат – оқ ёки оч қулранг тусли кукун. Преципитат таркибидаги фосфор сувда яхши эrimайди, лекин аммоний нитратда эрийди ва уни ўсимликлар яхши ўзлаштиради.

Физикавий хоссалари: яхши; муштлашиб қолмайди, сочиувчан, ҳар қандай ўғит билан аралаштириш мумкин. Таркибидаги фосфор (P_2O_5)нинг миқдори хомашёга боғлиқ равишида 25-27% дан 30-35% гача ўзгариб туради.

Преципитатни барча тупроқларда турли экинларга асосий ўғит сифатида ишлатиш мумкин.

Фосфорит талқони. Бу ўғит фосфоритни кукун ҳолатга келгунча майдалаб олинади. Фосфорит талқонини тайёрлаш учун паст навли фосфоритдан ҳам фойдаланиш мумкин. Фосфорит талқони – энг арzon фосфорли ўғит.

Фосфорит талқонининг олий нави 25, биринчи нави 22, иккинчи нави 19% P_2O_5 тутади.

Фосфорли ўғитларни қўллаш

Асосий ўғитлаш. Фосфорли ўғитларни тупроққа асосий ўғитлаш даврида солишдан мақсад – экинларни бутун вегетация даврида фосфор билан таъминлашдир. Асосий ўғитлашда ўғит шакли, тупроққа солинадиган меъёри, муддати ва

чуқурлигига алоҳида эътибор берилади, бошқа озиқ, моддалар билан биргаликда қўллаш ёки қўлламаслик масалалари ҳал этилади.

Асосий ўғитлашда фосфорли ўғитларнинг қўмилиш чуқурлигига биринчи навбатдаги эътибор қаратилади.

Ўсимликлар ривожланиб боргани сари асосий ўғитлашда солинадиган фосфорнинг ўзлаштирилиш даражасининг камайиб бориши кузатилади. Масалан, маккажўхори ривожланишнинг бошланишида таркибидаги фосфорнинг 45-95% и, сulton чиқариш даврида 11-33 ва пишиш даврида 7-13% ини ўғитхисобидантўплайди. Ривожланишнингилкдavrларида фосфор тўлалигича ўғит таркибидан ўзлаштирилса, пишиш даврида ўзлаштирилган фосфорнинг ўндан бир қисми ўғит ва ўндан тўқиз қисми тупроқ фосфори ҳиссасига тўғри келади. Фосфорли ўғит 10 см дан чуқурроқقا солинса, ўсимликлар томонидан яхши ўзлаштирилади. Ёз ойларида тупроқнинг юза қатлами қуриб қолади ва табиийки, ўсимликлар ундаги фосфордан фойдалана олмайди. Юза қатламларга солинган фосфорли ўғит кейинги йилда амалга ошириладиган шудгор пайтида тупроқнинг пастки қатламлари билан аралашади ва шундан кейингина ундан экинлар унумли фойдаланади.

Асосий ўғитлаш чоғида солинадиган фосфорли ўғит меъёри тупроқ унумдорлиги, режалаштирилган ҳосил, ўтмишдош экин ва унга қўлланилган ўғит микдори билан боғлиқ. Одатда техникавий экинларга юқори (120 кг/га ва ундан ортиқ), маккажўхори, картошка, сабзавот ва хашаки илдизмевалиларга ўрта, дон ва дуккакли-дон экинларга паст (30-45 кг/га) меъёрдаги фосфор тавсия этилади.

Тупроқقا солинган фосфорли ўғитлар таркибидаги фосфорнинг 5-15% и (дехқончилик учун ўта қулай йилларда

20% гача) биринчи йилда экилган экинлар томонидан ўзлаштирилади.

Фосфорли ўғитлардан фойдаланиш коэффициентини яхшилаш йўлларидан бири уни захиравий қўллашдир. Мазкур усулда ҳар гектар майдонга 3-4 т атрофида фосфорли ўғит солинади, бунда ўғитни тупроққа солиш билан боғлиқ бўлган харажатлар кескин камаяди.

Фосфорли ўғитларни экиш билан бирга қўллаш.

Фосфорли ўғитларни экиш билан бирга қўллаш муҳим аҳамиятга эга. Ўғитлашнинг бу усули ниҳолларнинг баравар ривожланишига, об-ҳавонинг нокулай шароитлари, касаллик ва зараркунандалар таъсирига чидамли бўлишига, оқибатда ҳосилдорлик сезиларли даражада ошишига хизмат қиласи.

Фосфорли ўғитларни экиш билан бирга қўллаш экиннинг хусусиятлари билан боғлиқ бўлиб, гектарига 7,5-20 кг ни ташкил қиласи. Барча қишлоқ хўжалик экинлари фосфорни экиш билан бирга қўллашга талабчан, лекин улардан айримлари (масалан, маккажўхори, кунгабоқар, ғўза)нинг уруғи ўғит билан бевосита мулоқотда бўлганда нобуд бўлиши мумкин. Шунинг учун бундай экинлар учун экиш билан бериладиган фосфор ($P_{2}O_5$) микдори гектарига 7,5-10 кг қилиб белгиланади ва уруғдан чуқурроқ ташланади.

Бошоқли дон экинлари, зифир, сабзавотларнинг уруғи фосфорнинг таъсирига бардошли бўлганлиги сабабли уларни бевосита ўғит билан аралаштириб, оддий уруғ экиш мосламаси ёрдамида экиш мумкин. Қандлавлаги уруғи ва картошка тугунакларини экишда фосфор микдорини гектарига 20-25 кг га етказиш экинларнинг дуркун ривожланишига ёрдам беради (бир пайтнинг ўзида азотли, баъзан азотли-калийли ўғитлар ҳам солинади). Уруғни фосфорли ўғитлар билан аралаштириб

экишда ҳар икки компонентнинг қуруқ ҳолатда бўлиши ва муҳитнинг мўътадилга яқин бўлишига эришиш лозим.

Диаметри 1,5 мм дан зиёд фосфорли ўғит доначалари ёш ниҳоллар учун тупроқда фосфорнинг юқори концентрацияли ўчоғини юзага келтиради. Ўғит қўллаш борасида амалга оширилган кўп сонли тадқиқотлар асосида олинадиган иқтисодий самара бўйича 15 кг донадор суперфосфатнинг 45 кг кукунсимон суперфосфатга тенглиги аниқланган.

Фосфорли ўғитлар билан ниҳолларни қўшимча озиқлантириш. Фосфор (P_2O_5) ийллик меъёрининг бир қисмини қўшимча озиқлантириш ёки илдиздан ташқари (баргдан) озиқлантириш мақсадида ажратиш мумкин. Лекин бир қатор тадқиқотларнинг натижалари фосфорни илдиздан ташқари озиқлантиришда қўллаш мақсадга мувофиқ эмаслигини кўрсатган.

ФОСФОР



ЕТИШМАСЛИГИ

ОРТИҚЧАСИ

Экинларнинг фосфор билан қўшимча озиқлантириш имкониятларининг чекланганлиги бир қатор омиллар билан боғлиқ. Шулардан бири, тупроқда бўйлама ва тик ҳаракатланишининг чекланиб қолишидир.

Одатда фосфорнинг йиллик меъёри бирон сабаб билан асосий үғитлаш ёки әкиш билан бирга беріб тугалланмаса, құшимча озиқлантириш сифатида солинади. Құшимча озиқлантиришни чопиқталаб әкінларга 10-12 см, имкони бўлса, 14-16 см чуқурликка солиш керак. Тадқиқотлар асосида ғўза бошқа қишлоқ хұжалик әкінларига қараганда фосфор билан құшимча озиқлантиришга талабчан әкин эканлиги исботланган.

■ | КАЛИЙЛИ ҮҒИТЛАР

Калийнинг үсимликлар ҳаётидаги аҳамияти

Үсимлик, тупроқ ва үғит таркибидаги калийни K_2 га айлантириб ифодалаш қабул қилинган.

Үсимликлардаги калийнинг асосий қисми цитоплазма ва вакуолаларда бўлгани ҳолда, ядрода учрамайди. Ялпи калийнинг 20% га яқини үсимлик ҳужайраларининг цитоплазма коллоидлари томонидан алмашинувчан шаклда, 1% и митохондриялар томонидан алмашинмайдиган шаклда ютилади. 80 % га яқин калий ҳужайра ширасида ион шаклида бўлиб, органик бирикмалар таркибиға кирмайди. Шунинг учун узоқ ва шиддатли ёмғирлар таъсирида барглардаги (айниқса, эски барглардаги) калийнинг анча қисми ювилиб кетади.

Калий үсимлик танасининг барча қисмларида бир текис тақсимланмайди, кўпроқ қисми модда алмашинуви ва ҳужайра бўлиниши жадал кетадиган меристема ва новдаларда тўпланади. Гул чангчиларида ҳам калий миқдори кўп. Масалан, маккажўхори чангчилари кули таркибидаги кальций, магний,

олтингугурт ва фосфорнинг йиғиндиси 25% га етмагани ҳолда, биргина калий микдори 35,5% ни ташкил қилади.

Калий ўсимлик сувини тутиб туриш қобилиятини оширади ва қисқа муддатли қурғоқчиликларни енгиб ўтишига ёрдам беради.

У қанд моддаларининг барглардан ўсимликнинг бошқа қисмларига оқиб ўтишини кучайтиради, углевод алмашинуви ферментлари, жумладан амилаза фаоллигини оширади. Калий танқислигига пуч донлар шаклланади ва донли экинлар ҳосилдорлиги кескин камаяди.

Калий ўсимликларда бир қатор витаминларнинг (масалан, тиамин ва рибофлавин) синтезланиши ва тўпланишига ижобий таъсир кўрсатади.

Калий ҳужайра ширасининг осмотик босимини оширади, шу туфайли ўсимликларнинг совуққа чидамлилиги ошади.

Калий билан етарли даражада озиқлантирилган ўсимликларнинг турли касалликларга (ғалла экинларининг қоракуя ва занг касалликлари, сабзавотлар, картошка ва илдиз мевалиларнинг чириш касаллигига чидамлилиги кучаяди.

Калий – кальций ва магний элементлари қатори қишлоқ ҳўжалик экинлари томонидан аммиак шаклдаги азотнинг ўзлаштирилишига ёрдам беради. Ўсимликларда калий етишмаслигининг асосий белгилари сифатида қуйидагиларни кўрсатиш мумкин: қари (эски) барглар чеккасидан бошлаб эрта сарғая бошлайди, кейинчалик уларнинг чеккалари қўнғир (баъзан зангсимон нуқтали қизил) тус олади ва маълум муддатдан кейин баргларнинг четлари нобуд бўлади ва йиртилганга ўхшаб қолади.

Калий танқислиги айниқса, калийсевар ўсимликларда яққол намоён бўлади. Бир сўз билан айтганда, калий

етишмаганда ўсимликларда модда алмашинувининг барча томонларини қамраб оладиган аксарият биокимёвий жараёнларнинг кечиши секинлашади.

Калий етишмаганда фотосинтез маҳсулотларининг барглардан бошқа органларга оқиб ўтиши секинлашади, маҳсулдорлиги пасаяди.

Калийга нисбатан критик (танглик) давр ривожланишнинг илк давларида (уруғ униб чиққандан кейинги 15 кун ичидаги) кузатилади. Калийнинг энг кўп миқдори одатда ўсимликларда биологик масса жадал тўпланадиган даврда ўзлаштирилади.

Донли ва дуккакли-дон экинларда калийнинг ўзлаштирилиши гуллаш-сут пишиш давларида, зифирда қийғос гуллаганда тугалланса, картошка, қандлавлагида илдизмева, карамда эса карамбош шаклланадиган пайтда кучаяди.

Буғдойда ўзлаштирилиши мумкин бўлган калийнинг 25,4% тўпланиш давригача, 42,1% и найдалаш ва 100% и бошоқлаш давригача ўзлаштирилиши аниқланган.

Ғўза шоналаш давригача (униб чиққандан 31 кун ўтгач) 2,8%, шоналашдан гуллашгача (58-кун) 17,8%, пишиш олдидан (145-кун) 100% калийни ўзлаштиради. Бундан ғўзада калийнинг ўзлаштирилиши анча узоқ давом этиши кўриниб турибди.

Ўсимлик таркибидаги калий миқдори фақат ривожланиш давлари бўйича эмас, балки тупроқ-иқлим шароитлари, агротехникавий тадбирлар ва экин навига боғлиқ равишда ҳам ўзгаради.

Калий фосфатларнинг органик бирикмаларга бирикиши ва фосфат гурухларининг кўчишида ҳам катта аҳамиятга эга.

Калий ўсимлиқдаги механикавий элементлар, найсимон тутамлар ва луб толаларининг ривожланишига, пояларнинг

йўғонлашиши ва ётиб қолишга чидамлилигининг ошишига ёрдам беради ҳамда пахта, зифир ва каноп толаларининг ҳосили ва сифатига ижобий таъсир кўрсатади.

Ўсимлик тана қисмларидағи калий миқдори ўсиш даврига боғлиқ равишда ўзгариб туради. Бошқа элементларда кузатилгани каби калий ҳам қари (эски) барглардан ёш баргларга оқиб ўтади, яъни ундан қайта фойдаланиш (реутилизация) содир бўлади. Бу ҳодиса поянинг пастки қисмларидағи баргларнинг эрта сарфайишида намоён бўлади.

Қишлоқ хўжалик экинлари ўз ҳосили таркибида тутадиган калийнинг миқдори билан бир-биридан кескин фарқ қиласди. Масалан, донли экинларга нисбатан карам, картошка, қандлавлаги асосий ва қўшимча маҳсулотлари таркибида калийни кўпроқ тутади. Калийга айниқса, сабзавот экинларининг ҳосили бойдир.

Донли экинлар калийни азотга тенг миқдорда, фосфордан 2,5-3,0 марта кўпроқ ($N:P_2O_5:K_2O = 2,0-3,0:1:2,5-3,0$) ўзлаштиrsa, картошка, қандлавлаги ва бошқа илдизмевалиларда бу нисбат таҳминан 2,6:1:4 ни ташкил қиласди.

Турли экинлар ўзларининг бир тонна ҳосили ва шунга мос қўшимча маҳсулоти билан тупроқдан турли миқдордаги калийни олиб чиқиб кетади ва бу рақам донли экинларда 25-37, дуккакли-дон экинларида 16-20, картошкада 7-9, қандлавлагида 6,7-7,9, сабзавот экинларида 4,0-5,0 ва беда пичанида 20-24 кг га тенгдир.

Буғдои донида ялпи калийнинг 15% и жамланади, қолган 85% и сомон таркибига киради. Бунинг аксича, картошка туганклари 95% га яқин калий тутгани ҳолда, унинг палаги ҳиссасига атиги 5% калий тўғри келади. Ғалла экинлари ўзларидан кейин (сомон билан) кўп миқдорда калий

қолдиради, картошка ва сабзавот экинлари аксинча, кўп миқдорда калийни олиб чиқиб кетади.

Ўсимлик шох-шаббаларининг тўкилиши, барглардан ёмғир таъсирида ювилиб тушиши ва илдиз тизими орқали маълум миқдорда ажралиши ҳисобига тупроқдан чиқиб кетадиган калий миқдори юқорида келтирилган рақамлардан 20-30% кам бўлади.

Тупроқдаги калий

Тупроқдаги ялпи калийнинг миқдори азот ва фосфорнинг йиғинди миқдоридан анча кўпdir. Ҳайдалма қатламдаги ялпи калийнинг миқдори азот миқдорига нисбатан 5-50 марта, фосфорга нисбатан 8-40 марта кўп.

Тупоқларнинг калий билан таъминлашини таққослаб кўрсак: энг кўп калий бўз ва қора тупроқларда, энг ками эса қизил тупроқларда учрайди.

Калийли ўғитлар ва уларнинг хоссалари

Калий хлорид (KCl). Энг кенг тарқалган калийли ўғит ҳисобланиб, ишлаб чиқариладиган калийли ўғитларнинг 85-90% ини ташкил қиласди. Таркибида 53,7-60,0% гача калий (K_2O) тутади. Давлат андозаси бўйича калий хлориди намлиги 1% дан кўп бўлмаган, кулранг жилвага эга пушти ва оқ кристалларнинг аралашмаси ҳолида ишлаб чиқарилади.

Калийлитуз ($KCl + mKCl \cdot nNaCl$). Кулрангва пушти кристаллар тутган, калий хлориди ва сильвинит аралашмасидан иборат ўғит.

Давлат андозаси бўйича намлиги 2 % дан ошмаслиги, таркибидаги K_2O нинг миқдори 40% дан кам бўлмаслиги керак. Ҳаводан нам тортиб, ташиш ва сақлаш жараёнида муштлашиб қолади.

Таркиби ва хоссаларига кўра сильвинит ва калий хлориди

ўртасида оралиқ ҳолатни эгаллайди: хлор билан натрийнинг микдори калий хлориддагидан кўп, лекин сильвинитдагидан кам.

Калийли тузни натрийга талабчан ва хлорга чидамли экин (қандлавлаги, хашаки ва хўраки илдизмевали)га қўллаш яхши самара беради. Бу ўғит хлорга таъсирчан экинлар учун унчалик яроқли эмас. Лекин кузги шудгор остига солинганда, таркибидаги хлорнинг асосий қисми ювилиб кетади ва экинларга кўрсатадиган салбий таъсири йўқолади.

Калий сульфат (K_2SO_4). Оқ тусли (баъзан сарғиш) майда



кристалл заррачали кукун. Таркибидаги намлик 1,2% дан камроқ, K_2O нинг микдори 46-50% атрофида. Муштлашиб қолиш эҳтимоли кам, қопларда ёки очик ҳолатда ташилади.

Калий сульфатни турли тупроқ типларида барча қишлоқ хўжалик экинларига ишлатиш мумкин, айниқса, хлорга сезгир экинлар (тамаки, тоқ, зифир, картошка, цитрус мевалилар ва

бошқалар)га қўллаш яхши самара беради.

Калимагнезия ($K_2SO_4 \cdot MgSO_4 \cdot 6H_2O$). Кулранг тусдаги майда кукун ёки пушти доначалар ҳолида ишлаб чиқарилади. Таркибида 29% K_2O , 9% MgO тутади, намлиги 5% атрофида. Муштлашмайди, полиэтилен қопларда ёки очик ҳолда ташилади. Калий сульфат каби уни ҳам хлор ионига сезгир ва калий билан бир қаторда магнийни кўп талаб қиласидиган экинлар (картошка, зифир, беда ва бошқалар)га, айниқса, таркибида магний кам бўладиган тупроқларга солиш мақсадга

мувофиқдир.



Сильвинит ($KCl \cdot NaCl$)

Таркибида 14-18% K_2O , 34-38% Na_2O ва 52-55% Cl (ёки 75-80% NaCl) бўлади. Орасида кўк кристаллари бўлган кулранг-қўнғир тусли, 1-4 мм ли майдаланган жинс. Сувда яхши эрийди. Гигроскопикилиги кам, лекин

ҳавонинг намлиги юқори бўлган шароитларда сақланса, нам тортади, қуритилганда муштлашиб қолади.

Сильвинит асосий ўғит сифатида тупроққа кузги шудгор пайтида солинади. Бунда хлорнинг асосий қисми тупроқнинг куйи қатламларига ювилиб кетади, калий эса тупроқнинг сингдириш комплекси томонидан ютилади.

Таркибида кўп миқдорда натрийнинг бўлиши уни қанд лавлаги, озуқабоп ва хашаки илдизмевалиларга ишлатишни тақозо этади.

Калийли ўғитларни қишлоқ хўжалик экинларига қўллаш

Калийли ўғитларни тақсимлашда тупроқларнинг механикавий таркиби, таркибидаги ҳаракатчан калий миқдори, намланиш даражаси, экиннинг биологик хусусиятлари ҳамда режалаштирилган ҳосилга эътибор берилади.

Ўрта ва оғир механикавий таркибли тупроқларда калийли ўғитларнинг йиллик меъёрини тўлалигича кузги шудгор остига солиш лозим. Бунда ўғит тупроқнинг ўсимликлар илдиз тизимининг асосий қисми ривожланадиган, нам билан нисбатан яхши таъминланган қатламларига тушади ва ундан ўсимликлар унумли фойдаланади.

Марказий Осиё тупроқларида, айниқса, пахта етишириладиган майдонларда, калийли ўғитларни қўллашнинг аҳамияти каттадир. Ўзга азотли ва фосфорли ўғитлар фонида калийли ўғитларга кучли эҳтиёж сезади. Айниқса, бедадан бўшаган майдонларда пахта етиширишда кўп миқдорда калийли ўғитлар ишлатишга тўғри келади, чунки беда уч-тўрт йил давомида етиширилганда, тупроқдан кўп миқдордаги калийни олиб чиқиб кетади.

Бўз тупроқларда калийли ўғитларни қўллаш ҳисобига ҳар га майдондан ўртacha 3,8-4,8 ц қўшимча пахта ҳосили олиш мумкин. Лекин олинадиган қўшимча ҳосил миқдори кўп жиҳатдан тупроқларнинг алмашинувчан калий билан таъминланиш даражасига боғлиқ. Алмашинувчан калийнинг миқдори бир кг тупроқда 140-170 мг бўлганда, гектарига 100 кг K2O қўллаш 2,7 ц қўшимча ҳосил берган бўлса, алмашинувчан калийнинг миқдори 70-80 мг бўлган тупроқларда қўшимча ҳосил 6,4 ц ни ташкил қилган.

Калийли ўғитлар азотли ва фосфорли ўғитлар билан биргаликда қўлланилганда юқори самара беради.

Калийли ўғитлар йиллик меъёрининг асосий қисми кузги шудгорлашда солинади. Кузда қўлланилган калийли ўғитлар таркибида хлор ёғин-сочинлар таъсирида ўсимликларнинг илдиз тизими тарқаладиган қисмидан пастга ювилиб кетади ва хлор сўймас экинларнинг ривожланишига салбий таъсир кўрсатмайди.

Фақат кумли ва енгил қумоқли тупроқлардагина калийли ўғитларни баҳорда қўллаш мумкин. Суғориладиган шароитларда калий йиллик меъёрининг бир қисмини нихолларни қўшимча озиқлантириш учун ажратиш яхши самара беради. Республикаизда пахта ва бошқа айрим

техникавий экинларга белгиланган калий меъёрининг 50 % и қўшимча озиқлантириш сифатида ишлатилади.

Кунгабоқар, тамаки, сабзавот экинлари, қандлавлаги, хашаки илдизмевалилар, картошка, кўк масса учун етиштириладиган экинлар ва мевали дараҳтлар калийга ўта талабчан ўсимликлар жумласига киради. Бу экинлар биринчи навбатда калийли ўғитлар билан таъминланиши лозим.

Лекин тамаки, ток, мевали ва цитрус дараҳтлари, кўпчилик сабзавот экинлари, гречиха, картошка, зигир, доривор ва ифор мойли ўсимликлар таркибида хлор тутмаган калийли ўғитларни хуш кўради. Хлор таъсирида улар ҳосилининг сифати кескин пасаяди (тамаки баргининг ёнувчанлиги, зигир толасининг сифати ва картошкадаги крахмал миқдори камаяди).

Донли экинлар, қандлавлаги, хашаки илдизмевалилар, ошлавлаги ва бошқа бир қатор экинлар калийли ўғит турига бефарқ бўлиб, таркибида хлор тутган калийли ўғитлар қўлланилганда ҳам ҳосил миқдори ошади.

Қандлавлаги учун таркибида кўп миқдорда натрий тутган калийли ўғитлар фойдали ҳисобланади ва бу мақсадда сильвинит ва каинит каби табиий калийли тузларни ҳам ишлатиш мумкин.

Хлорга сезгир ўсимликларга (масалан, картошка), калий сульфат, калимаг ёки калийли-магнийли концентратларни қўллаш лозим. Калийли туз ёки каинитни бу ўсимликка қўллаб бўлмайди.

Турли тупроқ-иқлим минтақаларида амалга оширилган тажрибаларнинг кўрсатишича, таркибида хлор тутган калийли ўғитлар картошка тугунагидаги крахмал миқдорини хлорсиз калийли ўғитларга нисбатан 7-15 % га камайтиради.

Калийли ўғитларни азотли ҳамда фосфорли ўғитлар

билин биргаликда қўллашнинг яхши бир томони фосфорли ўғитлар таркибидаги кальций калийнинг (шунингдек, унинг йўлдоши натрийни) айрим пайтлардаги салбий таъсирини мўттадилластиради.

Серкарбонат тупроқларда кальций ва калий ўртасидаги антагонизм (қарама-қаршилик) яққол намоён бўлади, шу сабабдан бу тупроқларда, айниқса зифир ва картошкага нисбатан юқори меъёрдаги калийли ўғитларни ишлатиш мақсадга мувофиқидир.

Кўп йиллик тадқиқотлар асосида бир га майдонга 100 кг K_2O солинганда, донли экинлардан 0,2-0,3 т, картошкадан 2,0-3,3 т, қандлавлагидан 3,5-4,0 т, пахтадан 0,1-0,2 т, зифир толасидан 0,1-0,15 т қўшимча ҳосил олиш мумкинлиги аниқланган.

КАЛИЙ



ЕТИШМАСЛИГИ



ОРТИҚЧАСИ

■ | ОЛТИНГУГУРТЛИ, МАГНИЙЛИ ВА ТЕМИРЛИ ҰҒИТЛАР

Олтингугуртли ұғитлар. Олтингугурт бевосита оқсил, «В» гурух дармондорилар, гликозидлар, саримсоқ ва хантал мойлари таркибига киради. Олтингугуртнинг бир қисми үсимлик таркибіда минерал шаклда учрайди. Аксарият қишлоқ хұжалик әқинлари тупроқдан олтингугуртни фосфорга баравар, баъзи ҳолларда күпроқ миқдорда олиб чиқиб кетади.

Келажақда юқори концентрациялы минерал ұғитларни құллаш кучайиб боради. Шу даврғача олтингугуртнинг асосий қисми тупроққа суперфосфат үғити билан солинган бўлса, унинг қўш суперфосфат билан, республикамиз шароитида аммофос билан алмаштирилиши олтингугурт етишмовчилигига олиб келди. Бу ўз навбатида беда, дуккакли-донлар, бутгулдошлар, картошка каби әқинларни олтингугурт билан озиқлантириш масаласини қўяди.

Үсимликлар олтингугуртни тупроқдан SO_{2-4} ионлари шаклида үзлаштиради. Намлик меъёрида бўлган тупроқларда олтингугурт миқдори 100 мг/кг дан ошмайди. Ҳайдалма қатламдаги олтингугуртнинг асосий қисми (90% гаяяқын) органик шаклдадир. Улар минерализацияга учрагандан кейингина үсимликлар томонидан үзлаштирилади. Турли тупроқлар ўз таркибидаги олтингугурт миқдори билан фақрланади.

Олтингугурт тупроққа ёғин-сочинлар билан ҳам келиб тушади ва унинг миқдори ёқиладын тошкүмир ҳамда кимё ва металлургия корхоналаридан чиқадын газлар таркиби билан боғлиқ. Одатда бу миқдор 10-15 кг/га ни ташкил қиласади.

Олтингугуртли минерал ўғитлар саноат миқёсида ишлаб чиқарилмайди. Асосий олтингугурт тутган ўғитлар ва бирикмалар жумласига қуидагилар киради:

- **аммоний сульфат** – 24 % гача S тутади, сувда яхши эрийди;
- **гипс** – 19 % гача S тутади, сувда қийин эрийди;
- **оддий суперфосфат** – 14-22 % S тутади, сувда ўртacha эрийди;
- **калий сульфат** – 17% S тутади, сувда яхши эрийди;
- **калимаг ва калимагнезия** – 14 % S тутади, сувда яхши эрийди;
- **магний сульфат** – 22 % S тутади, сувда яхши эрийди;
- **соф олтингугурт** – 100 % S тутади, сувда эримайди.

Олтингугуртли ўғитларни биринчи навбатда донли экинлар, шунингдек, оқсил ва хантал мойи берадиган экинларга, кузги шудгор остига солиш мақсадга мувофиқдир.

Магнийли ўғитлар. Магний хлорофилл таркибига киргани учун ўсимликлар ҳаётида мухим ўрин тутади. У углеводлар алмашинувида иштирок этади. Кальций билан бир қаторда протоплазманинг физикавий-кимёвий ҳолатини белгилайди. Ўсимликлар генератив қисмларининг шаклланишида магнийнинг аҳамияти катта. Ўсимлик қисмлари бўйлаб ҳаракатланиб, фосфор билан биргалиқда меваларда, асосан уруғ муртагида тўпланади.

Тупроққа солинадиган азотли, фосфорли ва калийли ўғитлар меъёрининг оширилиши ўсимликларнинг магнийга бўлган талабини ҳам кучайтиради. Озиқланиш мухитида магний танқис бўлганда, у барглардан ўсимликнинг ҳосил қисмлари томон интилади, натижада баргларда магнийга нисбатан очиқиши белгилари (оқ доғлар пайдо бўлади ва улар эрта тўкилади) кузатилади. Тупроқда магний миқдори % нинг ўндан бир улушидан 1-1,5 % гача етиши мумкин. Тупроқнинг

20 см ли қатламида калий ва кальцийнинг ялпи захираси мос равишда 60-80 ва 20-30 т/га ни ташкил этса, магний захираси 12-15 т/га дан ошмайди. Магний захираси тўлалигича барқарор кимёвий бирикмалар шаклида учрайди. Нордон тупроқлар шароитида ўсимликларда магнийли минерал ўғитларни қўллашга талаб кучаяди.

Темирли ўғитлар. Темир ўсимликларда кам миқдорда учраса-да, унинг танқислиги ёш баргларда хлороз касаллиги (хлорофилл етишмовчилиги)ни юзага келтиради. Ўсимлик таркибидаги темир миқдори фоизнинг юздан бир улуши атрофида. Мазкур элемент ўсимлик танасида жадал ҳаракатланиши билан ажралиб туради. Темир танқислиги кўпроқ серкарбонат тупроқларда, мевали дараҳтларда яққол кўринади.

Темир тутган минерал ўғит сифатида таркибида 47-53 фоиз темир сульфат тутган темир купорос кенг ишлатилади. Ўғитлар таркибидаги темир тупроққа тушгач, тезда ўсимликлар томонидан ўзлаштирилмайдиган шаклга ўтади, шу боис уни ишлатиш олдидан гўнг ёки торф билан аралаштириш яхши натижা беради.

ТЕМИР



ЕТИШМАСЛИГИ

ОРТИҚЧАСИ

Кейинги даврларда темирнинг комплекс бирикмалари – хелатлардан фойдаланиш йўлга кўйилди. Улар осон эрийдиган ва тупроқда кучсиз муқимланади. Бундай комплекс бирикмалар асосини аминополисирка кислоталар ташкил этади. Шу асосда олинадиган эритмалар ҳидсиз, зичлиги $1,4 \text{ г/см}^3$ дан кичик бўлиб, 7-10% темир тутади. Кўпроқ илдиздан ташқари озиқлантиришда ишлатилади.

Кальцийнинг ўсимликлар ҳаётидаги аҳамияти. Кальций ўсимликларда углеводлар ва оқсил моддалар алмашинуви, илдиз тизимининг меъёрида ривожланиши ва ҳужайра шираси коллоидларига ўзига хос таъсир қўрсатади. Қишлоқ ҳўжалик экинларининг кальцийга эҳтиёжи ривожланишнинг ilk даврларидан бошлаб намоён бўлади. Кальций танқислигига захира озиқа моддалар (крахмал, оқсил)нинг сафарбар ҳолатга ўтиши ва ниҳоллар осон ўзлаштирадиган бирикмаларга айланиши кескин секинлашади, қайсики ўсимликларнинг нобуд бўлишига сабаб бўлиши мумкин. Бошқа элементларда кузатганимиздек, кальций ҳам турли ўсимликлар таркибида турли миқдорда учрайди. Дуккакли экинлар кальцийга жуда талабчан бўлиб, улар таркибида кальций миқдори ғалла экинларига нисбатан 4-5 марта кўпdir. Масалан, беда ва себарганинг ўсуви қисмлари 3,5-4,0% кальций тутгани ҳолда, ғалла экинлари сомонида 0,3-0,4%, илдизида эса атиги 0,035-0,04% кальций мавжуд.

Тупроқ эритмаси таркибидаги кальций гидрокарбонатлари, нитратлари, ва хлоридлари ўсимликлар томонидан ўзлаштирилади. Тупроқдаги кальций миқдори тупроқ сингдириш комплексининг ҳолати ва муҳитига кучли таъсир қўрсатади. Ёғин-сочин ва суғориш таъсирида тупроқдан сезиларли миқдорда кальций ювилиши мумкин.

■ | МИКРОЎҒИТЛАР

Таркибида микроэлементлар тутадиган ва ўсимликларнинг меъёрида ўсиб-ривожланиши учун кам миқдорда ишлатиладиган моддаларга микроўғитлар дейилади.

Тадқиқотларнинг кўрсатишича, ўсимликлар таркибида микроэлементлар миқдори 0,00001-0,01% ни ташкил қиласди. Масалан, қандлавлаги ҳосилдорлиги гектарига 300 ц ни ташкил қиласганда, маҳсулот таркибидаги микроэлементлар миқдори қуидагича бўлади: бўр (B) - 160 г; марганец (Mn) - 500 г; мис (Cu) - 50 г; рух (Zn) -190 г; кобальт (Co) - 2 г.

Бўр

Ҳозирги кунда бўр ўсимликлар учун энг зарур элементлардан эканлиги тўла эътироф этилган. Бўр танқислигида гуллар сони кескин камаяди, шона ва тугунчалар тўкилади, поя ва илдизнинг ўсиш нуқталари шикастланади. Бу ҳол айниқса, илдизмевалиларда яққол намоён бўлади. Бўр гуллардаги чанг найчаларининг ўсиши ва ҳаёт фаолиятини кучайтиради, уруғ ва меваларнинг пишиб етилишини жадаллаштиради.

У ўсимликларнинг сув режимига таъсир қилиб, хужайрадаги сув миқдорини кўпайтиради, оқсил ва углевод алмашиниш жараёнини тезлаштиради. Бўр қанд моддаларнинг ўсиш нуқталари, гул, мева ва илдизга боришини тартибга солади. Ўсимликларнинг қурғоқчиликка бардошини ошириш бўрнинг яна бир муҳим хусусиятидир.

Бўр етишмаса, фотосинтез жараёни секинлашади, шунингдек, ўсимликларнинг илдиз тизими яхши

ривожланмайди. Бу микроэлемент ўсимликларда калий ва азотнинг жадал ўзлаштирилишига ёрдам бергани ҳолда, фосфорнинг ютилишига қаршилик қиласди.

Ўсимликлар таркибидаги бўр микдори ўртача 0,0001% га ёки 1 кг қуруқ моддада 0,1 мг га тенгdir.

Бўр танқислигига ўсимликларда қуруқ ва жигарранг чириш, сарғайиш, илдизмеваларнинг ўзакланиши ва бактериоз каби иллатлар кузатилади. Кунгабоқар, помидор, гулкарам, беда, хашаки илдизмевалар, ғўза, зиғир, шоли, сабзавотлар ва қандлавлаги бўрга талабчан ўсимликлар жумласига киради.

Тупроқ таркибida бўр микдори 30 мг/кг дан ошиб кетса, ўсимликларда заҳарланиш аломатлари пайдо бўлади: поянинг пастки қисмидаги барглар сарғаяди, «куяди», тўкилади. Бўрнинг сероблиги чорва моллари саломатлигига ҳам салбий таъсир кўрсатади.

Турли тупроқларда бўр танқислигининг қуий чегараси турлича бўлиб, бу кўрсаткич бўз тупроқларда 0,45-2,0 мг/кг дан паст бўлганда бўрли ўғитлар қўллаш лозим. Бўр тақчил тупроқларда бўрли ўғитларни қўллаш натижасида пахтадан гектарига 2-3 ц гача қўшимча ҳосил олиш мумкин. Қандлавлаги ҳосилдорлиги 45 ц/га га ошиб, таркибидаги қанд моддаси 0,3-2,1 % га кўпаяди.

Бўрли микроўғитлар жумласига бўрат кислота – 17,3%, бўр-магнийли ўғит – 2,27 ва бўрли суперфосфат – 0,2% бўр элементи мавжуд. Бўрли ўғитлар, асосан қандлавлаги, озуқабоп илдизмевалилар, бошоқли дон экинлар, гречиха каби экинларга тупроқни асосий ишлаш пайтида, гектарига 2-3 ц, экиш олдидан қатор ораларига 1-1,5 ц микдорида солинади.

Таркибида 2,2% бўр тутган бўр-магнийли ўғит ҳам асосан юқорида айтиб ўтилган экинлар ва зифир учун гектарига 20 кг миқдорда ишлатилади.

Бўрат кислота таркибида 17,3% бўр мавжуд ва ундан асосан ўсимликларни илдиздан ташқари озиқлантиришда фойдаланилади (0,5-0,6 кг/га). 1 ц уруғни 100 г бўрат кислота билан аралаштириб экиш ҳам яхши натижа беради.

Мис

Миснинг ўсимликлар ҳаётида зарурий элемент эканлиги ва унинг ўрнини бошқа биронта элемент боса олмаслиги исботланган.

Мис етишмаган ўсимликларда очиқишнинг қўйидаги белгилари намоён бўлади:

- баргларнинг учи оқаради ва қурийди;
- донли экинлар бошоқ тортади, лекин пишмасдан яшиллигича қолади;
- ўсимликлар ўсишдан тўхтайди, хлороз ва сўлиш касалликларининг белгилари кузатилади.

Тупроқда мис танқислигига жавдар, арпа, кузги ва баҳори буғдой анча чидамли ҳисобланса, сули умуман чидамсизdir. Зифир, қандлавлаги, хантал, вика, люпин, тамаки, пахта ва сабзавот экинлари ҳам мис тақчил тупроқларда касалликларга осон чалинади.

Ўсимликлар таркиbidаги миснинг ўртача миқдори 0,0002 % ёки 1 кг қуруқ модда таркибида 2 мг га teng бўлиб, асосий қисми уруғ таркибида тўпланади.

Турли тупроқ типларида миснинг ялпи миқдори турлича бўлиб, 0,1-150 мг/кг ни ташкил этиши мумкин. Мазкур элемент миқдори 1,5-4,0 мг/кг дан кам бўлган ҳолларда ўсимликларнинг мисга бўлган эҳтиёжи кучаяди.

Азотли ўғитлар меъёрининг ортиб боришига мос равишда ўсимликларнинг мисга бўлган талабчанлиги ҳам кучаяди.

Қишлоқ хўжалигидага кенг қўлланиладиган мисли микроўғитлар жумласига мис қупороси – 23,4-24,0%, мисли кукун – 5-6% ва мис колчедани – 25% мис элементи бор.

50-100 г мис қупорос билан 1 ц уруғ аралаштириб экилса яхши самара беради. Илдиздан ташқари озиқлантиришда 200-300 г мис қупорос 1 га майдондаги ниҳолларга пуркалади. Мис қупорос ўз таркибида 25,0% га яқин мис тутади.

Хозирги кунда Олмалиқдаги «Аммофос» ишлаб чиқариш бирлашмасида таркибида мис тутган (0,25-0,30%) аммофос ишлаб чиқариш йўлга қўйилган.

Мис колчедани маҳаллий аҳамиятга эга ўғитлардан ҳисобланади (0,2-0,3% Cu) ва уни ҳар 4-5 йилда бир марта 500-600 кг/га меъёрда кузги шудгор остига солиш мумкин.

МИС



ЕТИШМАСЛИГИ



ОРТИҚЧАСИ

■ | МАРГАНЕЦ

Марганец микроэлементига барча қишлоқ хўжалик экинлари талабчан бўлиб, уни айниқса, донли экинлар, дуккакли-донлар, қандлавлаги, илдизмевалилар, картошка ва мевали дарахтлар кўп талаб қиласди. Баргларнинг оқариши ва сарғиш доғларнинг пайдо бўлиши, дуккакли экинлар баргининг ёппасига хлорозга чалиниши, бодринг барг пластинкасининг буралиб қолиши марганец танқислигининг асосий белгиларидан ҳисобланади.

Марганец фотосинтез жараёнида муҳим ўрин тутади, қанд моддалар ва хлорофилл микдорини кўпайтиради, аскорбин кислота синтезида иштирок этувчи ферментлар таркибиغا киради.

Тупроқда марганец кам бўлган ҳолларда (ёки умуман бўлмаганда) озиқланиш балансидаги элементларнинг нисбати бузилади чунки у кальций сингари ташқи муҳитдан ионларнинг танлаб сингдирилишида ўзини антагонист сифатида намоён қиласди. Марганец реутилизация (қайта фойдаланиш) жараёнини тартибга солиб турувчи элемент сифатида ҳам муҳим ўрин тутади. У ўсимлик хужайраларининг сув тутиш қобилиятини оширади ва ҳосил элементларининг кўпроқ сақланишига ёрдам беради.

Тупроқда марганец микдори 1% гача етади, лекин унинг асосий қисми ўсимликлар томонидан қийин ўзлаштириладиган шаклдадир.

Марганецли ўғитларни қўллаш ҳисобига қандлавлагидан 23,7, буғдойдан 2,2, маккажӯхоридан 11,8 ва арпадан 3,0 ц/га қўшимча ҳосил олинади.

Таркибида 70% Mn тутган марганец сульфат қимматбаҳо

микроўғит ҳисобланади ва ундан сабзавот экинларни ўғитлашда фойдаланилади.

Марганец фосфорли ўғитлар билан биргалиқда қўлланилганда яхши самара беради, шу боис марганецили суперфосфат ишлаб чиқариш йўлга қўйилган. Шунингдек, Mn комплекс ўғитлар таркибига ҳам киритилиши мумкин.

Тупроққа одатда марганец 2,5 кг/га ҳисобида солинади. Марганецили ўғитларни уруғ билан аралаштириш ўғит қўллашнинг энг қулай усулларидан бири ҳисобланади. Бунинг учун 50-100 г чамаси марганец сульфат олинади ва 1 ц уруғ билан алаштирилади. Илдиздан ташқари озиқлантиришда 200 г марганец сульфат 100 л сувда эритилиб, 1 га майдондаги ниҳолларга пуркалади.

МАРГАНЕЦ



ЕТИШМАСЛИГИ

ОРТИҚЧАСИ

Молибден

Молибден кўпроқ дуккакли экинлар таркибидаги (0,5-20,0 мг/кг) учрайди. Бошоқли дон экинлари 0,2-1,0 мг/кг атрофида молибден тутади.

Молибден ўсимликларга бошқа микроэлементларга нисбатан камроқ ютилади. Ўсимлик баргларида молибден бошқа аъзоларга нисбатан кўпроқ тўпланади. Аксарият ўсимликларда молибден миқдорининг қуий чегараси 1 кг қуруқ моддада 0,1 мг ҳисобланади. Дуккакли экинларда бу кўрсаткич 0,4 мг/кг ни ташкил қиласди.

Молибден ўсимликлардаги нитратредуктаза ферменти таркибида киради. Умуман олганда, молибденни ўсимликлардаги «азот алмашиниш жараёни микроэлементи» деб аташ мумкин. Тупроқларда молибденнинг ялпи миқдори 0,2-2,4 мг/кг ни ташкил этса-да, ҳаракатчан шакли 0,1-0,27 мг/кг дан ошмайди. Гумусга бой тупроқлар ўз таркибида молибден ялпи миқдорининг қўплиги билан ажралиб туради.

Молибден билан яхши таъминланган тупроқлардан ўсимликлар азот, фосфор ва калийни яхши ўзлаштиради. Азот оқсил таркибида тўлиқ ўтади, натижада сабзавот ва полиз экинларида азотнинг нитрат шаклда тўпланишининг олди олинади. Шунинг учун молибденни дуккакли экинларга фосфор ва калий билан бошқа экинларга эса, азот билан бирга қўллаш тавсия этилади.

Молибденга талабчан ўсимликлар жумласига беда, себарга, сўя, хашаки дуккаклилар, вика, гулкарам, илдизмевалилар, рапс, бошкарам ва сабзавотлар киради. Ўсимликларнинг 1 кг қуруқ моддаси таркибидаги молибден миқдори 1 мг дан ортиқ бўлса, инсон ва ҳайвонлар ҳаёти учун хавфли ҳисобланади.

Молибденли микроўғитларнинг тури кўп бўлса-да, саноатда кўпроқ таркибида 52-53% молибден тутган аммоний молибдат ишлаб чиқарилади.

Үфит ишлаб чиқариш саноатида молибденли оддий ва құш суперфосфатлар тайёрлаш ҳам йўлга қўйилган.

Молибденли микроўфитлар бир нечта усулда қўлла-нилиши мумкин. Уруғларни экиш олдидан молибденли микроўфит билан ишлаш учун 1 ц иирик уруғлар учун 25-50 г, беда ёки себарга уруғлари учун 500-800 г аммоний молибдат сарфлаш лозим.

Уруғларни экиш олдидан молибденли микроўфитлар билан ишлаш үфит қўллашнинг самарали усули ҳисобланади. Бунинг учун 1 ц иирик уруғларга 25-50 г, беда ёки себарганинг майда уруғларига 500-800 г аммоний молибдат олинади, 2-3 л сувда эритилиб, аралаштирилади.

Илдиздан ташқари озиқлантиришда 1 га майдондаги ниҳолларга 200-600 г аммоний молибдат ишлатилади. 50 кг молибденли суперфосфат билан тупроққа 50-100 г молибден келиб тушади.

МОЛИБДЕН



ЕТИШМАСЛИГИ



ОРИКЧАСИ

Рух

Рух экинларнинг иссиқ ва совуққа чидамлилигини оширади, фосфорнинг кўпроқ ўзлаштирилишига ёрдам беради. Рух етишмаганда, ўсимлик хужайраларининг бўлиниши секинлашади, барглар оч яшил (баъзан оқ) тусга киради, шакли ўзгаради, поядаги бўғим оралари қисқаради, мевалар буришиб қолади.

Марказий Осиёнинг мўътадил ва кучсиз ишқорий тупроқларида рух танқислиги кузатилади. Минтақамиз тупроқларида рух миқдори 1,4-1,8 мг/кг дан кам бўлганда, рухли ўғитлар қўллашга ёхтиёж сезилади.

Рухли ўғитлар сифатида рух сульфат – 21,8-22,8% ва полимикроўғит (ПМЎ-7)-2-5% руҳдан кенг фойдаланилади.

РУХ

ЕТИШМАСЛИГИ



ОРТИҚЧАСИ

ПМЎ-7 ўз таркибида 2-5% рух тутади. Уни уруғларни экиш олдидан ёки экиш билан бирга қатор ораларига 20 кг/га меъёрида қўллаш тавсия этилади. Илдиздан ташқари озиқлантириш мақсадида кўпроқ рух сульфат ишлатилади (150-200 г/га). Рухли микроўғитларни бевосита уруғ билан аралаштириб қўллаш ҳам мумкин. Бунинг учун 4 г рух сульфат 4 л сувда эритилади ва 1 ц уруғ билан аралаштирилади.

Рухли микроўфитларни қўллаш ҳисобига пахта, қандлавлаги, маккажўхори ва мевали дараҳтлар ҳосилдорлиги сезиларли даражада ошади.

Кобалът

Ўсимликларнинг 1 кг қуруқ массаси таркибида ўртача 0,021 мг кобалът мавжуд. Айрим ўсимликларда бу кўрсаткич 11,6 мг/кг ни ташкил этади. Кобалът кўпроқ дуккакли экинларнинг туганакларида учрайди. Шунингдек, ўсимликларнинг генератив органлари (масалан гул) ҳам маълум миқдор кобалът тутади.

Ўсимликлар кобалътни молибденга нисбатан 300 марта кам талаб қиласди. Кобалът бактерия ва ферментларнинг фаолиятига ижобий таъсир кўрсатади. Кобалът таъсирида қандлавлаги ҳосилдорлиги гектарига 30-35 ц шакар миқдори 0,8% ошиши кузатилган.

Бўз тупроқлар таркибида кобалът миқдори 1,0 мг/кг дан кам бўлса, кобалътли микроўфитлар ишлатилиши лозим. Лекин чорва моллари учун сифатли озука етишириш мақсадида тупроқ таркибидаги кобалът миқдори 2,0-2,5 мг/кг бўлганда ҳам мазкур микроэлементни ишлатиш мумкин. Ем-хашак таркибида кобалът миқдори 0,07 мг/кг дан кам бўлса, чорва молларида акобалътоз хасталиги юзага келади.

Кобалътли ўғитлар сифатида кобалът сульфат, кобалът нитрат ва кобалът хлорид тузларидан фойдаланилади. Тупроққа кобалът 200-400 г/га миқдорда солинса, илдииздан ташқари озиқлантириш ва уруғ билан аралаштириш учун кобалът сульфатнинг 0,01-0,1% ли эритмалари ишлатилади.

■ I КОМПЛЕКС ЎҒИТЛАР

Таркибида икки ёки ундан ортиқ озиқ элементини турли миқдор ва нисбатларда тутадиган ўғитлар комплекс ўғитлар деб юритилади.

Таркибига кўра икки компонентли (фосфорли-калийли, азотли-фосфорли, азотли-калийли) ва уч компонентли (азотли-фосфорли-калийли), олиниш усулига кўра, мураккаб, мураккаб-аралаш (комбинацияланган) ва аралаштирилган, агрегат ҳолатига кўра эса қаттиқ ва суюқ комплекс ўғитлар фарқланади.

Бир пайтнинг ўзида таркибида юқори концентрацияли икки ёки учта озиқ элементни тутиши комплекс ўғитларга хос ижобий хусусиятдир. Масалан, аммофос, диаммофос, аммонийлаштирилган суперфосфат, нитрофос иккита озиқ элементи тутса, нитрофоска, карбоаммофоскалар таркибида учта озиқ элементи мавжуд. Айрим мураккаб ўғитлар таркибига микроэлементлар ҳам киритилади.

Комплекс ўғитларни қўллаш асосида ўғитларни тупроққа солиш билан боғлиқ сарф-харажатларни оддий минерал ўғитларни алоҳида-алоҳида қўллашга нисбатан 1,5-2,0 марта камайтириш мумкин.

Айни чоғда комплекс ўғитлар таркибидаги фосфор ўсимликлар томонидан оддий фосфорли ўғитлардагидан кўпроқ ўзлаштирилади.

Комплекс ўғитлар фақат ўсимликларни озиқ элементлар билан таъминлашни яхшилаб қолмай, ўғитларни юклаш, ташиш ва тушириш билан боғлиқ харажатларни камайтиради.

Асосий комплекс ўғитлар таркибидағи озиқ моддалар миқдори ва нисбатлари

Ўғит номи	Озиқ моддалар нисбати, $N:P_2O_5:K_2O$	Озиқ моддаларнинг ялпи миқдори, %
Аммофос	1:4:0	56-63
Диаммофос	1:2,5:0	66-68
Нитроаммофос	1:1:0	48
Нитроаммофоска	1:1:1	48-51
Нитрофоска	1:1:1	33-35

Табиийки, 1 кг мураккаб ўғитнинг таннархи шунча миқдор оддий ўғитни ишлаб чиқаришдан қимматга тушади, лекин таркибида балласт моддаларнинг камлиги (ёки йўқлиги), озиқ элементлар концентрациясининг юқорилиги сарф-харажатларни қоплабгина қолмай, салмоқли иқтисодий самара олиш имконини ҳам беради.



Мураккаб ўғитлар.

Таркибида икки ёки учта озиқ элементи тутган мураккаб ўғитлар фарқланади.

Аммофос – $NH_4H_2PO_4$. Бу ўғит, таркибида 11-12 % азот ва 46-60 % фосфор мавжуд.

Диаммофос

Энг юқори концентрацияли мураккаб ўғитлардан бири бўлиб, таркибида 18 % дан ортиқ азот ва 50 % атрофида фосфор тутади ($N : P_2O_5 = 1 : 2,5$).

Аммофос ва диаммофос таркибидағи $N:P_2O_5$ нисбатнинг 1:2,5-4 га teng бўлиши уларни ниҳолларни қўшимча

озиқлантириш пайтида құллаш имконини чеклайды, лекин уруғларни экиш, күчтің үтқазишида ва кузги шудгор остига солиши, яхши самара беради.

Калийли селитра – KNO_3 . Үғит 13 % азот ва 45 % гача K_2O тутади.

1 ц калийли селитра 1 ц калий хлорид ва 0,4 ц аммиакли селитра үрнини босади. Таркибида балласт моддалари йўқ, физикавий хоссалари яхши. Хлорсуймас экинлар учун энг яхши үғит. Лекин $\text{N}:\text{K}_2\text{O}$ нисбат 1:4 бўлгани боис қўшимча равишда азотли үғитлар ишлатишга тўғри келади.



Мураккаб – аралаш (комбинацияланган) үғитлар

Бу үғит – нитрофоскадир. Нитрофосфатларни г доналари 1-4 мм катталикда бўлади ва уларнинг қуидаги турлари ишлаб чиқарилади.

Нитроаммофос – моноаммоний фосфат асосида олинадиган мураккаб аралаш үғит. Таркибига калий киритилса, нитроаммофоска дейилади.

Айтилганлардан ташқари карбоаммофоска (20% азот, 20% фосфор, 20% калий), мочевина фосфат (27% азот, 27% P_2O_5) ва фосфамидлари деб номланадиган үғитлар ишлаб чиқарилади.

Нитрофосфатларнинг тавсифи

Нитрофосфатлар	Озиқ элементлари миқдори		
	N	P ₂ O ₅	K ₂ O
А русумли нитрофос	23,5	17	-
Б русумли нитрофос	24	14	-
А русумли нитрофоска	16-17	16-17	13-14
Б русумли нитрофоска	12,5-13,5	8,5-9,5	12,5-13,5
В русумли нитрофоска	11-12	10-11	11-12



Аралаштирилган ўғитлар

Аралаштирилган ўғитлар компонентларни кимёвий ўзгаришга учратмасдан олинади. Улар кукунсимон ёки донадор ҳолатда бўлиши мумкин.

Аралаштирилган ўғитлар икки ёки уч хил оддий кукунсимон ёки донадор ўғитларни маҳсус ўғит аралаштириш заводларида, агрокимё марказларининг йирик механизациялаштирилган омборларида ёки бевосита хўжаликларда аралаштириш йўли билан олинади.

Бунда ўғитларни қўллашга кетадиган вақт ҳамда меҳнат ўғитларни алоҳида-алоҳида солишдагига қараганда анча тежалади, уларнинг самарадорлиги ортади, чунки барча зарурый элементлар бирданига солинади, улар пайкалга бир меъёрда тақсимланади.

Мочевинани тупроқقا солиш олдидан фосфорли ва калийли ўғитларнинг барча шакллари билан аралаштириш мумкин. Уни суперфосфат билан анча олдиндан аралаштирганда ҳам салбий ўзгаришлар кузатилмайди. Донадор ўғитлар, айниқса, доначаларининг ўлчамлари бир хил бўлган ўғитлар аралаштирилганда аралашманинг физикавий хоссалари ва сочиувчанлиги яхшиланади.

Ўғитларни аралаштиришда экинларнинг озиқ моддаларнинг муайян нисбатига ($N:P_2O_5:K_2O$) бўлган эҳтиёжини шунингдек, тупроқ хоссалари, ўғитлаш усуллари ва муддатларини ҳисобга олиш зарур.

Таркибида озиқ моддалари қўп ва физикавий хоссалари яхши бўлган ўғит аралашмаларини тайёрлаш учун биринчи навбатда мочевина ёки аммиакли селитра, қўш суперфосфат ёки аммофос, йирик кристалли калий хлоридини ишлатиш лозим. Ўғит аралашмаларини механизмлар ёрдамида тайёрлаш ва қўллаш бир томонлама таъсир этадиган ўғитларни алоҳида-алоҳида солишга қараганда қўпроқ иқтисодий самара беради.

Ҳозирги даврда концентрланган оддий ва комплекс ўғитларни ишлаб чиқаришга алоҳида эътибор берилмоқда.

Комплекс ўғитларнинг қишлоқ хўжалигида тутган аҳамияти эътироф этилган. Аксарият хорижий давлатларда уларнинг салмоғи ишлаб чиқарилаётган ўғитларнинг 60-70% ини ташкил қиласди.

Комплекс ўғитларнинг сифати ва самарадорлигини ошириш учун экинлар эҳтиёжини ҳисобга олган ҳолда магний ва айрим микроэлементлар қўшилиши мумкин.

■ | ОРГАНИК ЎЃИТЛАР

Органик ўѓитлар жумласига гўнг, суюқ гўнг, торф, нажас, парранда ахлати, компостлар, сапропель, хўжалик ва майший чиқиндилар, сидератларни солиш мумкин. Органик ўѓитлар ичидаги энг кенг тарқалгани гўнг ҳисобланади.

Органик ўѓитлар тупроқнинг агрокимёвий хоссаларига кучли таъсир кўрсатади ва тўғри қўлланилганда экинлар ҳосили кескин ошади. Органик ўѓитлар билан бирга тупроққа ўсимликларнинг меъёрида ўсиб-ривожланиши учун зарур барча макро ва микроэлементлар тушади. Қорамол гўнггининг бир т қуруқ моддаси таркибида 20 кг азот, 10 кг фосфор (P_2O_5), 24 кг калий (K_2O), 28 кг (CaO), 6 кг магний (MgO), 4 кг олтингугурт (SO_3), 25 г бўр (B), 230 г марганец (Mn), 20-30 г мис (Cu), 100 г рух (Zn), 2 г кобальт (Co), 2 г молибден (Mo) ва 0,4 г иод (J) мавжуд.

Таркибида ўсимликларнинг ривожланиши учун зарур барча элементларни тутгани сабабли гўнг тўлиқ ўѓит деб юритилади.

20 т чала чириган тўшамали гўнг таркибидаги озуқа моддалар миқдори 0,3 т аммиакли селитра, 0,25 т оддий суперфосфат ва 0,2 т калий хлориддаги озиқ моддаларга баробар бўлиши, гўнгнинг халқ хўжалигида нақадар катта аҳамиятга эга эканлигини кўрсатади.

Гўнгнинг минерал ўѓитлар олдидағи энг асосий камчилиги таркибидаги озиқ моддаларнинг % ларда ифодаланадиган миқдорининг камлигидир (айрим ҳоллардагина 1% дан ошади).

Маълумки, инсон тупроққа минерал ва органик ўѓитларни

солиш билан дехқончиликдаги моддалар айланишига таъсир кўрсатади. Гўнг, суюқ гўнг, парранда ахлати ва бошқа органик ўғитлар ишлатилганда, ҳосил билан олиб кетилган озуқа моддаларнинг бир қисми тупроққа қайтиб тушади. Дуккакли ва дуккакли-дон экинларнинг дони ва хашаги билан озиқлантирилган чорва молларининг гўнги азотга бойлиги билан ажралиб туради.

Шаҳар чиқиндилари, торф, сапропель (чучук сув ҳавзаларининг лойқаси) каби органик ўғитлар дехқончиликни қўшимча озиқа моддалар билан бойитади.

Органик ўғитлар тупроқнинг озиқ режимига билвосита йўл билан ҳам таъсир кўрсатади. Масалан, микроорганизмлар азотни ўзлаштириб, ўз танасида тўплайди натижада, азотнинг тупроқдаги ҳаракатчанлиги сусаяди, у ўсимликларнинг илдиз тизими жойлашган қатламда узоқ муддат сақланиб туради. Бу билан маҳаллий ўғитлар азотли ўғитларнинг исроф бўлишини сезиларли даражада камайтиради ва самарадорлигини оширади. Гўнгнинг фосфорли ўғитларга кўрсатадиган таъсири алоҳида аҳамиятга эга. Бунда биринчидан, микроорганизмлар ўғит таркиbidаги фосфорни ўзлаштириб, уни тупроқдаги тузларнинг кимёвий таъсиридан, бинобарин фосфорли ўғитларнинг асосий қисмини қийин эрийдиган шаклга ўтиб қолишдан сақлайди. Иккинчидан, органик ўғитлар ва улар асосида ҳосил бўладиган гумус фосфорни қамраб олиб, уни ўсимликлар қийин ўзлаштирадиган шаклга ўтиб қолишига йўл қўймайди. Учинчидан, тупроқ ферментлари ва микроорганизмларининг нафас олиши жараёнида ажралиб чиқадиган CO_2 гази ҳамда органик ўғитларнинг парчаланишидан ҳосил бўладиган органик кислоталар

таъсирида тупроқдаги фосфорнинг эрувчанлиги кучайиб, ўсимлик осон ўзлаштирадиган шаклга ўтади.

Тупроқка маҳаллий ўғитлар солинганда, микроорганизмлар ҳаёт фаолиятининг жадаллашиши эвазига биологик фаол моддаларнинг тури ва миқдори кўпаяди. Шундай моддалардан ҳисобланган ауксинлар, гетероауксинлар ва витаминлар ўсимликлар томонидан жуда оз миқдорда ўзлаштирилишига қарамасдан уларда кечадиган модда алмашинув жараёнини тезлаштиради. Натижада ўсимлик томонидан кўп миқдорда озиқ моддалар ўғит таркибидан ўзлаштирилади, экин ҳосилдорлиги ортади ва маҳсулот сифати яхшиланади. Компост ва бошқа турдаги органик ўғитлар солинган тупроқларда В12 витамин, рибофлавин, никотин кислота, биотин, пенициллин, стрептомицин, террамицин каби физиологик фаол моддалар бўлиши аниқланган.

Тупроқда пенициллин ва бошқа антибиотикларнинг бўлиши, биринчидан, ундаги касаллик тарқатувчи микроорганизмларни йўқотса, иккинчидан, ўсимликларни турли хил касалликларга дучор бўлишдан асрайди. Шу сабабли, органик ўғит солинган майдонлардаги ўсимликлар соғлом ва серҳосил бўлади.

Органик ўғитлар айниқса унумдорлиги паст тупроқларга солинганда яхши самара беради. Тупроқка муентазам равишда юқори меъёрда гўнг солинса, гумус миқдори кўпаяди, сингдириш сиғими катталашади ва буферлиги ортади. Шу билан бир қаторда тупроқнинг биологик, физикавий ва кимёвий хоссалари ҳамда сув ва ҳаво режимлари яхшиланади. Органик ўғитлар таъсирида оғир тупроқларнинг механикавий таркиби енгиллашади, енгил

тупроқларнинг нам сифими ва сув ўтказувчанилиги ижобий томонга силжийди.

Маълумки, фақат минерал ёки фақат маҳаллий ўғит қўллаш йўли билан ҳам экинлардан мўл ҳосил олиш мумкин. Лекин улар таркибидаги озиқ моддаларнинг икки хил табиатли эканлигини (минерал ўғитлардаги озиқ моддалар осон эрийди, гўнгдаги органик моддалар секин парчаланади), шунингдек тупроқ хосса ва хусусиятларига кўрсатадиган таъсирини ҳисобга олсан, уларни бирга қўллаш нақадар катта аҳамиятга эгалиги аён бўлади.

Пахтачиликда минерал ўғитлар самарадорлигига гўнгнинг таъсирини аниқлаш мақсадида минерал ўғитларнинг турли меъёрлари гўнгли (20 т/га) ва гўнгсиз варианtlарда синаб кўрилган.

Тажриба натижалари гўнг ва минерал ўғитлар биргаликда қўлланилганда гектаридан 2-3 ц қўшимча пахта ҳосили олиш мумкинлигидан далолат беради. Шу билан бирга ўғитлар биргаликда ишлатилганда пахта ҳосили тез пишиб етилади, толанинг пишиқлиги, чигитнинг вазни ва таркибидаги ёғ миқдори ошади ҳамда уруғлик сифатлари яхшиланади.



академик Д.Н. Прянишников “... минерал ўғит қанча кўп ишлаб чиқарилмасин, гўнг ҳеч қачон ўз аҳамиятини

Гўнглар. Тўшамали гўнг

Гўнг – энг муҳим органик ўғит. Таркибида ўсимликлар учун зарур барча озиқа моддалар мавжуд бўлганлиги сабабли рус агрокимёгар олими,

53

йўқотмайди, қишлоқ хўжалигидаги асосий ўғитлардан бири бўлиб қолаверади”, деб ёзган эди.

Чорва молларини боқиш усули ва хўжаликларнинг имкониятларига боғлиқ равишда тўшамали ёки тўшамасиз гўнг олинади.

Тўшамали гўнг чорва молларининг қаттиқ ва суюқ ажратмалари ҳамда улар остига ташланадиган похол, сомон, қипик каби жинслардан иборат бўлиб, 25 % қуруқ модда ва 75 % сув дан иборат.

Молларга бериладиган ем-харакат таркибидағи органик модданинг 40, фосфорнинг 80, азотнинг 50 ва калийнинг 85 % и гўнг таркибиға ўтади. Гўнг таркибидағи озиқ моддалар миқдори чорва молининг тури ва ёши, бериладиган ем-харакат таркибиға боғлиқ равишда кенг миқёсда ўзгаради. Мазкур омиллар гўнг таркибидағи қаттиқ ва суюқ фракциялар нисбатига ҳам кучли таъсир кўрсатади. Чунончи, озуқа серсув бўлса, гўнг таркибида суюқ ажратмалар миқдори кўпаяди. Моллар сероқсил омихта ем-харакат билан озиқлантирилганда эса гўнг азот ва фосфорга бой бўлади. Ёш новвос ва ғунажинларнинг гўнггида озиқ моддалар миқдори анча кам, чунки озуқа таркибидағи моддаларнинг кўп қисми улар танасининг шаклланиши учун сарфланади.

От ва қўйларнинг қаттиқ ҳамда суюқ ажратмалари таркибидағи қуруқ модда, азот, фосфор ва бошқа элементлар гўнгни сақлаш жараёнида кўп иссиқлик ажратиш йўли билан парчаланади. Шу боис улар “қайноқ гўнг” деб юритилади. Йирик шохли қорамоллар ва чўчқаларнинг гўнгги ўз таркибида кўп миқдорда сув ва камроқ озиқ модда тутади, нисбатан қийин парчаланади, ҳарорати секин кўтарилади ва “совуқ гўнг”лар тоифасига киритилади.

Тўшамалар зоогигиена ва агрономия нуқтаи назардан катта аҳамиятга эга. Биринчидан, улар чорва молларининг қуруқ ва тоза ётиб-туришини таъминласа, иккинчидан, гўнг миқдорини оширади.

Чорва моллари гўнги таркибидағи қуруқ модда,

азот ва қул элементлар миқдори, %

Ҳайвон тури	Қуруқ модда	N	P ₂ O ₅	K ₂ O	CaO	MgO	SO ₄
Қаттиқ ажратмаларда							
Йирик шохли қорамол	16	0,29	0,17	0,10	0,35	0,13	0,04
Отлар	24	0,44	0,35	0,35	0,15	0,12	0,06
Қўйлар	35	0,55	0,31	0,15	0,46	0,15	0,14
Чўчқалар	18	0,60	0,41	0,26	0,09	0,10	0,04
Суюқ ажратмаларда							
Йирик шохли қорамол	6	0,58	0,01	0,49	0,01	0,04	0,13
Отлар	10	1,55	0,01	1,50	0,45	0,24	0,06
Қўйлар	13	1,95	0,01	2,26	0,16	0,34	0,30
Чўчқалар	3	0,43	0,07	0,83	0,01	0,08	0,08

Тўшамалар билан гўнг таркибиага қўшимча озиқ моддалар киритилади ва улар микроорганизмлар иштироқида парчалангач, ўсимликлар ўзлаштирадиган шаклга ўтади.

Чорва молларининг суюқ ажратмалари ва ажралиб чиқадиган аммиак тўшама томонидан ютилади. Тўшама ишлатилмаса, уларнинг талай қисми йўқолади. Сомон суюқликни шимиб олади.

Янги тўшамали гўнгнинг тахминий кимёвий таркиби, %

Кўрсаткичлар	Сомонли тўшама				Торфли тўшама	
	йирик шохли қорамол	чўчқа	отлар	кўйлар	йирик шохли қорамол	отлар
Қуруқ модда	23	28	29	35	22	33
Органик модда	20	25	25	32	-	-
Азот:						
ялпи	0,45	0,45	0,58	0,83	0,60	0,80
оқсилсимон	0,28	-	0,35	-	0,38	0,48
аммиак шаклдаги	0,14	0,20	0,19	-	0,18	0,28
P ₂ O ₅	0.23	0.19	0.28	0.23	0.22	0.25
K ₂ O	0.50	0.60	0.63	0.67	0.48	0.53
CaO	0.40	0.18	0.21	0.33	0.45	0.44
MgO	0.11	0.09	0.14	0.18	-	-
SO ₄	0.06	0.08	0.07	0.15	-	-

Тўшамалар гўнгнинг намлигини камайтиради, ғоваклигини оширади ва осон парчаланишига ёрдам беради. Тўшамали гўнгларни ташиш ва тупроқса солиш анча енгил. Тўшама фақат оғилларда эмас, балки қўра ва қўтонларда ҳам ишлатилиши лозим.

Сақлаш жараёнида тўшамали гўнг таркибининг ўзгариши. Сақлаш жараёнида микроорганизмлар гўнг таркибидаги қаттиқ суюқ моддаларни нисбатан оддий минерал моддаларга қадар парчалайди ва аммиак шаклдаги азотнинг бир қисмидан ўз таналарини шакллантиришда фойдаланади. Аммиак шаклдаги азотнинг бир қисми амид шаклдаги азотга айланади. Сақлаш жараёнида аммиак шаклдаги азот кўпроқ сийдикнинг парчаланиши ҳисобига йўқолади, чунки у гўнгнинг бошқа таркибий қисмларига нисбатан тезроқ парчаланади.

Чорва молларининг суюқ ажратмалари мочевина, гипур кислота ва сийдик кислотасидан иборат. Гўнгни сақлаш жараёнида улардан биринчи навбатда мочевина, ундан кейин гипур кислота ва энг охирида сийдик кислотаси парчаланади.

Мазкур маълумотлардан суюқ ажратмалар таркибидаги азотли бирикмаларнинг парчаланишидан охирги маҳсулот сифатида аммиак ҳосил бўлиши кўриниб турибди. Ҳосил бўлган аммиакнинг асосий қисми тўшама томонидан ушлаб қолинади. Тўшамали гўнгнинг парчаланишидан ҳосил бўладиган органик кислоталар ва чиринди моддаларнинг сингдириш сиғими катта бўлиб, қисман бўлса-да, аммиакни ютиш қобилиятига эга.

Гўнг таркибида тўшама миқдори кўп бўлса, табиийки, микроорганизмлар сони ҳам кўпаяди ва кўпроқ миқдордаги аммиак ушлаб қолинади. Тўшама кам миқдорда ишлатилганда, суюқ ажратмаларнинг бир қисми сизиб чиқади ҳамда аммиак шаклдаги азотнинг кўп қисми йўқолади.

Гўнг таркибидаги органик моддаларни парчаланишидан ҳарорат $60\text{-}70^{\circ}\text{C}$ даражагача кўтарилади.

Гўнгларни чириш даражасига кўра ажратиш. Чириш даражасига кўра янги, чала чириган, чириган гўнглар ва чиринди фарқланади.

Таркибидаги тўшама сифатида ишлатилган сомон ўз табиий ранги ва мустаҳкамлигини сақлаб қолган гўнг – янги гўнг деб юритилади. Бундай гўнгдан тайёрланган сувли сўрим қизғиши-сариқ ёки яшилтоб тусда бўлади.

Чала чириган гўнгда сомон ўз мустаҳкамлигини йўқотиб, тўқ жигарранг тусга ўтади. Сувли сўрими қуюқ, қорамтири тусли. Массаси янги гўнг массасига нисбатан 20-30% камаяди.

Чириган гўнг – қора ёпишқоқ масса, таркибида сомон ёки бошқа тўшама бор-йўқлиги сезилмайди. Сувли сўрими рангсиз. Массаси янги гўнг массасининг ярмига тенг.

Чиринди – органик моддага бой, қорамтири тусли, бир жинсли масса. Массаси янги гўнг массасининг 25% ига яқин.

Гўнгни обдон чиритиб, кейин тупроқка солиш мақсадга мувофиқ эмас, чунки бунда гўнг таркибидаги органик моддалар ва азотнинг кўп қисми исроф бўлади.

Тўшамали гўнгни сақлаш усуслари. Гўнгни сақлашнинг бир нечта усули мавжуд. Шулардан бири гўнгни бевосита чорва моллари остида тўплашдир. Бунда молларнинг остига 30-50 см қалинликда сомон тўшалади. Ажратмалар ва тушама аралашиб, зичлашиб ётаверади. Устки қисми намланиб қолганда, яна қўшимча сомон (тўшама) ташланади. Тўшама етарли миқдорда ва ўз муддатида қўлланилса, азотнинг аммиак шаклда йўқолиши ва гўнг шалтоғининг оқиб чиқиб кетишига чек қўйилади. Шу усул билан тўпланган гўнгни зич, ғовак-зич ва ғовак усусларда сақлаш мумкин.

Зич сақлаш усулининг моҳияти қўйидагича: гўнг эни 5-6 м, қалинлиги 1 м (узунлиги ихтиёрий) қилиб уюлади ва яхшилаб шиббаланади. Устига яна 1 м қалинликда гўнг ташланади ва яна зичланади. Бу тадбир уюмнинг баландлиги 2,5-3,0 м бўлгунча давом эттирилади. Охирида уюмнинг усти 8-15 см қалинликдаги сомон ёки торф билан қопланади ва устига юпқа тупроқ қатлами ташланади.

Зич сақлаш усулини қўллаб, 3-4 ой ўтгач чала чириган, 7-8 ойдан кейин эса тўла чириган гўнг олиш мумкин.

Фовак-зич сақлаш усулида эса гўнг 1 м қалинликда ташланади ва шу ҳолатда 3-5 кун қолдирилади (бунда ҳарорат 60-70 даражагача кўтарилади). Кейин яхшилаб шиббаланади ва устига яна шунча гўнг ташланади ва юқорида айтилган тадбир такрорланади.

Сақлашнинг биринчи босқичида (зичлашга қадар) термофил бактериялар иштирокида жадал аэроб жараён кетади. Азот ва органик моддалар бир қисмининг йўқолишининг олдини олиш учун қўпроқ микдорда тушама ишлатиш лозим. Юзага келадиган юқори ҳарорат ошқозон-ичак хасталикларини қўзғатувчи микроорганизмларни ва бегона ўт уруғларини нобуд қиласади.

Сақлашнинг иккинчи босқичида (зичлашдан кейин) гўнг массасининг ҳарорати 30-35 даражага тушади ва чириш анаэроб шароитда давом этади. Фовак-зич сақлаш усулида 1,5-2,0 ой ичидаги чала чириган, 4-5 ой ичидаги эса тўла чириган гўнг ҳосил бўлади. Мазкур усул гўнгни нисбатан қисқа муддатларда чиритиш ва таркибидаги касаллик тарқатувчи микроорганизмлар ҳамда бегона ўт уруғларини тўлароқ йўқотиш лозим бўлганда қўлланилади.

Фовак сақлаш усулида гўнг массаси зичланмасдан,

шундайлигича қолдирилади. Аэроб шароитда чириш натижасида юқори ҳарорат юзага келади ва кўп микдорда азот, органик моддалар йўқолади, гўнг шалтоғи оқиб кетади.

Органик моддалар, азот ва гўнг шалтоғининг исроф бўлишини олдини олиш учун гўнглар маҳсус тайёрланган гўнгхоналарда сақланади. Гўнгхоналарнинг ости бетон билан қопланган, гўнг шалтоғи йиғиладиган ҳовузчаларга эга бўлиши, ёмғир ва қор сувлари тўпланиб қолмаслиги керак.

Гўнг шалтоғи ва унинг таркибидаги озиқ моддаларнинг бекорга исроф бўлишининг олдини олиш тадбирларидан бири унга фосфорит талқони қўшишdir. Бунда биринчидан, ўғит таркибидаги фосфор миқдори кескин кўпаяди, иккинчидан, фосфор ўсимликлар осон ўзлаштирадиган шаклга ўтади, учинчидан, гўнгнинг гумификацияланиши тезлашади, тўртинчидан, микроорганизмлар фаолияти кучаяди.

**4 ой ичида сақлаш усули ва тўшама турига боғлиқ равишда
гўнг таркибидан азот, органик моддалар
ва шалтоқнинг йўқолиши %**

Сақлаш усули	Сомон тўшамали гўнг		
	органик модда	азот	гўнг шалтоғи
Ғовак	32,6	31,4	10,5
Ғовак-зич	24,6	21,6	5,1
Зич	12,2	10,7	1,9

Фосфорит талқонини гўнгга исталган пайтда (сақлашнинг бошланишидан тупроққа киритгунча) аралаштириш мумкин, лекин қанча эрта аралаштирилса, самараси шунча юқори бўлади. Гўнг-фосфорит талқони аралашмасини кузги шудгор пайтида қўллаш мақсадга мувофиқдир.

Тўшамали гўнг – озиқ моддалар манбаи. Гўнг тўлиқ ўғит ҳисобланиб, таркибида ўсимликлар учун зарур озиқ моддаларнинг барчасини тутади. Азот ва кул элементларнинг ўсимликларни озиқланиши учун лаёқатлилиги гўнгнинг таркиби, чириш даражаси ва тупроққа солингандан кейин минераллашиш тезлигига боғлиқ.

Гўнг таркибидаги калийнинг асосий қисми ҳаракатчан ва хлорсиз шаклда бўлиб, уни тамаки, картошка, мевали ва цитрус мевалиларга қўллаш яхши самара беради. Тупроққа солинган гўнг ва минерал ўғитлар таркибидаги калий биринчи экин томонидан бир хилда (солинган микдорнинг 60-70% и) ўзлаштирилади.

Фосфорнинг асосий қисми гўнгнинг қаттиқ фракцияси таркибига киради. Органик моддаларнинг минераллашиши жараёнида ортофосфат кислотанинг турли даражада эрийдиган тузлари ҳосил бўлади. Бу тузлар гўнгдаги органик моддалар билан маълум даражада мулоқотда бўлганлиги сабабли тупроқда камроқ боғланиб қолади. Шунинг учун гўнг таркибидаги фосфор минерал ўғитлар таркибидагидан кўпроқ (25% ва ундан ортиқ) ўзлаштирилади. Гўнгдаги органик моддаларнинг, шунингдек, гўнг билан тупроққа биргаликда солинадиган минерал ўғитлар таркибидаги фосфорнинг ўсимликларга моликлиги ортади.

Тупроққа гўнг солинган биринчи йилда ўсимликлар аммиак шаклдаги азотни ўзлаштиради. Ўсиш даври узун

бўлган ўсимликлар гўнгдаги азотдан унумли фойдаланади. Ўсимликлар турли чорва моллари гўнги таркибидаги озиқ моддалардан турли даражада фойдаланади. Масалан, биринчи йили экинлар қўй гўнги таркибидан азотнинг 30, от гўнгидан 20 ва қорамол гўнгидан 18% ини ўзлаштиради.

Гўнгдаги азотдан фойдаланиш коэффициенти, шунингдек, гўнгнинг чириш даражасига боғлиқ. Маълумотларнинг кўрсатишича, биринчи экин янги гўнг таркибидан 7,8%, чала чириган гўнг таркибидан 23,4%, чириган гўнг ва чиринди таркибидан мос равишда 17,5 ва 4,8% азотни ўзлаштиради.

Тупроққа янги гўнг солинганда минераллашадиган азотнинг асосий қисми микроорганизмлар томонидан ютилади ва натижада ўсимликлар азот билан тўла таъминланмай қолади. Шунинг учун янги гўнгни анча эрта муддатларда кузги шудгор остига бериш мақсадга мувофиқдир.

Бир т гўнг таркибида ўртacha 5 кг азот, 2,5 кг фосфор ва 6 кг калий мавжуд. Гектарига 30 т гўнг солинганда, тупроққа 150 кг азот, 75 кг фосфор ва 180 кг калий келиб тушади. Биринчи йилги экин томонидан тахминан 30-40 кг азот, 22,5 кг фосфор ва 100 кг калий ўзлаштирилади. Бу рақамларни бир т ҳосилнинг шаклланиши учун сарфланадиган азот, фосфор ва калий миқдори билан таққосласак, калий етарли бўлгани ҳолда, қўшимча равиша азотли ва фосфорли ўғитларни кўллаш лозимлиги англашилади.

Тўшамали гўнгни қўллаш. Тўшамали гўнгни кузги шудгор остига солиш энг самарали усул ҳисобланади. Солинган гўнг меъёри унинг чириш даражаси, ўсимликларнинг биологик хусусиятлари ва тупроқ-иқлим шароитларига боғлиқ равиша гектарига 20-50 т қилиб белгиланади.

Одатда, сабзавот, картошка ва илдиз мевалилар ва кўк поя

учун етишириладиган экинлар донли экинларга нисбатан кўпроқ гўнг билан таъминланади. Чопикталаб экинлар қатор оралари ишланмайдиган экинларга нисбатан гўнгга анча талабчандир. Гумус ва озиқ моддалар билан кам таъминланган тупроқлар учун гўнг меъёри сезиларли даражада оширилади.

Кучиз маданийлашган тупроқларнинг унумдорлигини ошириш ва экинлар ҳосилдорлигини кескин кўтариш учун гўнгга ўта талабчан экинларга (маккажўхори, бодринг, картошка, қандлавлаги, кузги донли экинлар) бир йўла юқори меъёрда гўнг қўллаш, бошқа экинларга эса кўпроқ минерал ўғитлар ишлатиш тавсия қилинади.

Гўнгнинг алмашлаб экишда тутган ўрнини белгилашда экинларнинг биологик хусусиятлари ва иқтисодий мавқеига эътибор берилади. Дала экинларни алмашлаб экишда биринчи навбатда донли экинлар ёки чопикталаб экинлар гўнг билан таъминланиши керак. Хўжаликда гўнг сероб бўлса, барча экинларга гўнг қўллаш мумкин.

Гўнг тупроқ хусусиятларини тубдан яхшилайдиган ва ўсимликларнинг барча талабларини қондирадиган мураккаб ўғит ҳисобланади. Аммо унинг миқдори республикамизда жуда камдир. Шу боисдан оз миқдорда тўпланадиган гўнгдан имкон қадар самарали фойдаланиш мамлакатимизда экинлар ҳосилдорлигини оширишда асосий омиллардан бири ҳисобланади. Бу муаммони ҳал қилишда хўжаликларда “гўнг алмашлаш” режасига амал қилиш (алмашлаб экиш тизимидағи битта далага камида 12-15 т/га миқдорида гўнг солиш) мухим аҳамият касб этади.

Тупроқ эритмасида озиқ моддалар концентрациясининг юқори бўлишини талаб қиласидиган, ўсиш даври узоқ давом этадиган, тупроқдаги карбонат кислотага талабчан экинлар

учун гўнгнинг аҳамияти беқиёсdir.

Сабзавот экинларни алмашлаб экишда биринчи навбатда гўнг билан (минерал ўғитлар билан биргалиқда) бодринг таъминланади, чунки у гўнгга ўта талабчан ва тупроқ әритмасидаги озиқ моддалар концентрациясига таъсирчан экиндири.

Сабзи, петрушка каби экинларга янги ёки чала чириган гўнг қўлланилса, илдиз меваси “шохлаб” кетади, маҳсулот сифати бузилади. Бундай экинлар тупроққа гўнг солингандан кейин 2-3 йил ўтгач ёки тўла чириган гўнг қўлланиладиган пайкалларга экилади.

Маълумки, янги гўнг тупроқ юзасига бир текисда сочилмайди. Бу ҳол айниқса зигир экинига сезиларли салбий таъсир кўрсатади: кўчат қалинлигига олачалпоқлик кузатилади. Шу боис гўнгни ўтмишдош экинга бериш, зигирга юқори меъёрда минерал ўғит қўллаш лозим.

Ўсиш даври қисқа экинларга (карам ва картошканинг эртаги навлари) яхши чириган, кечроқ муддатларда йиғишириб олинадиган экинларга эса (кечки карам ва картошка, қандлавлаги) янги гўнг эрта муддатларда қўлланади.

Гўнгнинг самарадорлиги кўп жиҳатдан тупроқ билан аралашиб даражасига боғлиқ. Тупроққа яхши кўмилмаган гўнг таркибидаги аммиак шаклдаги азот бир неча кун ичida тўлалигича учиб кетади. Кузги шудгор остига солинадиган гўнг хўжаликда мавжуд шароитлардан келиб чиқсан ҳолда 15-30 см чуқурликда кўмилиши шарт. Намлик етарли тупроқларда гўнг нисбатан юза кўмилса, парчаланиш жараёни жадал, ўта нам тупроқларда жуда чуқур қатламларга солинса, аэрациянинг сустлиги сабабли чириш жуда секин кетади. Кургоқчил шароитда гўнг тупроқнинг юза қатламларида қолиб кетса,

тупроқларнинг янада жадалроқ сувсизланиши кузатилади. Оғир механикавий таркибли тупроқларга гўнг юзароқ, енгил тупроқларга эса аксинча, чукурроқ қўмилади.

Гўнг ҳисобига олинадиган қўшимча ҳосилни 100% десак, унинг 20-40% и биринчи йилги экиндан, қолган 60-80% и кейинги йилларда етиштириладиган экинлардан олинади. Гўнгнинг таъсир қилиш муддати биринчи навбатда тупроқнинг механикавий таркиби билан боғлиқ. Оғир тупроқларга солинган гўнг 4-5 йил давомида ўз таъсир кучини сақлаб турса, енгил механикавий таркибли тупроқларда анча тез парчаланади, табиийки, таъсир муддати камроқ бўлади.

Республикамиз тупроқларининг ярмидан кўпи турли даражада шўрланган. Бундай майдонларда тупроқ шўрини ювмай туриб пахтадан юқори ҳосил олиб бўлмайди. Тупроқ шўрини сифатли ювишда гўнгнинг аҳамияти катта. Шудгорлаш олдидан ерга гўнгни юқори меъёрда солиш эвазига тупроқнинг намлик ўтказувчанлик қобилияти кучаяди ва суфориш таъсирида тузларнинг ювилиши тезлашади. Суфоришдан кейинги даврда гўнг жойлашган тупроқ қатламидаги капилляр началар бузилади ва пастки қатламлардан туз тупроқ бетига кўтарилимайди. Бу ҳол ёш ниҳолларни ўсиш даври бошларида тузларнинг заарли таъсиридан сақлаб қолади. Тупроқ шўри ҳар га майдонга 20 т миқдорида гўнг солингандан кейин ювилса, 6-7 ц атрофида қўшимча пахта ҳосили етиштириш кафолатланади.

Тўшамасиз гўнг

Деҳқончилиқда қўлланиладиган гўнгларнинг 60 % дан кўпроғини тўшамасиз гўнг ташкил қилади. Гўнгнинг бу тури молхоналарда тўшама ишлатмасдан, чорва моллари ахлатини сув оқими ёрдамида ювиш йўли билан тўпланади. Таркибидаги

сувнинг микдорига кўра тўшамасиз гўнг учга бўлинади:

- а) ярим суюқ гўнг (намлиги 90% гача);
- б) суюқ гўнг (намлиги 90-93% атрофида);
- в) оқма гўнг ёки шалтоқ (намлиги 93% дан юқори).

Тўшамасиз гўнг таркибидаги ялпи азотнинг 50-70% и аммоний, 3-8% и нитрат ва 25-45% и органик шаклда бўлади. Аммоний шаклдаги азот ўз навбатида аммиак, мочевина ва аммоний карбонатдан иборатdir. Бир неча кун ичида мочевинанинг 90 % и аммиак ва карбонат кислотага айланади. Лекин бунда эркин аммиакнинг миқдори 5-10% дан ошмайди (тўшамали гўнгда аммоний шаклдаги азот ҳиссасига умумий азотнинг 30-40% и тўғри келади). Демак, қўллашнинг биринчи йилида ўсимликлар тўшамасиз гўнг таркибидаги азотни тўшамали гўнгдагидан кўра кўпроқ ўзлаштиради.

Калийнинг асосий қисми гўнгнинг суюқ фракцияси таркибида бўлиб, ўсимликлар томонидан осон ўзлаштирилади.

Тўшамасиз гўнг табиий равишда тиндириб қўйилса, ундаги қаттиқ фракция 10-15% ни, механикавий усулда ажратилганда эса 30-40% ни ташкил этади. Фракцияларга ажратилган тўшамасиз гўнгдаги фосфорнинг 70, азотнинг 80 ва калийнинг 90% и суюқ қисми таркибида бўлади. Тўшамасиз гўнг сув билан қанчалик суюлтирилса, шунча кўп озиқ моддалар суюқ фракция таркибиغا ўтади.

Тўшамасиз гўнг тупроқ билан яхшилаб аралаштирилмаса таркибидаги азотнинг 95% дан кўпроғи йўқолади. Шунинг учун тўшамасиз гўнг сочиб чиқилгандан кейин албатта изидан плуг ёки пичноқли оғир тирма ёрдамида кўмилиши лозим.

Тўшамасиз гўнгни қўллаш меъёри экин тури ва режалаштирилган ҳосилдан келиб чиқсан холда гектарига 50-60 т дан 100-150 т га ча бўлиши мумкин.

Тўшамасиз гўнг турлича намликка эга бўлгани сабабли қўллаш меъёрини белгилашда унинг миқдорига эмас, балки у билан тупроққа келиб тушадиган озиқ моддалар миқдорига эътибор берилади. Экинларнинг азотга бўлган талабининг 70-75% и тўшамасиз гўнг таркибидаги азот ҳисобидан қондирилиши мумкин.

Кузги ва баҳорги дон экинларга гўнг сочиш мосламалари билан тўшамасиз гўнгни қўллаб бўлмайди, чунки бунда биринчидан, ниҳоллар ётиб қолади, иккинчидан, тупроқ бетида “гўнг қатқалоги” юзага келади. Санитария-гигиена нуқтаи назаридан сабзавот экинларига ҳам тўшамасиз гўнг қўллаш тавсия этилмайди.

Тўшамасиз гўнг тупроққа солинган биринчи йилда таркибидаги 10-20% азот, 10-15% фосфор, 30-35% калий ўзлаштирилади. Тупроқ билан яхшилаб аралаштирилганда, бу кўрсаткичлар мос равишда 25-35, 20-30 ва 40-60% ни ташкил этади.

Парранда ахлати

Парранда ахлати – қимматли, нисбатан концентратланган ва тез таъсир этувчи маҳаллий ўғит. Гўнг сингари парранда ахлати ҳам таркибида ўсимликларнинг меъёрида ўсибиривожланиши учун зарур барча озиқ моддаларни тутади.

Парранда ахлати таркибидаги озиқ моддаларнинг миқдори парранда тури, озуқа миқдори ва сифатига қараб кескин ўзгаради: қанчалик тўйимли ва концентратланган озуқа берилса, ахлат таркибидаги озиқа моддалар миқдори шунча кўп бўлади. Йил давомида ҳар бош товуқдан 6-8, ўрдақдан 8-10 ва ғоздан 12 кг гача ўғит олиш мумкин.

Парранда ахлати таркибидаги барча озиқа моддалар ўсимлик осон ўзлаштирадиган шаклдадир. Азотнинг асосий

қисми сийдик кислотаси шаклида бўлиб, сақлаш жараёнида аввал мочевинага, кейин аммоний карбонатга айланади. Нотўғри сақлаш шароитларида аммоний карбонат парчаланиб, тезда аммиак, CO_2 ва сув ҳосил бўлади.

Паррандалар ахлатининг кимёвий таркиби (%) ва бир бош паррандадан йил давомида олинадиган микдори, кг

Парранда тури	Сув	N	P_2O_5	K_2O	CaO	MgO	SO_3	Йил давомида олинадиган гўнг
Товуқлар	56	2,2	1,8	1,1	2,4	0,7	0,4	6-8
Ўрдаклар	60	0,8	1,5	0,5	1,7	0,3	0,3	8-10
Ғозлар	80	0,6	0,5	0,9	0,6	0,3	1,1	10-12

Ўғит катта-катта уюмларга тўплаб сақланса ҳам тезроқ қизийди ва бунда ҳам аммиакнинг исроф бўлиши кузатилади. 6 ой давомида сақланган парранда ахлати таркибидан 50% га яқин азот йўқолади. Айниқса, қиш фаслида ахлатнинг гоҳ музлаб, гоҳ эришидан ҳам кўп микдорда азот йўқолади. Азот исроф бўлишининг олдини олиш мақсадида парранда ахлатига массасининг 7-10% и микдорида суперфосфат талқони ёки 20-40% ига тенг торф қукуни қўшиш лозим. Паррандахонага майдо қирқилган сомондан тўшама ташланса, ўғит таркибидаги озиқ моддаларнинг исроф бўлиши камаяди.

Парранда ахлатини экишгача ва ниҳолларни қўшимча озиқлантиришда қўллаш тавсия этилади. Унга айниқса зифир, картошка, хашаки илдизмевалилар, сабзавот экинлари ва мевали дараҳтлар талабчандир. Асосий ўғит сифатида қуруқ парранда ахлатини сабзавот экинлари ва картошканинг ҳар

гектариға 1-2 т миқдорда құллаш керак. Нам ҳолатдаги үғит мөйеरи гектариға 4-10 т қилиб белгиланади.

Құшимча озиқлантиришда әкін турига қараб 0,4-0,8 т/га нам ҳолатдаги үғит уя ёки пушталар ичига солинади. Қуруқ парранда ахлатининг мөйеरи иккі марта камайтирилади. Суюқ ҳолатда ишлатиш учун қуритилған парранда ахлати сув билан 1:7 нисбатда суюлтирилади.

Қишлоқ хұжалик әкиnlари қуритилған парранда ахлати таркибидан құллашнинг бириңчи йилида 30-40% азот, 35-45% фосфор (P_2O_5) ва 60-80% калий (K_2O)ні үзлаштиради.

Компостлар

Махаллий үғитлар таркибидаги озиқ моддалар исроф бўлишининг олдини олиш ва фосфорли үғитлар таркибидаги озиқ моддаларни ўсиммилклар томонидан осон үзлаштириладын шаклга ўтказиш учун турли-туман компостлар тайёрланади.

Компостлар микроорганизмлар таъсирига бардоши билан бир-биридан фарқланувчи иккита таркибий қисмдан иборат бўлади. Торф, сомон, сапропел ва бошқа чиқиндилар қийин парчаланади ва асосан намлик ва аммиакни шимиб олиш учун хизмат қиласи. Нажас, гўнг шалтоғи кабилар эса аксинча, микрофлорага бой бўлиб, таркибида осон парчаланадын азотли органик бирикмаларни тутади. Компостлар жуда турли-туман бўлиб, бизнинг шароитимизда кўпроқ гўнг-фосфорли, нажас-тупроқли, гўнг-сапропелли ва аралаш компостлар кенг тарқалган.

Гўнг-фосфорли компост. Бу турдаги компост бевосита әкін майдонларига яқын ерларда тайёрланади. Бунинг учун 50-60 см чукурликда компост тайёрлаш ўраси ковланади. Ўрага 30-40 см қалинликда гўнг ташланади (гўнг қуруқ ҳолатда

бўлса, маълум миқдорда сув олиб намланади) ва устига 200-300 кг суперфосфат сочилади. Суперфосфатнинг йирик кесакчалари албатта олдиндан майдаланиши лозим. Сўнгра 15-20 см қалинликда тупроқ билан кўмилади. Бу мақсадда ўра ковлаш пайтида олинган тупроқдан фойдаланилади. Агар кўхна девор қолдиқлари ёки узоқ муддат қўёш таъсирида қизиб ётган зовур тупроқлари ишлатилса, компостнинг сифати янада яхшиланади. Тупроқ устидан бир қатlam гўнг шалтоғи қўйилади. Шу тахлит уюм 2,0-2,5 м га етказилади ва усти 10-15 см қалинликда сомон ва юпқа (10 см чамаси) тупроқ билан қопланади.

Компост тайёрлаш жараёнида уюмдаги жинсларни аралаштиришга алоҳида эътибор берилади. Аралаштирилмаган компост яхши чиримайди, табиийки, фосфор ўсимликлар учун кам лаёқатлиигича қолиб кетади. Аралаштириш чизель ёки юклash механизмининг чўмичи ёрдамида бажарилиши мумкин. Аралашма 100-120 кундан кейин белкурак ёрдамида қайта яхшилаб аралаштирилади. Етилган компост сочиувчан, бир жинсли бўлиб, қорамтири-жигарранг тусда бўлади.

Нажасли-тупроқли компост. Дехқончилиқда нажас (хожатхона ахлати)дан тайёрланадиган компостлардан ҳам кенг фойдаланилади. Нажасли-тупроқли компост тайёрлаш учун эни ва бўйи 2,0-2,5, чукурлиги 0,5-0,7 м бўлган хандақ ковланади. Унга бир қатlam нажас, бир қатlam тупроқ навбат билан ташланади (1 т нажасга 1 т тупроқ тўғри келиши керак). Усти сомон, торф ёки хашак билан кўмилади. Кўмма ҳар 3 ҳафтада яхшилаб аралаштириб турилади. Икки-уч ой ичida нажаснинг бадбўй ҳидидан холи, қорамтири тусли, донадор ва сочиувчан компост тайёр бўлади.

Нажасли-тупроқли компост аъло сифатли маҳаллий

ўғитлардан ҳисобланади ва гектарига 12-15 т меъёрида қўлланилади. Нажас-тупроқли компостни санитария-гигиена нуқтаи-назаридан сабзавотчиликда, картошкачиликда, полизчиликда ва резавор меваларга қўллаш қатъиян мумкин эмас.

Аралаш компостлар тайёрлашда гўнг, сомон, хазонлар, чучук сув ҳавзаларининг лойқалари, фосфорли ўғит, шаҳар чиқиндилари ва бошқа ахлатлардан фойдаланиш мумкин. Бунда ҳам юқорида айтиб ўтилган тадбирлар амалга оширилади.



Кўкат ўғитлар

Деҳқончиликда гўнг ишлатишнинг аҳамияти катта бўлишига қарамасдан уни республикада тўпланадиган миқдори жуда кам. Йил давомида жамғариладиган гўнгнинг барчаси фан тавсияси асосида ишлатилганида ҳам барibir у алмашлаб экишнинг битта даласини гектарига 20 т маҳаллий ўғит билан таъминлаш имконини беради, холос. Пахтачиликда минерал ўғитлар юқори меъёрларда ишлатилаётган ҳозирги даврда тупроқларни органик моддалар билан таъминлаш биринчи галдаги вазифа бўлиб қолмоқда. Бу муаммони ҳал этишнинг энг самарали усули кўкат ўғитлардан фойдаланишdir.

Тупроқунумдорлигини ошириш мақсадида тупроққа қўшиб ҳайдаб юбориладиган ўсимликларга кўкат ўғитлар дейилади.

Кўкат ўғитлар сифатида мош, кузги нўхат, люпин, сераделла, қашқар беда, ёввойи ловия, бурчоқ, шабдор (эрон бедаси)

каби дуккакли экинлардан, шунингдек республикамизда кузги жавдар, сули, райграс, берсим каби ўсимликлардан кенг фойдаланилади.

Кўкат ўғитлар тупроқни азот ва органик моддаларга бойитади, чунки уларнинг таркибидаги азот миқдори гўнгдагидан кўп бўлиб, нисбатан камроқ миқдорда фосфор ва калий тутади.

Кўкат ўғит сифатида етиштириладиган экинлардан гектарига 350-400 ц кўк поя олинганда, улар таркибидаги 150-200 кг азот 35-40 т гўнгга тенг бўлади.

Кўкат ўғитлар тупроқнинг физикавий хоссаларини яхшилайди. Тупроқдаги 0,25 мм дан катта бўлган агрегатлар миқдори ўтлоқи-ботқоқ тупроқларда 3-7, оғир механикавий таркибли тупроқларда 4-9% га ортади. Улар таъсирида тупроқнинг ўсимлик илдиз тизими тарқаладиган қатламидаги ҳарорат 2-4°C га ошади, микроорганизмлар сони 10-17 баравар кўпаяди ва фаоллиги 45-50 кун давомида максимал даражада сақланади.

Фойдаланиш усулига кўра кўкат ўғитларни З гурухга бўлиш мумкин: а) ер усти ва илдиз қисми жойида ҳайдаб юбориладиган; б) кўк пояси чорва учун ўриладиган, илдиз ва анғиз қолдиқлари тупроққа аралаштириладиган; в) ер устки қисми ўриб, бошқа пайкалга сочиладиган.

Кўкат ўғитлар одатда сентябрь-октябрь ойларида экилади, келаси йил баҳорда чорва моллари учун 400-500 ц гача кўк масса олинади ва қоладиган илдиз ҳамда анғиз қолдиқлари тупроққа қўшиб ҳайдаб юборилади. Тупроққа тегишлича ишлов берилгандан кейин сабзавот ёки техникавий экинлар экилади. Кўкат ўғитлар ҳисобига қумоқ тупроқли ерларда сулидан 4,0-7,7 пахтадан 3-4 ц/га атрофида қўшимча ҳосил олиш мумкин.

Бактериал препаратлар

Деҳқончилиқда бактериал препаратлар тупроқ микроорганизмларининг таркиби ва миқдорини кўпайтириш ҳамда улар фаолиятини қучайтириш мақсадида қўлланилади.

Айрим ҳолларда дарслик ва адабиётларда “бактериал препарат” ўрнига “бактериал ўғит” иборасини қўллайдилар, бу нотўғри, албатта. Чунки, одатда ўғит деганда, таркибида бирорта озиқ элементини тутган, бевосита тупроқ унумдорлигини оширадиган моддалар тушунилади.

Бактериал препаратлар эса тирик организмлар бўлиб, ўз таркибида озиқ моддаларни тутмайди, лекин тупроқдаги захира озиқа моддаларни тезроқ минерал ҳолатга ўтказади ва атмосфера азотининг ўзлаштирилишида муҳим роль ўйнайди, шу билан ўсимликларнинг озиқланиш шароитларини яхшилашда иштирок этади. Энг кенг тарқалган бактериал препаратлар жумласига нитрагин, азотобактерин, фосфобактерин солиш мумкин.

Нитрагин. Нитрагин – жуда фаол туганак бактерияларни тутган бактериал препарат. Тупроқдаги туганак бактериялар ўзига хос хусусиятларга эга бўлиб, ҳар бир дуккакли экин ўзига хос туганак бактерияга эга. Масалан, баъзи бактериялар беданинг илдизида туганак ҳосил қилса, айримлари фақат нўхатнинг, яна бошқалари эса фақатгина люпиннинг илдиз тизими билан симбиоз ҳаёт кечиради. Бундай ўзига хослик айрим ҳолларда жуда кичик доирада намоён бўлади. Тупроқларда туганак бактериялар сони ва фаоллигини оширишнинг энг самарали ва ишончли усули – нитрагин солишdir. Саноат усулида ва маҳаллий шароитларда тайёрланадиган нитрагин фарқланади. Заводда тайёрланадиган нитрагиннинг 0,5 кг ми бир га майдондаги дуккакли экинларга етади. Айни

нитрагиннинг сақланиш муддати – 9 ой. Ҳарорат 0-10⁰C атрофида бўлса, нитрагин узок вақт бузилмасдан сақланади. Препарат зах жойда сақланса, моғорлайди. Моғор замбуруғи нитрагин учун кучли антагонист ҳисобланади. Нитрагинни заҳарли кимёвий моддаларга яқин жойда сақлаш асло мумкин эмас, чунки бундай шароитда бактериялар нобуд бўлади.

Нитрагин тупроққа дуккакли экин уруғига аралаштириш йўли билан солинади. Бунинг учун майда уруғ (беда, себарга, сераделла)ларнинг ҳар 10 кг га, йирик уруғларнинг ҳар 20 кг га 500 мл сув сепилади ва текис юзага бир текисда ёйилади. Устига керакли миқдордаги нитрагин сепилади, белкурак ёрдамида яхшилаб аралаштирилади, куригандан кейин қопларга жойлаб, далага жўнатилади. Мазкур тадбирлар соя жойда амалга оширилиши керак, чунки қуёш нури таъсирида бактериялар нобуд бўлади. Нитрагин эритмасига 25-50 г молибденли (Mo) микроўғит қўшиб эритилса, янада яхши самара беради. Агар уруғларни ҳашаротларга қарши дорилаш даркор бўлса, аввал дориланади, сўнгра нитрагин билан ишланади.

Нитрагинни дуккакли экин экиладиган майдон тупроғи билан аралаштириб ҳам қўллаш мумкин. Бунда пайкалдан 400-500 кг тупроқ олинади, унга нитрагин қўшиб аралаштирилади ва 1 га майдонга бир текисда сочиб чиқилади.

Маҳаллий нитрагин эса бевосита хўжаликнинг ўзида тайёрланади. Бунинг учун кўп йиллик ўсимликларнинг касалликка чалинмаган илдизлари ҳаётининг иккинчи ёки учинчи йилида, бир йиллик ўсимликларники эса ўримдан кейин йиғиб олинади. Илдизлар яхшилаб ювилади, ёйиб 20-25⁰C ҳароратда соя жойда қуритилади ва майдалаб 1 мм тешикчали элақдан ўтказилади. Шу усулда тайёрланган талқоннинг 1 г да 8-19 млн дона туганак бактерия бўлади. Маҳаллий нитрагинни

2 йил сақлаш мумкин. 1 га майдондаги дуккакли экинлар учун 100-300 г маҳаллий нитрагин ишлатилади.

Азотобактерин. Азотобактерлар – азотфиксацияловчилар тоифасига кириб, тупроқда эркин яшовчи аэроб бактериялардан ҳисобланади.

Улар туганак бактериялардан фарқ қилиб, илдиз атрофида эркин яшайди. Илдиз ажратмалари ва илдизнинг чириётган қолдиқлари билан озиқланиб, ўсимликларни азот билан озиқланишини яхшилади.

Тупроқдаги ва агар-агардаги азотобактерин фарқланади. Азотобактер тупроқ ёки торфда кўпайтирилса, тупроқ азотобактерин дейилади. Бундай азотобактерин дон, полиз ва техникавий экинларнинг уруғлари учун 3 кг, картошка учун 6-9 кг/га микдорида ишлатилади. Уруғлар пол ёки брезентга ёйилади: ҳар 30-40 кг уруғ учун бир литр сув олиб, керакли микдордаги азотобактерин билан белкурак ёрдамида яхшилаб аралаштирилади. Ишлов берилган уруғлар 24 соат ичидаги экилмаса, азотобактерин билан қайтадан ишланади.

Агар-агарли азотобактерин солинган шишага (0,5 литрли) 100-200 мл сув солиб бир кеча-кундуз давомида чайқатиб турилади ва экиладиган куннинг ўзида 1 га ерга экиладиган дон экинлари учун 1 литр, 1 га ерга экиладиган картошка учун 10 литр сувда эритилади ва аралаштирилади. Ўсимликларнинг кўчатларига ишлов берилганда 1 шиша азотобактерин 20 литр сувда эритилиб, унга кўчатларнинг илдизлари ботириб олинади. 1-2 шиша препарат 25-30 минг кўчатни ишлаш учун етади.

Азотобактерин ҳам худди нитрагиндай қуруқ жойда, анча салқин ҳароратларда, кимёвий моддалардан узоқроқда сақланиши керак. Сақлаш муддати – 3 ой.

Фосфобактерин. Фосфобактерин – тупроқдаги фосфорли бирикмаларни минераллаштира оладиган (*Bakterium megatherium phosphaticus*) туркумига мансуб бактерияларни тутган препарат.

Микроорганизмлар ишлов берилган уруғлар билан тупроққа тушиб, илдизларнинг атрофида яшайди ва органик бирикмалар таркибидаги фосфорни ўсимликлар осон ўзлаштирадиган минерал ҳолатга ўтказиб беради.

Фосфобактерин суюқ ва қуюқ ҳолатда бўлиши мумкин. Суюқ фосфобактерин шиша идишларда чиқарилади. Бир га майдонга экиш учун мўлжалланган донли экинлар уруғига 50 мл, пахта, картошка ва қандлавлаги уруғига 100 мл фосфобактерин эритмаси ишлатилади. Препарат бочкада илиқ сув ёрдамида эритилади, ундан 1 л олиб, майда уруғларнинг 50-70, йирик уруғларнинг 100-200 килограмми билан аралаштирилади ва 20-25 см қалинликда ёйиб қуритилади.

Қуруқ ҳолатдаги фосфобактериндан 250 г/га ҳисобида олиб, суюлтирилади. Суюқликнинг 2,5-3,0 л билан 200 кг уруғ намланади.

Фосфобактеринни органик моддага бой тупроқларда ишлатиш яхши самара беради. Гумус миқдори кам ва шунингдек, нордон муҳитли тупроқларда ундан олинадиган самара анча паст бўлади.

■ | ЎҒИТ ҚЎЛЛАШ ТИЗИМИ

Ўғитлаш тизимининг асосий мақсади алмашлаб экиш шароитида ўғитлардан оқилона фойдаланишга йўналтирилган ташкилий хўжалик, агрокимёвий ва агротехникавий тадбирларни ҳисобга олган ҳолда қишлоқ хўжалик экинларидан мўл ҳосил олиш учун энг мақбул ўғит тури, меъёри, қўллаш муддатларини белгилашdir. Тизимни ишлаб чиқиша экинларнинг биологик хусусиятлари, режалаштирилган ҳосил микдори, тупроқ-иқлим шароитлари, ўғитларнинг асорати (кейинги таъсири), алмашлаб экиш жараёнидаги озик моддалари баланси, ўғитларнинг ҳосил сифати ва тупроқ унумдорлигига кўрсатадиган таъсирига алоҳида эътибор берилади.

Ўғитлаш тизими одатда ҳар бир пайкалга узоқ муддат давомида режа асосида ўғит солиш учун ишлаб чиқлади ва ўз олдига қуидаги асосий вазифаларни қўяди:

- экинлар ҳосилдорлигини ошириш ва ҳосил сифатини яхшилаш;
- тупроқлар унумдорлигини ошириш ва уларни унумдорлик жиҳатидан бир жинсли бўлишига эришиш;
- ўғитлардан самарали фойдаланиш, дехқончиликни жадал юритиш ва атроф-муҳит муҳофазасини тўғри йўлга қўйиш.

Хўжаликларнинг ихтисослашуви ва алмашлаб экиш майдонларининг чорвачилик фермаларидан узоқ-яқинлигига қараб уларда учта кўринишдаги ўғитлаш тизимиidan биттаси қўлланилади:

- маҳаллий-минерал ўғитли тизим. Бунда маҳаллий ўғитлар

(гўнг, компостлар, торф, кўкат ўғитлар) минерал ўғитлар билан биргалиқда қўлланилади;

- фақат минерал ўғитларни қўллашга асосланган тизим;
- фақатгина маҳаллий ўғитларни қўллашга асосланган тизим.

Экинларнинг ўғитга бўлган талабини аниқлашнинг физиологик асослари

Озиқа моддаларни ўсиммилклар томонидан ўзлаштирилишининг даврийлиги. Озиқа моддаларнинг ўзлаштирилиши ўсиммилклар ёшига қараб ўзгариб боради. Танглик (критик) ва энг кўп (максимал) ўзлаштириладиган даврлар фарқланади. Озиқланиш муҳитида маълум бир модданинг етишмаслиги ва уни ўсиммилкларнинг ривожланишига кучли таъсир кўрсатиши озиқланишдаги танглик давр деб юритилади. Экинлар кейинчалик мазкур элемент билан мўл-кўл даражада таъминланса-да, танглик даврнинг асорати узил-кесил йўқолмайди.

Тадқиқотлар асосида экинларда азот ва фосфорга нисбатан танглик давр ниҳоллар пайдо бўлгандан кейинги 10-15 кунларда кузатилиши аниқланган. Ривожланишнинг илк даврларидаги калий танқислигига ҳам экинлар ҳосилдорлиги кескин камаяди.

Азот ва фосфорга нисбатан танглик давр одатда эрта баҳорда, микроорганизмлар фаолияти суст бўлганда намоён бўлади.

Ривожланишнинг нисбатан кечроқ муддатларида ўсиммилкларнинг озиқланишга бўлган талаби кучаяди, қайсики, озиқа моддалари энг кўп (максимал) ўзлаштириладиган давр деб юритилади. Кўп ҳолларда бу давр ўсиммилклар томонидан энг кўп қуруқ биомасса тўпланадиган муддатга тўғри келади.

Кўпчилик экинларда озиқланиш даври ўсиш даврига

нисбатан сезиларли даражада қисқа бўлиб, бундай экинлар жумласига зифир ва аксарият бошоқли дон экинларини олиш мумкин. Айрим экинларда эса (қандлавлаги, картошка, карам ва бошқа) озиқланиш жараёни экиннинг бутун ўсиш даврида содир бўлади. Ўсимликлар озиқланишини уларнинг биологик хусусиятларини ҳисобга олган ҳолда бошқариш мумкин. Ўсимликларнинг озиқланишидаги даврийлик уларга йиллик ўғит меъёрини бўлиб-бўлиб, қўшимча озиқлантириш сифатида беришни тақазо этади. Маълумки, ўғитнинг йиллик меъёрини фақат бир марта, тупроқнинг маълум қатламларига бериш йўли билан экинлардан кўзланган ҳосилни олиб бўлмайди. Шу сабабдан ўсимликларни тўғри озиқлантириш тизимида асосий ўғитлашни (15-30 см) экиш олдидан ўғитлаш (5-10 см) ва қўшимча озиқлантиришлар билан ўйғунлаштириб амалга оширишга тўғри келади.

Озиқа моддаларнинг ҳосил билан олиб чиқиб кетилиши

Қишлоқ хўжалик экинлари тупроқдан озиқа моддаларни турли миқдор ва нисбатларда олиб чиқиб кетади. Бунда ўсимликларнинг тури ва нави билан бир қаторда тупроқ-иқлим шароитлари ҳам муҳим ўрин эгаллайди. Ўсимликларнинг озиқа моддаларига бўлган талаби умумий ҳосил билан олиб чиқиб кетиладиган озиқа моддалари миқдори билан ёки асосий маҳсулотнинг ҳосил бирлиги (шунга мос келадиган, похол ва бошқалар) билан белгиланади.

Ўсимликларда озиқа элементларнинг энг кўп миқдорда тўпланиши одатда пишиш даврининг бошларига тўғри келади. Бу катталиқдан “ўсимликларнинг озиқа элементларига бўлган талаби”ни аниқлашда фойдаланиш мумкин. Ривожланишнинг сўнгги даврларида хазонрезгилик ва моддаларнинг илдиздан тупроққа оқиб ўтиши ҳисобига ўсимликлар таркибида озиқа

моддалари миқдорининг бир қадар камайиши кузатилади.

Озиқа моддаларининг биологик ва хўжалик чиқими тушунчаларини фарқлай олишимиз лозим.

Ўсимликлар томонидан ҳосилнинг биологик массасини (дон, сомон, анғиз ва илдиз қолдиқлари) шакллантириш учун ўзлаштириладиган озиқ моддалар миқдори биологик чиқим избораси билан юритилади.

Хўжалик чиқими эса фақатгина маҳсулотнинг товар қисми билан (масалан, дон ва сомон, илдизмева ва палак) олиб чиқиб кетиладиган озиқ моддалар миқдорини кўрсатади. Агар сомон ёки палак нотовар маҳсулот сифатида пайкалда қолдирилса, улар таркибидаги озиқ моддаларнинг миқдори хўжалик чиқимига киритилмайди.

Чиқимнинг қолдиқ қисми – ўз ичига пайкалда қоладиган анғиз ва илдиз қолдиқлари, тўкилган дон ва мевалар таркибидаги, шунингдек, илдиздан тупроққа оқиб ўтадиган озиқа элементлар йиғиндисидан иборат. Тадқиқотлар бўйича чиқимнинг қолдиқ қисми таркибида ҳосилнинг шаклланиши учун озиқа моддаларнинг талайгина миқдори бўлиши аниқланган.

Айтиб ўтилганлардан фақат хўжалик чиқими асосида белгиланадиган ўғит меъёри ўсимликларнинг озиқа моддаларига бўлган талабини тўла таъминлай олмаслиги кўриниб турибди. Чунки ўсимликларга озиқа моддалар фақат товар маҳсулотнигина эмас, балки илдиз тизими, барг ва пояларни шакллантириш учун ҳам зарурдир. Тупроқда қоладиган ўсимлик қолдиқлари минераллашиб, кейинги экиладиган экинлар учун озиқа вазифасини ўтайди. Амалда ўсимликларнинг озиқа моддаларга бўлган талаби 1 т асосий маҳсулот ва унга мос келадиган “ёрдамчи” маҳсулотнинг

шаклланиши учун сарфланадиган хўжалик чиқими асосида ҳисобланади.

Илдиз ва анғиз қолдиқларини тупроқларнинг озиқ режимига таъсири

Юқорида ўсимликлардан қоладиган илдиз ва анғиз қолдиқлари чиқим қолдиқ қисмининг асосини ташкил этиши таъкидлаб ўтилган эди. Дуккакли-дон ва дуккакли экинлар қолдирадиган илдиз ва анғиз қолдиқлари экинларнинг озиқланишига ижобий таъсир кўрсатади. Шу сабабли алмашлаб экинда ўғитлаш тизимини тузиш жараёнида бу албатта ҳисобга олиниши керак. Донли ва дуккакли-дон экинларнинг илдиз ва анғиз қолдиқлари таркибидаги углерод ва азот ўртасидаги нисбат ($C:N$) жуда кичик бўлиб, мазкур элементларнинг гўнгдаги нисбатига яқинлашиб боради. Илдиз ва анғиз қолдиқларининг минераллашиш жараёни ҳам анча жадал кечади. Шунингдек, улар таркибидаги озиқа моддаларининг ўсимликлар томонидан ўзлаштирилиш коэффициенти ҳам гўнгдаги озиқа моддаларнинг ўзлаштирилиш коэффициентига жуда яқин. Бу биринчи навбатда азотга тегишли бўлиб, дуккакли экинлардан қоладиган илдиз ва анғиз қолдиқлари таркибидаги азот биринчи, иккинчи ва учинчи йилларда 20-25, 15-20 ва 5-10% ўзлаштирилади. Маълумотларда келтирилишича, дуккакли ва дуккакли-дон экинларнинг ҳар бир тонна илдиз ва анғиз қолдиқлари ҳисобига 10-15 кг азот тупроққа келиб тушади.

■ | МИНЕРАЛ ВА ОРГАНИК ЎЃИТЛАРНИ БИРГАЛИҚДА ҚЎЛЛАШ

Минерал ўѓитлар ва гўнгни биргалиқда қўллаш уларни алоҳида-алоҳида қўллашдагига қараганда яхши самара беради. Бу биринчидан, гўнг таъсирида тупроқдаги микробиологик жараён фаоллигининг кучайиши ва иккинчидан, минерал ўѓитлар таъсирида гўнг ва тупроқдаги органик моддаларнинг тезроқ парчаланиши билан боғлиқdir. Минерал ва органик моддалар биргалиқда қўлланилганда, фосфорли ўѓитларнинг тупроқ билан мустаҳкам бирикмалар ҳосил қилиши камаяди. Гўнг билан тупроққа маълум миқдорда микроэлементлар келиб тушади, қайсики, микроўѓитлар қўллаш муаммосини деярли ҳал қилишда муҳим аҳамиятга эга. Гўнгнинг парчаланиш жараёнида ажралиб чиқадиган карбонат ангидриди ҳаво таркибиغا ўтади ва ўсимликларда фотосинтез жараёнининг кучайиши учун хизмат қилади.

Минерал ва органик ўѓитларни биргалиқда қўллашга айниқса, тупроқда озиқ моддалари концентрациясининг ошиб кетишига ўта сезгир, лекин бутун ўсиш давомида уларни етарли миқдорда бўлишини талаб қиласиган бодринг, пиёз, маккажӯхори каби экинлар талабчандир.

Гўнг тупроқнинг асосий компонентларидан бўлмиш гумус миқдорига ижобий таъсир кўрсатади. Маҳаллий ўѓит солинманган майдонларда гумус миқдорининг йилдан-йилга камайиб бориши кузатилади. Республикамиз пахтачилик илмий-тадқиқот институти олимларининг таъкидлашича, умуман ўѓит қўлламаслик ёки минерал ўѓитларга ортиқча ружу қўйиш оқибатида фақатгина кейинги 50-60 йил ичида тупроқдаги

гумус микдори 25-50% га (100% га нисбатан) камайган. Амалга оширилган кўп йиллик стационар дала тажрибаларининг натижалари ҳам мазкур фикрнинг тўғрилигини тасдиқлайди.

Тупроқда гумус ҳосил бўлиши алмашлаб экиш тури, солинаётган минерал ва маҳаллий ўғитларнинг микдорига боғлиқдир. Гўнг фонида тупроққа қўшимча равишда азотли ўғитлар солиш лозим, чунки ўсимликлар биринчи йилда гўнг таркибидаги азотни фосфор ва калийга қараганда жуда кам ўзлаштиради.

Гўнгни чопиқталаб экинларга қўллаш яхши самара беради, чунки қатор ораларига ишлов берилганда гўнг тезроқ минераллашади ва ундан ўсиш даври узунроқ бўлган экинлар унумли фойдаланади.

Қишлоқ хўжалиги ишлаб чиқаришидаги технологиялар

Қишлоқ хўжалигининг ишлаб чиқаришининг жадалашув даражасига боғлиқ равишда қишлоқ хўжалик экинларини етиширишда турли технологиялардан фойдаланилади.

Экстенсив технологиялар ўғитлар ва бошқа кимёвий воситаларни қўлламасдан тупроқнинг табиий унумдорлигидан фойдаланишга мўлжалланган. Озиқа модаларининг етишмаслигини бартараф этиш мақсадида оз микдорда минерал ўғитлардан фойдаланиш мумкин.

Нормал технологиялар тупроқ ва агроландшафт ресурслари унумдорлигини ҳамда биологик азотнинг манбаларини ўрганиш билан бир қаторда тупроқлар ва агроландшафтлар деградациясининг олдини олишга (эрозия, дефиляция ва ифлосланиш оқибатлари), кимёвий мелиорациялаш ва органик ўғитлар қўллаш орқали ҳосилдорликни пасайтирувчи омилларни, яъни нокулай тупроқ муҳити ва озиқа моддаларининг етишмаслигини

бартараф этишга, ўсимликларни энг хавфли бўлган касалликлар, заараркунандалар ва бегона ўтлардан ҳимоя қилишга қаратилган.

Минерал ўғитлар тупроқдан ҳосил билан олиб чиқиб кетилётган озиқа моддаларининг ўрнини тўлдириш учун олинадиган маҳсулотга кетган харажатни юқори даражада қоплай олишни таъминлайдиган миқдорда қўлланилади, бунда навнинг биологик имконияти 40-50% дан кам бўлмаган миқдорда реализация қилинади.

Жадал технологиялар – бу нафақат табиий ва техник ресурслар ҳисобига балки ҳосил билан тупроқдан олиб чиқиб кетилётган озиқа моддаларнинг ўрнини тўлдириш учун тегишли миқдорда ўғитлар қўллаш, шунингдек, энг хавфли касаллик, заараркунанда ва бегона ўтларга қарши кураш чораларини амалга ошириш йўли билан ҳосилдорлик ва унинг биологик имкониятини 60-65% дан кам бўлмаган миқдордаги сифатли маҳсулот олишга мўлжалланган.

Юқори жадал технологиялар – ўғитларнинг иқтисодий рентабеллиги ва уларни қўллаш ҳисобига режалаштирилган ҳосилдорликка эришиш мақсадида ўсимликларнинг ҳимояси ва унинг озиқа элементларига бўлган талабни тўлиқ таъминлашга оид барча агротехник биологик ва кимёвий тадбирлар комплексини қўллаш ҳисобига ҳосилдорлик бўйича навнинг биологик имкониятининг 80-85% дан кам бўлмаган юқори сифатдаги маҳсулотлар олишга мўлжалланган. Бундай даражадаги технологиялар қишлоқ хўжалик машиналарнинг энг яхши комплексларини қўллашга ва фан техника тараққиётининг барча ютуқларини жорий қилишга мўлжалланган.

Ўғит қўллаш турлари, усуллари ва муддатлари.

Ўғит қўллаш тизимида ишлатиладиган иборалардан тўғри фойдаланиш лозим:

- асосий ўғитлаш (экишгача, экиш билан);
- қаторлаб ўғитлаш (экиш билан бирга);
- қўшимча озиқлантириш (экинларнинг ўсиш даврида).

Ўғитларни тупроқ қўйидаги муддатларда солиш мумкин:

- кузда; баҳорда; ёзда; белгиланган маълум ойларда.

Ўғитлашнинг асосий усуллари жумласига қўйидагилар киради:

- ёппасига (сочма); жойига (уялаб, ўчоғига, қаторлаб);
локаль-тасмасимон; захиравий; механизмлар ёрдамида;
ҳаводан ва ҳ.к.

Ўғитларни тупроқ билан аралаштиришда плуг, культиватор-озиқлантиргич, дискали ва тишли тирма каби мосламалардан фойдаланилади.

Кўп ҳолларда ўғит меъёри (нормаси) ва ўғит микдори (дозаси) тушунчалари алмаштириб юборилади. Ўғит меъёри – экинга бутун ўсиш даври давомида бериладиган ўғит микдорининг кўрсаткичи бўлиб, бир га майдонга қўлланиладиган соф моддаларнинг кг (баъзи ҳолларда т) бирлиқда ифодаланишидир.

Ўғит микдори деганда эса, муайян муддатда (масалан, экиш олдидан, 3-4 чин барг даври ва ҳ.к.) бир марта бериладиган ўғит микдори назарда тутилади.

Ўғитларни тупроқ хоссалари ва экинлар илдиз тизимининг тарқалишини ҳисобга олган ҳолда турли чуқурликка тушишига эришиш муҳим агрономик тадбирdir. Тупроқнинг анча чуқур, нам қатламига тушган ўғитлар осон эрийди ва ўсимликлар томонидан бутун ўсиш даври давомида яхши ўзлаштирилади.

Ўғитларни қўллашда уларни еости сувлари таъсирида ҳаракатланиши, ювилиши ва газ шаклида йўқолиши каби салбий жараёнларни ҳисобга олиш лозим. Бу биринчи навбатда азотли ўғитларга тегишли бўлиб, нитрат шаклидаги азот суформа сувлар таъсирида ювилади ва атроф-муҳитни ифлослантиради. Мазкур жараён айниқса, енгил механикавий таркибли тупроқларда жадал кетади.

Нитратларнинг ювилиши эрта баҳор ва кеч куз даврларида сезиларли даражада кучаяди. Куруқ иқлимли шароитларда суғоришдан кейин нитратлар сувнинг капилляр кўтарилиши жараёнида тупроқнинг юза қатламларига қараб ҳаракатланади. Шу сабабдан азотли ўғитларни қўллаш муддатлари ва аммиак шаклидаги азотнинг нитрификацияланиш жадаллигини билиш катта амалий аҳамиятга эга. Нитратли-азотли ўғитлар таркибидан азотнинг йўқолиши бошқа турдаги азотли ўғитлардагига қараганда кучлироқдир. Қаттиқ ҳолатдаги аммиакли ва амидли-азотли ўғитлар тупроққа юза солинганда, pH, ўғит меъёри ва тупроқ намлигининг ортиши билан уларнинг исроф бўлиши ҳам ошиб боради. Маълумотларнинг кўрсатишича, аммиакли селитра ва мочевина юза қўлланилганда, таркибидаги азотнинг 1-3 % и бекорга исроф бўлади.

Суюқ азотли ўғитларни тупроқнинг юза қатламларига қўллаш кўп микдордаги азотнинг йўқолишига сабаб бўлади. Қумоқ тупроқларда сувли аммиак 10-12, суюқ аммиак 16 см чуқурликка солинганда, азотнинг исроф бўлиши кузатилмайди. Соз тупроқларда эса бу кўрсаткич мос равишда 7-8 ва 12-14 см ни ташкил этиши лозим.

Фосфорли ўғитлар анча қийин эрийдиган шаклда бўлганлиги сабабли одатда улар тупроқ профили бўйлаб

жуда ҳам секин ҳаракатланади. Шунинг учун фосфорнинг ўсимликларни асосий илдиз тизими тарқаладиган қатламдан ювилиши сезилар-сезилмас миқдордадир.

Маълумки, калий қумли ва қумлоқ тупроқлардан камроқ миқдорда ювилиши мумкин.

Фосфор ва калийнинг тупроқда фиксацияланиши жуда тез (тупроққа тушгач 1-2 кечакундуз давомида) содир бўлади. Бунда фосфорнинг анчагина қисми (60-70% и) қийин ўзлаштириладиган бирикмалар таркибига ўтади. Фосфорнинг мазкур ҳолатга ўтиш миқдори ва жадаллиги бевосита ўғитнинг физикавий ҳолатига боғлиқ. Одатда куқунсимон ҳолатдаги фосфорли ўғитлар донадор фосфорли ўғитларга нисбатан тупроқ билан тезда мулоқотга киришади ва қийин ўзлаштириладиган шаклга ўтади.

Фосфорли ва калийли ўғитлар экишгача тупроқнинг юза қатламларига солинганда, уларнинг асосий қисми ўсимликлар томонидан ўзлаштирилмай қолади. Ўсиш даврида озиқлантиргич мослама ёрдамида бериладиган қўшимча озиқлантириш тўғрисида ҳам шундай фикр юритиш мумкин. Шу сабабдан ҳам фосфорли ва калийли ўғитлар йиллик меъёрининг асосий қисми (50-60 % и) кузги шудгор остига берилади.

Асосий (экишгача) ўғитлаш. Ўғитлашнинг бу усули экинларни бутун ўсиш даври мобайнода, айниқса, озиқа моддаларига юқори талаб қўйиладиган, жадал ривожланиш даврида, озиқа элементлари билан таъминлаш учун қўлланилади. Асосий ўғитлашда режалаштирилган ўғит меъёрининг асосий қисми тупроққа солинади. Хўжаликнинг тупроқ-иқлим шароитлари ва айрим иқтисодий-ташкилий муаммоларидан келиб чиқкан ҳолда асосий ўғитлаш кўпроқ кузда, баъзи ҳолларда баҳорда амалга оширилади.

Асосий ўғитлашнинг энг мақбул муддатларини белгилашда тупроқнинг механикавий таркиби, намланиш шароитлари ва ўғитларнинг хусусиятлари ҳисобга олинади. Осон эрувчан ва серҳаракат бўлганлиги сабабли нитратли ва аммиакли-нитратли азотли ўғитлар фақат тупроқни баҳорда қайта ҳайдаш даврида ёки культиватор-ўғитлагич ёрдамида солинади. Баҳорги нам ва илиқ даврда аммиак шаклидаги азот жуда қисқа муддатда нитрат шаклига ўтади ва атмосфера ёғин-сочинлари ёки суформа сувлар таъсирида осонлик билан пастки қатламларга ювилади.

Фосфорли ўғитларни иложи борича чуқурроқ кўмиш учун улар одатда кузги шудгор ёки баҳорда қайта ҳайдаш олдидан сочиб чиқилади.

Таркибida хлортутган калийли ўғитлар йиллик меъёрининг 50% и ёки ундан ҳам кўпроғи кузги шудгор остига солинса, куздаги ёғин-сочинлар таъсирида хлорнинг ўсимликларга кўрсатадиган салбий таъсири анча камаяди.

Гўнгни ҳам кузда, айрим ҳолларда баҳорги ишлов пайтида ишлатиш яхши самара беради. Гўнгни кўмиш чуқурлиги бевосита тупроқларнинг намлиги ва механикавий таркиби билан боғлиқ. Нам ва оғир механикавий таркибли тупроқларда гўнгни юзароқ солиш яхши самара беради.

Асосий ўғитлашда кўпроқ сочма ва локал (жойига) усуслардан кенгроқ фойдаланилади. Тажрибалар натижаларининг кўрсатишича, ўғитлар локал-тасмасимон усуlda кўлланилганда, экинлар ҳосилдорлиги 3-23% га ошади.

Ўғитни экиш билан бирга қўллаш. Экиш билан бирга ўғит қўллашда маҳсус ўғитлагич мосламалардан фойдаланилади. Ўғитларни бу усуlda қўллашдан кутиладиган асосий натижа ниҳолларни ривожланишнинг ilk 6-15 кунларида озиқа

моддалари билан етарлича таъминлаш бўлиб, асосан осон эрийдиган минерал ўғитлар (комплекс ўғит)лардан ҳам фойдаланилади. Экиш билан бирга солинадиган ўғитлар (ўғитнинг “старт дозаси”) ўсимликларнинг илдиз тизимини жадал ривожланишига ҳамда унга тупроқ ва ўғит таркибидаги озиқа моддалари ютилишини тезлаштиришга ёрдам беради. Бу усулда ўғит уруғдан 2-3 см узоқлик ва чуқурликка солинади (агар уруғ ўғит билан аралаштирилиб, сўнгра экилса, уруғларнинг унувчанлиги пасаяди ва ҳатто униб чиққан ниҳоллар нобуд бўлиши ҳам мумкин). Шунингдек, экиш билан бирга ўғитларни аралаштириб қўллаш ҳам мақсадга мувофиқ эмас, чунки кўпинча азотли ва фосфорли ўғитлар аралаштирилганда, бўтқасимон масса ҳосил бўлади, қайсики ўғитлагич мосламалар ишини мушкуллаштиради.

Экиш билан бирга асосан азотли ва фосфорли ўғитлар солинади. Калийли ўғитлар ўғитлашнинг бу усулида қўлланилмайди, чунки уларнинг таркибидаги хлор ўсимликларга салбий таъсир кўрсатади. Куз ёки эрта баҳорда тупроққа кўп миқдорда ўғит солинган бўлса, экиш билан бирга бериладиган ўғитнинг самараси анча пасаяди.

Экинларни қўшимча озиқлантириш. Маълумки, суғориладиган дехқончилик шароитида, шунингдек, нам иқлимли худудларда азотли ўғитларни, айниқса нитратли ва аммиакли-нитратли азотли ўғитларни, асосий ўғитлаш вақтида қўллаб бўлмайди. Азотли ўғитларнинг 70-80% и, калийнинг ярми ва фосфорнинг камроқ қисми тупроққа қўшимча озиқлантириш сифатида солинади.

Умуман олганда, қўшимча озиқлантириш қуйидаги ҳолларда амалга оширилади:

- кузги ғалла экинлари ва кўп йиллик ўтларни азот билан

озиқлантиришда;

- енгил механикавий тупроқларда, шунингдек, суфориладиган шароитларда етишириладиган чопикталаб экинларни азот ва калий билан таъминлашда;

- тупроқдаги тузлар концентрациясининг ошиб кетишига ўта сезгир экинлардан юқори ҳосил етишириш режалаштирилганда;

- мевали дараҳтлар ва буталарни озиқлантиришда;

- айрим сабабларга кўра йиллик ўғит меъёрининг тегишли қисми асосий ўғитлаш даврида солинмагандা.

Қишлоқ хўжалик экинларига ўғит меъёларини белгилаш

Республикамизда экинлардан мўл ва сифатли ҳосил олиш учун қишлоқ хўжалигига кўп микдорда минерал ва маҳаллий ўғитлар етказиб берилмоқда. Ўғит меъёларини тўғри белгилаш агрокимё фани ва амалиётининг асосий вазифаси бўлиб қолмоқда. Ўғит меъёрини белгилашда тупроқ, ўсимлик, ўғит, иқлим ва агротехникавий тадбирлар ўртасидаги боғлиқлик ҳисобга олиниши лозим. Турли экинлар учун ўғит меъёрини белгилашда маҳаллий қишлоқ хўжалик ва илмий муассасаларнинг тавсияларидан ёки маълумотнома адабиётларида кўрсатилган микдорлардан фойдаланиш мумкин. Тавсия этиладиган ўғит меъёларига муайян тупроқ, хўжалик шароитлари ҳамда режалаштирилган ҳосил асосида тегишли аниқлик ва тузатишлар киритилади. Ўғит меъёрини режалашда хўжаликларнинг минерал ўғитларни сотиб олишга бўлган молиявий ахволи ҳамда тўпланадиган маҳаллий

ўғитлар миқдорига ҳам алоҳида эътибор берилади.

Агрокимёда ўғитлашнинг мақбул, оқилона ва энг юқори меъёрлари фарқланади. Ўғитлашнинг мақбул меъёри деб ҳар га майдондан тупроқ унумдорлигини сақлаган ёки ошириб борган ҳолда мўл ва сифатли ҳосил ҳамда энг юқори даражада соф даромад олиш учун керак бўладиган ўғит миқдорига айтилади. Маълумки, ўғит меъёрининг чексиз ортиб боришига боғлиқ равишда қўшимча ҳосил миқдори ҳам ошиб боравермайди, маълум даражадан кейин қўшимча ҳосил миқдорининг камайиши кузатилади. Шунинг учун агар хўжалиқда минерал ўғит миқдори кам бўлса, камроқ майдонга юқори меъёрда ўғит қўллашдан кўра, кўпроқ майдонга ўртacha меъёрда қўллаб ялпи ҳосил миқдорини оширган маъкул.

Ўғитлашнинг оқилона меъёри – ишлаб чиқаришнинг муайян ташкилий-хўжалик шароитида бир га майдондан имкон қадар юқори ҳосил олишни ва шу билан бир қаторда маълум миқдордаги иқтисодий самарадорликни таъминлайдиган ўғит меъёридир.

Ўғитлашнинг энг юқори меъёри деганда, талаб даражасидаги сифатга эга бўлган, максимал миқдордаги ҳосил етиштириш учун қўлланиладиган ўғит меъёри тушунилади. Ўғитлашнинг бу усули хўжаликлар ўғит билан жуда юқори даражада таъминланган ҳоллардагина ўзини оқлаши мумкин.

Ҳозирги даврда ўғит меъёрларини белгилашнинг бир нечта усули мавжуд. Республикамиздаги илмий-тадқиқот муассасалари томонидан ўтказилган дала тажрибалари натижаларини умумлаштириш асосида турли экинлар учун умумлаштирилган ўғит меъёрлари ишлаб чиқилган.

**Сабзавот, полиз экинлари ва картошка учун тавсия
этиладиган минерал озиқа модда меъёрлари**

Экин тури	Хосил, ц/га	Бўз тупроқлар			Ўтлоқи ва ўтлоқи ботқоқ тупроқлар		
		азот	фосфор	калий	азот	фосфор	калий
Картошка	120-150	120-150	100	60	100-120	120-150	60-80
Помидор	280-300	180-200	140-150	90-100	140-180	140-150	100
Карам	250-300	150-200	100-150	75-100	120-150	120-150	80-100
Пиёз	200-220	200	150	75	160	160	80
Бодринг	200-250	150-200	100-150	50-75	120-150	120-150	60-75
Сабзи	150-200	120-150	80-100	40-50	80-100	100-120	50-60
Полиз экинлари	250-300	100-150	100-150	50	80-100	100-120	50-60

Дала тажрибаларидан олинадиган натижалар ишлаб чиқариш шароитида олинадиган ҳосилдорликдан сезиларли даражада юқори бўлиши (масалан, ғалла экинларида – 30%, картошкада – 50% гача)ни албатта ҳисобга олиш керак.



Ўғитлар меъёрда қўлланилганда даладаги
экинларнинг кўриниши

■ АСОСИЙ ҚИШЛОҚ ХЎЖАЛИК ЭКИНЛАРИНИ ЎҒИТЛАШ



Ғўзани ўғитлаш

Бир т пахта хомашёси ва унга
мос вегетатив массани тўплаш
учун ғўза тупроқдан ўрта ҳисобда
50-60 кг азот, 15-20 кг фосфор ва
50-60 кг калийни ўзлаштиради.
Ғўза етиштириладиган
майдондан озиқа моддаларнинг
чиқиб кетиши ҳосил миқдори

ва таркибига боғлиқдир. Ҳосилдорлик юқори (45-50 ц/га)
бўлганда, ғўзанинг ҳосил қисмлари ўсувчи органларига

нисбатан кучлироқ ривожланади ва табиийки, бунда бир тонна хомашё учун нисбатан камроқ миқдорда озиқа моддалари сарфланади. Ниҳоллар униб чиққандан шоналаш давригача ғўза жуда секин ривожланиб, органик қисмининг атиги 4-5% и шаклланади. Шоналашдан то гуллашгача ўсимлик қуруқ массасининг 25-30% и шаклланади, вегетатив массанинг жадал тўпланиш суръати кўсакларнинг очилиш давригача давом этади. Қуруқ масса миқдорининг бундан кейинги ошиб бориши ҳосил органлари салмоғининг ортиши ҳисобига содир бўлади.

Ғўзанинг озуқа моддаларига бўлган талаби бевосита қуруқ массанинг тўпланиш суръати билан боғлиқ, лекин бу жараён бир меъёрда кетмайди. Бошқа экин турлари каби ғўза ҳам ўсиш даврининг бошларида фосфор ва азотга кучли эҳтиёж сезади. Чигит унгандан шоналаш давригача ҳосил билан чиқиб кетадиган озиқа моддаларнинг 8-10% и, гуллашдан пишиш давригача эса, асосий қисми ўзлаштирилади.

Суғориб дехқончилик қилинадиган майдонлар тупроғининг нитрификациялаш қобилияти юқори бўлганлиги сабабли уларда азотнинг жадал миграцияси содир бўлади. Суғориш жараёнида нитратлар сув билан бирга тупроқнинг куйи қатламларига ювилиб тушади, суғоришлар орасида ўтадиган давр ичida эса юқорига қўтарилади, бу ўсимликларни азот билан меъёрида озиқланишини чеклаб қўяди. Бундай шароитда нитратларнинг ювилиб кетиши ва денитрификацияга учраши натижасида азотли ўғитларнинг анчагина қисми исроф бўлади. Азотли ўғитлар исрофгарчилигини камайтириш ва уларнинг самарарадорлигини ошириш учун ўғитлаш муддати ва усулини тўғри белгилаш, суғориш режимига қатъий амал қилиш,

шунингдек, аммиакли азотли ўғитлар ва мочевина тупроққа солинганда, азотнинг нитрификацияланишини маълум даражада чеклайдиган тадбирларни қўллаш керак.

Маълумки, азотли ўғитлар экишгача, экиш билан бирга ва қўшимча озиқлантириш сифатида қўлланилади. Экишгача (эрта баҳорда чизеллаш пайтида) йиллик азот меъёрининг 20-25 кг миқдори (8-10% и) берилиши мумкин. Бунда азотли ўғит баҳор фаслидаги ёғин-сочин таъсирида эриб, тупроқнинг 30-50 см қатламига ювилади, қайсики, ниҳолларнинг илдиз тизими орқали осонликча ўзлаштирилади. Кўп ҳолларда азотли ўғитларнинг бир қисми тупроққа экиш билан бирга солинади, лекин унинг миқдори гектарига 20-25 кг дан ошиб кетмаслиги лозим, акс ҳолда чигит атрофидаги азотнинг концентрацияси ортиб кетиши ҳисобига уларнинг униб чиқиши кечикади.

Ғўза ниҳолларини қўшимча озиқлантиришлар сони азотнинг йиллик меъёри ва тупроқ шароитларига боғлиқидир. Йиллик азот меъёрининг экишгача ва экиш билан бирга берилгандан кейин қоладиган қисмини ривожланишнинг 2-3 чин барг, шоналаш ва гуллаш даврларида тенг миқдорларда тақсимланиши мақсадга мувофиқидир. Сўнгги қўшимча озиқлантириш ғўза пайкалларида гуллаш бошланганидан 10 кун ичida бажарилиши керак. Акс ҳолда кеч муддатларда солинган азотли ўғитлар ғўза “ғовлаб кетиши”га, ҳосил миқдорининг камайиши ва пишишининг кечикишига сабаб бўлади.

Пахтадан юқори ва сифатли ҳосил етиштиришда фосфорли ўғитларнинг аҳамияти катта. Кўп сонли дала тажрибалари маълумотларининг кўрсатишича, фосфорли ўғитлар ҳисобига бўз тупроқларда 2-3 ц/га, ўтлоқи тупроқларда 3-5 ц/га, айрим аллювиал тупроқларда эса,

6-7 ц/га қўшимча пахта ҳосили олиш мумкин.

Ғўзага фосфорли ўғит йиллик меъёрининг қисми тупроқни асосий ишлаш даврида берилади. Буни қуидагича изоҳлаш мумкин: биринчидан, бўз тупроқларда, ўтлоқи тупроқларда ҳам, ўғит таркибидаги фосфор тезда қийин эрийдиган кальций фосфатларга айланади. Иккинчидан, ниҳоллар униб чиққандан кейин қисқа муддатда (10-12 кун ичидан) ғўзанинг асосий илдизи тупроқнинг 40-50 см чуқурлигига тушиб улгиради. Шунинг учун ҳам кузги шудгор пайтида ерни 30-35 см чуқурлиқда ҳайдаш мақсадга мувофиқ ҳисобланади. Қўлланилаётган фосфорли ўғитларнинг самарадорлиги тупроқдаги ҳаракатчан шаклдаги фосфатлар микдорига бевосита боғлиқ. Ҳаракатчан фосфор микдори бўйича тузилган агрокимёвий хаританомаларнинг маълумотлари асосида фосфорнинг табақалаштирилган меъёрини белгилаш сезиларли иқтисодий самарадорликка эришиш имконини беради. Шунингдек, фосфорли ўғитлар меъёрини белгилашда режалаштирилган пахта ҳосили микдорини ҳисобга олиш муҳим аҳамиятга эга. Бунда бир ц чигитли пахта учун фосфор сарфи 1,5 кг деб қабул қилинади. Тупроқдаги ҳаракатчан фосфор микдори 15 мг/кг дан кам бўлганда, ғўзага белгиланган йиллик фосфор меъёри учта муддатда берилади: шудгор остига, экиш билан ва гуллаш даврида қўшимча озиқлантириш сифатида.

Ҳаракатчан фосфор микдори 16-30 мг/кг атрофида бўлганда фосфорнинг йиллик меъёри икки муддатда; шудгор остига ва экиш билан бирга солиниши мақсадга мувофиқ. Ҳаракатчан фосфор билан ўртача ва ундан юқори даражада таъминланган тупроқларда (бир кг тупроқда 31 мг дан кўп) фосфорнинг йиллик меъёри тўлалигича кузги шудгор остига солинса, яхши иқтисодий самара беради.

Республикамиздаги пахта етишириладиган хўжалик-ларнинг тупроқлари ялпи калий билан азот ва фосфорга нисбатан яхши таъминланган. Лекин пахта ва бошқа қишлоқ хўжалик экинларининг ҳосили билан тупроқдан кўп миқдорда калийнинг олиб чиқиб кетилиши натижасида ўсимликлар томонидан осон ўзлаштириладиган калийнинг миқдори кескин камаяди, қайсики, калийли ўғитларни қўллашни тақозо этади.

Одатда ғўзага калийли ўғитларнинг меъёри тупроқдаги алмашинувчан калий миқдорини билган ҳолда белгиланади. Агар тупроқ мазкур элемент билан ўртача ва юқори даражада таъминланган бўлса, калийнинг йиллик меъёри камайтирилади, жуда юқори даражада таъминланган тупроқларга (300-400 мг/кг) калийли ўғитлар солинмаса ҳам бўлади.

Калийли ўғитларнинг йиллик меъёри кам бўлган ҳолларда, тўлалигича шоналаш ёки гуллаш даврларида қўшимча озиқлантириш сифатида қўлланилади, юқори меъёрда бўлса, ярми кузги шудгор остига, қолган ярми эса шоналаш даврида тупроқка солинади. Ғўза қатор ораларига ишлов бериш вақтида қўшимча озиқа сифатида бериладиган калийни мумкин қадар тупроқнинг чуқурроқ қатламларига тушишига эришиш лозим.

Калийли ўғитларни баҳорда фақатгина қумли ва қумоқ тупроқларга, шунингдек, шўри ювилган тупроқларга қўллаш мумкин.

Ғўзани озиқа моддалари билан таъминлашда маҳаллий ўғитларнинг аҳамияти катта. Маҳаллий ўғитлар ичida гўнг, нажас, компостлар ва тупроқли ўғитлар алоҳида ўрин тутади. Гўнг таркибида азот, фосфор ва калийдан ташқари кўп миқдорда углерод ҳамда камроқ миқдорда микроэлементлар

мавжуд. Тупроқقا солинган гўнг тезда микроорганизмлар таъсирида парчаланади. Унинг таркибидаги углерод оксидланиб, карбонат кислотани ҳосил қиласди, қайсики ўз навбатида тупроқ фосфатларининг эрувчанлигини ошириб, ўсимликларнинг озиқланиши учун лаёқатли шаклга ўтказиб беради. Углероднинг бир қисми яна микроорганизмлар таъсирида тупроқ чириндиси таркибиغا ўтади. Кишлоқ хўжалик экинларига гўнгни чала чириган ёки компост ҳолида қўллаш лозим.

Гўнг билан биринчи навбатда қадимдан деҳқончилик қилинаётган майдонлар ўғитланади. Тупроқقا солинадиган гўнгнинг ўртача йиллик меъёри гектарига 15-20 тонна қилиб белгиланган. У юза кўмилган пайтда таркибидаги углерод ва азотнинг асосий қисми учиб кетади. Гўнгни минерал ўғитлар билан биргаликда қўллаш сезиларли даражада юқори ҳосил олиш имконини беради.



Кузги буғдой ва жавдарни ўғитлаш

Кузги дон экинлар юқори ҳосилдорликка эга бўлиб, ўғитларга ҳам талабчандир. Кузги буғдой жавдарга қараганда мўътадил муҳит ва тупроқ унумдорлигига

бирмунча талабчан. Паст ҳароратга чидамсиз. Тупроқдаги қийин эрийдиган бирикмаларни суст ўзлаштиради. 25 ц дон ва 60 ц сомонни шакллантириш учун кузги буғдой 105 кг азот, 35 кг фосфор ва 70 кг калий сарфлайди. Айни миқдорда ҳосил олиш учун кузги жавдарга 80 кг азот, 35 кг фосфор ва 75 кг калий зарур.

Кузги дон экинлари тупланиш давригача озиқа

моддаларини унча кўп талаб қилмайди, лекин уларнинг, айниқса фосфорнинг, танқислигига ўта сезир. Найчалашдан бошоқ тортишгача ўтадиган даврда ва гуллаш олдидан озиқа моддаларни кўп миқдорда талаб қиласди. Уруғ униб чиққандан токи ниҳоллар қишлоғга киргунча энг масъулиятли давр ҳисобланиб, бу даврда тупроқда етарли миқдорда озиқа моддалар бўлиши тақозо этилади.

Кузги экинлар яхши ўсиб-ривожланиши ва қишлини учун кузда фосфорли-калийли ўғитларни кўпроқ, азотли ўғитларни камроқ қўллаш керак. Айни ҳол ўсимликларнинг яхши тупланишига, бақувват илдиз отишига, танасида кўп миқдорда қанд моддалар тўплашига ва оқибатда совуққа чидамлилиги ошишига ёрдам беради.

Кузги дон экинларни асосий ўғитлаш кўп жиҳатдан ўтмишдош экин турига, ўғит меъёри ва тупроқ унумдорлигига боғлиқ. Бу хил экинлар эрта баҳордан жадал ўса бошлайди. Шу боис уларнинг азотли ўғитларга бўлган талаби бу даврда кучаяди. Маълумки, эрта баҳорда тупроқда азотнинг минерал шаклдаги бирикмалари жуда кам бўлади, чунки кузги-қишки мавсумда тупроқ ҳарорати паст бўлганлиги сабабли аммонификация ва нитрификация жараёнлари суст кетади, мавжуд нитратлар ювилиб ва денитрификацияланиб кетганлиги сабабли ўсимлик илдизлари ўсган қатламда деярли қолмайди. Фосфорли-калийли ўғитлар билан қўшимча озиқлантиришнинг самараси уларни кузги шудгор остига қўллагандагига қараганда анча кам бўлади.

Кузги дон экинларига ўғитлаш меъёрини белгилашда улардан олинадиган ҳосил миқдори, ўтмишдош экин ва тупроқ-иқлим шароитлари ҳисобга олинади. Ўғитларнинг ўзлаштирилишига кучли таъсир кўрсатишни ҳисобга олиб, суғоришга алоҳида эътибор қаратилади.

Яхши маданийлашган, ўтмишдош экин меъёрида ўғитланган ва қўп йиллик ўтлардан бўшаган майдонларда етишириладиган кузги дон экинларига фосфорли-калийли ўғитлар тўлалигича, азотли ўғитларнинг бир қисми кузда солинади. Кузги дон экинларга гўнг ёки компост қўллаш яхши самара беради. Маҳаллий ўғитларнинг самарадорлиги тупроқнинг чиринди билан таъминланиш даражасига боғлиқ; тупроқ чиринди билан қанчалар кам таъминланган бўлса, гўнг таъсирида ҳосилдорлик шунча юқори бўлади. Агар кузги дон экинларни экишдан олдин тупроққа гўнг солинган бўлса, кузда азотли ва калийли ўғитлар қўлланилмаса ҳам бўлади (енгил механикавий таркибли, кам унумли тупроқлар бундан мустасно).

Ўсимликларни ривожланишнинг ilk даврларида озиқа моддалар билан таъминланишини яхшилаш учун оз микдорда азотли-фосфорли мураккаб ўғит қўллаш лозим. Азотли-фосфорли мураккаб ўғитлар айниқса, экишгача ўғитланмаган кузги экинлар учун муҳимdir.

Серкарбонат тупроқларда азотли, фосфорли ва калийли ўғитларни ўртacha меъёрда солиш гектаридан 4-7,0 ц қўшимча ҳосил олишни таъминлайди. Суғориладиган дехқончилик шароитларида кузги экинларга қўлланиладиган ўғитларнинг самарадорлиги янада юқори бўлади. Қўлланиладиган бир кг NPK ҳисобига 7-8 кг дон олинади. Суғориладиган шароитларда донли экинлардан юқори ҳосил олишда биринчи ўринда азот, ундан кейин фосфор туради.

Суғориладиган тупроқларда донли экинларнинг калийга бўлган талаби асосан тупроқдаги калий захираси ҳисобига қондирилади. Лекин бу экинлардан имкон қадар мўл ҳосил етишириш учун азот ва фосфор билан бир қаторда калийли ўғитларни қўллашга ҳам эҳтиёж сезилади.



Баҳорги буғдой, арпа ва сулинини ўғитлаш

Республикамизда баҳорги дон экинлари ичидаги баҳорги буғдой нисбатан кам миқдорда етиштирилади. Буни тупроқ-иклим шароитларининг нобоплиги билан эмас, балки дехқончилик юритиш тизими билан изоҳлаш лозим. Зоро, бу экинни экиш ва парваришилаш бизнинг шароитимизда

бошқа асосий қишлоқ хўжалик экинларини етиштириш агротехникаси билан бир паллага тўғри келиб қолади.

Сули тупроқ унумдорлиги ва муҳитига унча талабчан эмас. Баҳорги буғдой ва арпа нисбатан унумдор, муҳити мўътадил ёки мўътадилга яқин тупроқларда яхши ўсиб-ривожланади. Бу экинларининг ҳосилдорлиги иссиқлик режими унча яхши бўлмаган оғир механикавий таркибли тупроқларда ва шунингдек, енгил механикавий таркибли тупроқларда кескин камаяди. Сулининг илдиз тизими яхши ривожланган бўлиб, баҳорги буғдой ва арпаникига нисбатан тупроқнинг анча чуқур қатламларига тушиб боради. У тупроқдаги қийин эрийдиган бирикмаларни ҳам нисбатан кўпроқ ўзлаштириш қобилиятига эга.

Маълум миқдордаги ҳосил (25 ц/га) ва шунга мос сомон таркибидаги озиқа моддаларининг миқдори жиҳатидан ҳам тавсифланаётган донли экинлар бир-биридан фарқ қиласади.

Баҳорги дон экинлари учун беда, дуккакли-дон экинлари ва ўғитланган кузги донли экинлар яхши ўтмишдош ҳисобланади. Картошка, қандлавлаги, донли экинлар ва

шу каби ҳосили кеч муддатларда йиғиб-териб олинадиган экинлар ўрнида баҳорги дон экинлар етиштирилганда, ўғитларга, айниқса азотли ўғитларга бўлган талаб ҳосили эртароқ йиғиштириб олинадиган ўтмишдош экинлардан кейин экилгандагига нисбатан анча юқори бўлади. Беда ва дуккакли-дон экинларидан кейин баҳорги дон экинларининг азотли ўғитларга бўлган талаби кескин камаяди.

Баҳорги донли экинлар учун биринчи навбатдаги озиқа элементи азот ҳисобланади. Иккинчи ўринда фосфор туради. Енгил механикавий таркибли тупроқларда калийнинг аҳамияти катта.

Баҳорги дон экинларнинг маҳаллий ўғитларга кузги экинлардагичалик бўлмаслиги кузги дон экинларидағидан паст.

Барча тупроқ-икълим минтақаларида баҳорги дон экинларини экиш билан гектарига 10 кг фосфор (P_2O_5)ни суперфосфат ёки аммофос шаклида қўллаш яхши натижа беради. Фосфорли-калийли ўғитларнинг асосий қисми кузда, шудгор остига берилгани маъқул.

Одатда, баҳорги дон экинлар баҳорда азотли ўғитлар билан қўшимча озиқлантирилмайди. Фақат суғориладиган дехқончилик шароитида, нитратларнинг илдизларни тарқалиш зонасидан ювилиб кетиш хавфини ҳисобга олиб, азотнинг бир қисмини (30-40 кг/га) шу мақсадда ажратиш мумкин.

Гектаридан 3,5-4,0 т ҳосил олиш учун бўз тупроқлар минтақасида 100-120 кг азот, 80-90 кг фосфор, 50-60 кг калий қўлланилади. Айрим тадқиқотларнинг натижаларига қараганда, йиллик азот меъёрининг бир қисмини (30-40 кг) мочевина ўғити шаклида барги орқали (илдиздан ташқари озиқлантириш) пуркаш, дон сифатини сезиларли даражада оширади.



Маккажўхорини ўғитлаш

Маккажўхори дон ва кўк поя учун экилади. Унга кузги дон экинлар, дуккакли-дон экинлар ва унинг ўзи яхши ўтмишдош ҳисобланади.

Сув тақчил жойларда беда ва қанд лавлагидан кейин маккажўхори экилганда, ҳосилдорлик камаяди, чунки бу экинлар тупроқдан кўп миқдорда сувни ўзлаштириб, тупроқдаги намликни камайтириб юборади. Суғориладиган майдонларда беда ёки бошқа кўп йиллик ўтлардан кейин экилган маккажўхори юқори ҳосил беради.

Маккажўхори тупроқнинг озиқа режимига ўта талабчан бўлиб, ғовак ва механикавий таркиби оғир бўлмаган тупроқларни хуш кўради. Тупроқ муҳити мўътадил ёки мўътадилга яқин бўлганда, яхши ўсиб-ривожланади. Илдиз тизимининг асосий қисми (тахминан 60% и) тупроқнинг ҳайдалма қатламида тарқалади. Озиқа моддаларни бутун ўсиш даври мобайнида (дони думбул бўлгунча) талаб қиласди. Айниқса, сulton чиқаргандан то гуллашгача бўлган қисқа давр орасида озиқа моддаларни тез ва кўп ўзлаштиради.

Сут пишиш даврига келиб 90% озиқа модда ва 80% қуруқ модда тўплаб улгуради. Озиқа моддаларнинг энг кўп жамғарилиши мум пишиш даврига тўғри келади. Маккажўхори 10 ц дон ва шунга мувофиқ келадиган оралиқ маҳсулотлар билан тупроқдан 34 кг азот, 12 кг фосфор ва 37 кг калийни, 10 ц кўк поя билан эса 25 кг азот, 12 кг фосфор ва 45 кг калийни олиб чиқиб кетади.

Маккажўхори маҳаллий ўғитларга жуда талабчан. Айрим тупроқларда маҳаллий ўғитларсиз маккажўхоридан кўзланган ҳосилни олиб бўлмайди. Шу сабабдан уни ферма олди алмашлаб экиш экинлари қаторига солиш яхши самара беради. Суфориладиган дехқончилик шароитларида намлиқ меъёрида бўлса, азотли ўғитларнинг асосий қисми тупроқларни экишга ҳозирлаш пайтида берилади. Фосфорли ва калийли ўғитлар эса кузги шудгор остига солинади. Тупроқда калий етишмаган ҳолларда маккажўхори ётиб қолади. Маккажўхори озиқа экини сифатида эрта баҳорда экилса, азотли ўғитларнинг аҳамияти янада ошади.

Маккажўхори ниҳоллари тупроқ эритмасининг концентрациясиغا ўта сезгир бўлганлиги сабабли экиш билан гектарига 5-10 кг P_2O_5 уруғдан 3-5 см узоқлик ва 2-3 см пастга солинади. Қаторлаб бериладиган азот миқдори ҳам гектарига 2,5 кг дан оширилмайди.

Намлиги яхши бўлган суфориладиган ерларда маккажўхорини қўшимча озиқлантириш муҳим ўрин тутади. Ўсиш даврида маккажўхори ниҳоллари гектарига 20-30 кг P_2O_5 билан 1-2 марта озиқлантирилади. Ниҳолларга тўла меъёрдаги ўғитларни экин қатор ораларини биринчи бор ишлаш даврида бериш ғоят самарали тадбир ҳисобланади. Озиқлантириш учун азотга бой маҳаллий ўғитлар – гўнг шалтоғи (3-5 т/га) ёки парранда ахлати (3-5 ц/га) дан ҳам фойдаланиш мумкин. Маккажўхори рўвак чиқаришига яқин фосфорли-калийли ўғитлар билан икки марта озиқлантирилади. Ниҳоллар суст ривожланаётган пайкалларга иккинчи озиқлантиришда ўғитлар тўла таркибда (NPK) берилади. Озиқлантиришда ўғитлар тупроқнинг 8-10 см чуқурлиқдаги нам қатламига, юмшатгич-ўғитлагич ёрдамида солинади.

Дуккакли-дон экинларни ўғитлаш

Дуккакли-дон экинлар бошқа гурӯҳ экинлардан фарқ қилиб, атмосфера азотини фиксациялаш ва тупроқдаги қийин ўзлаштириладиган фосфорли бирикмаларни ўзлаштириш қобилиятига эга. Дуккакли-дон экинлар бир метр ва ундан ҳам чуқурроқ кетадиган ўқ илдизга эга. Дуккакли-дон экинларидан нўхат, вика, сўя, мош, ловия, люпин ва бошқалар аҳоли ва чорва моллари учун зарур бўлган оқсил муаммосини ҳал этишда муҳим аҳамиятга эга. Улар дони ва пояси (похоли) таркибида оқсил миқдорининг кўплиги билан бошқа экинлардан фарқ қиласди. Алмашлаб экинда энг яхши ўтмишдош экинлар жумласига киритилади. Ўз навбатида улар учун кузги дон экинлар ва чопиқ талаб экинлар яхши ўтмишдош ҳисобланади. Дуккакли-дон экинлар ҳосили таркибидаги озиқа моддаларнинг миқдори бошқа донли экинларга қараганда сезиларли даражада кўпdir. Мисол учун ўрис нўхат, вика ва люпинни олиб, уларни арпа ва сули билан таққосласак (10 ц донда кг ҳисобида), бунга яққол ишонч ҳосил қиласми.

Ўрис нўхат ва викада азот ва калийнинг энг кўп тўпланиши гуллаш даврининг охирида, фосфор эса пишиш даврида кузатилади. Ўсиш даври узоқ давом этадиган экинларда, масалан, люпинда барча озиқа моддалар бош поядаги дуккаклар пишиб етилган пайтда кузатилади.

Дуккакли-дон экинлар барча ҳаётий шароитлар меъёрида бўлганда, таркибидаги ялпи азотнинг тахминан 2/3 қисмини атмосферадан ва 1/3 қисмини тупроқдан ўзлаштиради.

Дуккакли-дон экинлар маҳаллий ўғитларга (хусусан гўнгга) талабчан, лекин гўнг қўлланилгандан кейинги иккинчи ёки учинчи йилларда кўпроқ ўзлаштирилади.

Дуккакли-дон экинлар атмосфера азотини фиксациялаш қобилиятига эга бўлганлиги сабабли улар кўпроқ фосфорли ва калийли ўғитларга кучли эҳтиёж сезади. Олиб борилган тадқиқотларнинг кўрсатишича, атмосферадан ўзлаштириладиган азотнинг миқдори тупроққа солинадиган азотли ўғитлар миқдорига тескари пропорционал равиша ўзгаради. Шу сабабдан ҳам дуккакли-дон экинларига азотли ўғитларни қўллаш самарасиз, ниҳоллар ўзларини тутиб олишлари учун гектарига 20-30 кг “старт” дозада азот бериш кифоядир деган холосага қатъий амал қилинади.

Лекин тупроқ муҳити, ҳаракатчан фосфор ва калий билан таъминланиш даражаси, намлиги ва ҳарорати, уруғларни инокуляциялаш, микроэлементлар (биринчи навбатда молибден)нинг миқдори тугунак бактериялар фаолиятига кучли таъсир кўрсатади. Мазкур омиллардан айримларини меъёрдан четга чиқиши атмосферадан фиксацияланадиган азот миқдорини камайтириб юборади.

Барча омиллар меъёрида бўлиб, тупроқ унумдорлиги юқори бўлган тупроқлардагина азотли ўғитларни солишга ҳожат қолмайди.

Дуккакли-дон экинлар учун азот миқдорини қўидагича белгилаш мумкин. Масалан, кўк нўхатнинг гектаридан 35 ц ҳосил олиш режалаштирилган бўлсин. Бир тон (похоли билан бирга) 60 кг азотни олиб чиқиб кетиши маълум. У ҳолда режалаштирилган ҳосил билан 210 кг азотчиқиб кетади. Унинг ярмича, яъни 105 кг азот ўсимликларнинг ўсиш органлари таркибида бўлади. Демак, ўсимлик танасида ҳаммаси бўлиб 315 кг азот тўпланади. Юқорида таъкидлаб ўтилганидек, унинг 1/3 қисми (105 кг) тупроқдан ўзлаштирилади. Лекин бу миқдордаги азот барча тупроқ типларида бўлавермайди. Агар 100 г тупроқда 10 мг осон гидролизланадиган азот

мавжуд деб фараз қилсак, фойдаланиш коэффициенти 20% бўлганда, ўсимликлар 60 кг азотни ўзлаштиради. Қолган 45 кг (105 – 60-45) азот минерал ўғитлар ҳисобига тўлдирилади. Ўғит солинган биринчи йилда ўсимликлар ўғит таркибидаги азотнинг 60% ини ўзлаштирилиши ҳисобга олинса, 75 кг га яқин азот қўллаш лозимлиги англашилади. Демак, азот билан ўртача таъминланган тупроқлардан 35 ц ҳосил етиштириш учун бир га майдонга 75 кг азот қўллаш лозим.

Дуккакли-дон экинлар экиладиган пайкалларга одатда гўнг солинмайди, лекин соя ва ловия гўнгланган тупроқларда мўл ҳосил беради. Гўнг солинган ерларда ловиядан олинадиган қўшимча ҳосил гектарига 3 ц ва ундан ҳам кўпроқ, сояники эса, 2-5 ц га ошади. Алмашлаб экинда гўнг солинган кузги ёки чопикталаб экиндан кейин кўк нўхат экилса, яхши самара беради.

Таркибida ўсимликлар томонидан осон ўзлаштириладиган азот кам бўлган майдонларда дуккакли-дон экинларга молибденли микроўғитлар бериш ва уруғларни нитрагин билан инокуляциялаш юқори ҳосил олиш учун заминдир.

Дуккакли-дон экинлар экиладиган пайкалларга кузги шудгор олдидан соф модда ҳисобида 45-60 кг фосфор ва калий қўллаш тавсия этилади.

Экишга қадар озроқ меъёрда (гектарига соф ҳолда 20-30 кг) азотли ўғит қўллаш ўсимликлар ривожланишининг дастлабки даврларида, яъни ҳали илдиизда тугунак бактериялар ҳосил бўлмаган пайтда, азот билан таъминланишини яхшилайди. Азотнинг бир қисми қўшимча озиқлантириш сифатида қўлланилади. Лекин азотли ўғитлар юқори меъёрларда солинганда (ҳосил билан чиқиб кетадиган ялпи азотнинг 1/3 қисмидан кўпроқ), атмосфера

азотининг фиксацияланиши камаяди. Азотли ўғитлар кўп миқдорда ишлатилганда дуккакли-дон экинларининг ўсиш органлари “ғовлаб”, ҳосилнинг пишиб етилиши кечикади.

Уруғларни экиш билан бир вақтда озроқ миқдорда (гектарига 10 кг P_2O_5 ҳисобида) фосфорли ўғит бериш ўсимликларни вегетациянинг дастлабки даврларида фосфор билан таъминлайди.



Шолини ўғитлаш

Кучсиз нордон ва кучсиз ишқорий тупроқларда ҳам шолидан юқори ҳосил етишириш мумкин. Бу экин чириндига бой, гранулометрик таркиби ўрта ва оғир соз ҳамда лойли тупроқларда яхши ривожланади.

Шоли асосан аммиак шаклидаги азот билан озиқланади, чунки нитрат шаклидаги азот чеклар сувга бостирилгандан кейин 5-6 кун ўтгач тупроқдан буткул йўқолади.

Шоли пайкалида ўсадиган кўк-яшил сув ўтлари ўсиш даврида гектарига 20 кг дан 200 кг гача азот ва бир тоннага яқин органик модда тўплайди.

Бир тонна шоли ҳосили билан (шунга мос миқдордаги похол билан) тупроқдан ўртача 22 кг азот, 10 кг фосфор ва 30 кг калий олиб чиқилади.

Шолининг мурғак ниҳоллари тупроқдаги тузлар концентрацияси хлоридли шўрланишда 0,1% дан, сульфатли шўрланишда эса 0,2% дан ошиб кетганда заарланади. Улғайиб қолган ниҳолларга тузлар концентрациясининг 0,7%

га етиши ҳам унчалик таъсир қўрсата олмайди.

Шолининг ҳосили ва гуручнинг сифати навнинг биологик хусусиятлари ва ташқи муҳит шароитларига боғлиқ. Мазкур шароитлар ичида айниқса, минерал озиқлантиришнинг аҳамияти катта.

У азотга жуда талабчан бўлиб, ўсиш даврининг бошидан охиригача ўзлаштиради. Азотнинг ўзлаштирилиш жадаллиги ниҳоллар улғайгани сари (сўнгги барг пайдо бўлгунга қадар) ортиб боради, сўнгра кескин камаяди. Азот танқислиги шароитида ниҳолларнинг ривожланиши секинлашади, барглари сарғая боради, фотосинтез ва шохланиш сустлашади, рўваклар кам донли бўлиб, ҳосилдорлик сезиларли даражада пасаяди. Ўтказилган тадқиқот маълумотларига қараганда, азотли ўғитлар меъёрининг ортиб бориши қонуний равишда шоли ҳосилдорлигини оширади. Гектарига 150-200 кг азот солиш шоли учун энг мақбул миқдор ҳисобланади.

Шолининг калийга бўлган талаби одатда унинг тупроқдаги захираси ҳисобига қондирилади. Калий етишмаган ҳолларда, айниқса ниҳоллар эндиғина униб чиқкан даврда, шолининг барглари жуда секин шаклланади, шохланиши ҳам суст боради. Ҳар 1 га пайкалдан 70-90 ц ҳосил етиштириш учун тупроқقا маълум миқдорда калийли ўғитлар солиниши лозим.

Махаллий ўғитлардан шолига гўнг, компостлар ва кўкат ўғитлар қўлланилади. Гўнг ва компостларни кузда, шудгор остига 20-40 т/га миқдорида ишлатиш ҳосилдорликни гектарига 20-25 ц га оширади.

Азотли ўғитнинг йиллик меъёри бўлиб-бўлиб экиш олдидан ва қўшимча озиқлантиришда берилади. Асосий ўғитлаш аммиак шаклдаги азотнинг нитрификацияланишини

камайтириш мақсадида экиш олдидан ўтказилади. Бунда йиллик азот меъёрининг 1/2 - 2/3 қисми культиватор ёки дискали тирма ёрдамида тупроқнинг 8-10 см чуқурлигига солинади. Оғир гранулометрик таркибли тупроқларда асосий ўғитлашдаги азот миқдори бирмунча оширилиши мумкин. Азотли ўғитнинг қолган қисми 1-3 та қўшимча озиқлантириш йўли билан берилади. Кўп ҳолларда қўшимча озиқлантириш икки муддатда: 2-3 чин барг ва тупланиш даврларида ўтказилади. Қўшимча озиқлантириш олдидан шолипояларга сув кириши тўхтатилади, ўғитлашдан кейин 2-4 кун ўтгач, чеклар яна сув билан бостирилади.

Алмашлаб экиш шароитида фосфорли ўғитлар азотли ўғитлар билан биргаликда қўлланилгандағина яхши самара беради. Шоли учун энг яхши фосфорли ўғит – суперфосфат ҳисобланади. Марказий Осиё шароитида бир га майдонга, тупроқнинг ҳаракатчан фосфор билан таъминланганлигини ҳисобга олган ҳолда, 60-90 кг фосфор (P_2O_5) солиш лозимлиги аниқланган. Лекин уни қўллаш муддатлари ҳақида яқдил фикрга келинмаган.

Фосфорнинг йиллик меъёри кўпинча тўлалигича шудгор остига солинади. Айрим мутахассислар фосфорнинг йиллик меъёрининг 1/2 - 2/3 қисмини шудгор остига, қолган қисмини эса тупланиш даврида қўшимча озиқлантириш сифатида солиш тарафдоридир.

Калийли ўғитларнинг меъёри тупроқнинг алмашинувчан калий билан таъминланганлик даражасига боғлиқ равища белгиланади. Калийли ўғитлар қадимдан ҳайдаланадиган ва қайир тупроқларда яхши самара беради. Калийли ўғитларнинг шоли учун тавсия этиладиган ўртacha меъёри – гектарига 50-100 кг. Белгиланган калийли ўғит миқдори тўлалигича тупроқни асосий ишлаш пайтида солинади.

Баъзи ҳолларда йиллик меъёрнинг 50-70% и экишгача, қолган қисми қўшимча озиқлантириш тарзида тупланиш ёки найчалаш даврида қўлланилади. Шолига ҳар қандай шаклдаги калийли ўғитларни қўллаш мумкин, бу мақсадда кўпроқ калий хлориди ва калий тузи ишлатилади. Ўғитларнинг самарадорлиги шолининг нави билан бевосита боғлиқ. Масалан, тажрибалар асосида УзРос 7/13 нави УзРос 59 навига нисбатан калийли ўғитларга талабчан.

■ | САБЗАВОТ ЭКИНЛАРНИ ЎҒИТЛАШНИНГ ЎЗИГА ХОС ТОМОНЛАРИ

Сабзавот экинлар ва картошка бошқа дала экинларига қараганда тупроқ ҳарорати, намлиги ва озиқа моддалар миқдорига анча талабчан. Айни экинлар илдизи тупроқнинг чукур қатламларига тушиб бормасдан, асосан ҳайдалма қатламида тарқалади. Шунинг учун ҳам бу экинларнинг унумдорлиги юқори, аэрация шароити яхши бўлган тупроқларда етиштириш мақсадга мувофиқдир.

Турли сабзавот экинлар ҳосили тупроқдан ҳар хил миқдордаги озиқа моддаларни олиб чиқиб кетади. Бу хусусият бўйича сабзавот экинларни тўрт гуруҳга бўлиш мумкин: озиқа моддаларни кўп миқдорда олиб чиқиб кетадиган экинлар: карамнинг ўрта ва кечпишар навлари; озиқа моддаларни ўртacha миқдорда олиб чиқиб кетадиган экинлар: помидор, бодринг, пиёз; озиқа моддаларни кам миқдорда олиб чиқиб кетадиган экинлар: қандлавлаги, сабзи; энг кам миқдорда озиқа моддаларни олиб чиқиб кетадиган экинлар: редиска ва бошқалар.

Сабзавотлар томонидан озиқа моддаларни кам ёки кўп миқдорда ўзлаштирилиши ўсиш даврининг давомийлиги,

илдиз тизимининг ривожланиши ва яна бир қатор биологик хусусиятлари билан боғлиқdir. Сабзавотлар тупроқдаги озиқамоддаларнисбатига ҳам ўзигахосмуносабат билдиради. Масалан, карам учун биринчи навбатдаги тансиқ элемент – азот, помидор учун – фосфор, пиёз ва қандлавлаги учун калий ҳисобланади.



Карамни ўғитлаш

Карам – асосий сабзавот экинларидан ҳисобланади. Навига боғлиқ равиша ўсиш даври 60-140 кунни ташкил этади. Карамнинг ўқ илдизи тупроқнинг 50-60 см чуқурлигига тарқалади.

Карам азотли ўғитларга ўта талабчанлиги билан бошқа сабзавот экинларидан ажралиб туради. У азотни то йифим-терим давригача ўзлаштиради. Азот билан юқори даражада таъминланган тупроқларда ҳам азотли ўғитларни қўллаш, карам ҳосилдорлигини оширади. Бир га майдонга ўртача 90-180 кг азот қўллаш тавсия этилади.

Карам тупроқдан фосфорни кам миқдорда олиб чиқиб кетиши сабабли, фосфорли ўғитларга унча талабчан эмас. Ҳақиқатан ҳам, ҳаракатчан фосфор билан юқори даражада таъминланган тупроқларда фосфорли ўғитларнинг самараси яққол кўринмайди. Шунинг учун ҳам карам етиштириладиган пайкалларнинг бир гектарига 30-90 кг фосфор (P_2O_5) тавсия қилинади. Фосфор карам ҳосилдорлигини ошириши ва сифатини яхшилаши билан бирга солинган азот ва бошқа моддаларнинг кўпроқ ўзлаштирилишига ёрдам беради.

Карам тупроқдан фосфорни кам миқдорда олиб чиқиб кетиши сабабли, фосфорли ўғитларга унча талабчан эмас. Ҳақиқатан ҳам, ҳаракатчан фосфор билан юқори даражада таъминланган тупроқларда фосфорли ўғитларнинг самараси яққол кўринмайди. Шунинг учун ҳам карам етиштириладиган пайкалларнинг бир гектарига 30-90 кг фосфор (P_2O_5) тавсия қилинади. Фосфор карам ҳосилдорлигини ошириши ва сифатини яхшилаши билан бирга солинган азот ва бошқа моддаларнинг кўпроқ ўзлаштирилишига ёрдам беради.

Шунингдек, карамга йиллик фосфор меъёрини қўшимча озиқлантириш пайтида қўллаш ҳам юқорида айтилган кўрсаткичларни бирмунча ошишига олиб келади, чунончи, фосфор гектарига 150 кг миқдорда (200 кг азот ва 150 кг калий фонида) берилганда, ҳосилдорлик гектарига 407 ц га етиб, карамбошлардаги қуруқ модда 6,11% ни, қанд модда миқдори эса 4,34% ни ташкил этган. Айни шу фонда фосфор йиллик меъёрининг 20 кг га яқини қўчатларни ўтқазиш пайтида берилганда, ҳосилдорлик гектарига 20 ц га, қуруқ модда миқдори 0,21% га, қанд моддаси эса, 0,34% га кўпайган.

Карамнинг калийли ўғитларга бўлган талабчанилиги тупроқнинг алмашинувчан калий билан таъминланганлилар даражасига боғлиқ. Умуман олганда, гектарига 80-180 кг атрофида калий қўллаб, карамдан мўл ва сифатли ҳосил этишишиш мумкин.

Шудгор остига солинадиган ўғитлардан сабзавот экинлари ривожланишнинг 20-30 кунларидан кейин фойдалана бошлайди, табиийки, ривожланиш даврининг бошланғич даврларида озиқа элементларининг танқислиги яққол сезилади. Бунинг олдини олиш учун уруғларни экиш билан бирга гектарига 10-15 кг фосфор берилади. Қўчатларни ўтқазиш пайтида эртапишар навлар экиладиган пайкалларнинг гектарига 10 кг азот, 20 кг фосфор ва 10 кг калий солинади. Кечпишар навлар экиладиган пайкалларда эса ҳар уч элементдан 15 кг дан қўллаш лозим. Карамни қўшимча озиқлантиришлар сони ва муддатларини белгилаш бевосита асосий ва экиш олдидан амалга ошириладиган озиқлантиришларга боғлиқдир. Карамбош шаклланаётган даврда гектарига 30-40 кг азот берилса, ҳосилдорлик сезиларли даражада ошади.



Бодрингни ўғитлаш

Бу сабзавот экини-ни чириндиға бой, унумдорлиги юқори бўлган тупроқларда маҳаллий ўғитларни қўллаган ҳолда етиштириш маъқул. Бодринг 100 ц ҳосил билан тупроқдан 28 кг азот,

19 кг фосфор ва 44 кг калий чиқиб кетади. Ривожланишнинг дастлабки ўнинчи-ўн бешинчи кунларида азот ва фосфор, ўттиз кун мобайнида калий секин ўзлаштирилади. Озиқа моддаларнинг энг кўп ўзлаштирилиши меванинг шаклланиш даврига тўғри келади.

Бодринг учун гўнг энг муҳим ўғит ҳисобланади. Янги гўнг баҳорда қўлланилганда тупроқнинг иссиқлик режимини яхшилайди, тупроқ унумдорлигини оширади, ниҳолларни кўп миқдорда карбонат ангидрид ва озиқа моддалар билан таъминлайди. Солинадиган маҳаллий ўғитлар миқдорига мос равишда бодринг ҳосили ҳам ошиб боради.

Минерал ўғитлар гектарига 45-60 кг берилса кифоя. Бодринг тупроқ эритмасининг концентрациясига ўта сезгир бўлганлиги сабабли, минерал ўғитларнинг йиллик меъёри бўлиб-бўлиб берилиши керак. Минерал ўғитлар қўшимча озиқлантириш сифатида (гектарига 15 кг азот, 20 кг фосфор ва 20 кг калий) фақатгина мўътадил муҳитли тупроқларга солинади. Биринчи қўшимча озиқлантириш бир-икки чин барг чиқарганда, иккинчиси тугунчалар ҳосил бўлганда ёки биринчи теримдан кейин берилади. Бодринг минерал ўғитларнинг турига ҳам талабчан бўлиб, юқори концентрацияли ўғитларни хуш кўради. Суюқ маҳаллий

үғитлар (гүнг суюқлиги, гүнг шалтоғи)ни құллаш ҳам яхши натижа беради.

Мевалар майда, учлари буралған ҳолда учрай бошласа, бүрли үғитлар илдиздан ташқары озиқлантириш йүли билан (200-250 г бүрни бир га майдонга) берилади. Шунингдек, уруғларни экиш олдиdan 0,1% ли бүр әритмаси билан ишлаш ҳам яхши самара беради.



Бодринг экинида озиқа элементлари
етиши маслигининг белгилари



Помидорни үғитлаш

Помидорнинг вегетация даври 110-120 кун бүлгандырылғанда сабабли одатда күчат қилиб үтқазиш йүли билан етишириледи. Илдиз тизими попук илдиз бўлиб, тупроққа 100-130 см кириб боради.

Озиқа моддаларнинг ўзлаштирилиши бутун ўсиш даврида бир текис бўлмай, асосий қисми мева туғиш даврига тўғри келади.

Ўсиш ва ривожланишнинг дастлабки босқичларида азот меъёрининг ошиб кетиши салбий помидорнинг ўсиш қисмларини тез ривожланишига, ҳосил органларининг эса ривожланишдан орқада қолишига олиб келади. Помидордан ўртача 300 ц/га ҳосил олиш учун 250 кг N, 190 кг P, 100 кг K озиқаси талаб этилади. Азотли ўғитлар меъёрининг ярми кўчатлар ўтқазилаётган пайтда, қолган ярми эса, кўчат ўтқазилгандан кейин бир ой ўтгач берилади. Азотга бой тупроқларга азотли ўғитлар ва гўнг солиш яхши самара бермайди, аксинча, ўсимликларнинг касалликка чидамлилигини сусайтиради, мевалар сифатини пасайтиради.

Помидор ҳосилдорлигини ошириш, мева сифатини яхшилаш ва ҳосилнинг пишишини тезлатишда фосфорли ўғитлар муҳим аҳамиятга эга. Тупроқда калий етишмаса, ассимилятларнинг ҳаракати секинлашади, поя жуда секин ривожланади, баргларнинг чеккалари сарғиш-жигарранг тусга ўтади, буралиб, қуриб қолади.

Республикамиз ҳудудидаги аксарият тупроқлар алмашинувчан калий билан яхши таъминланганлиги сабабли, уларда калийли ўғитларнинг самарадорлиги юқори эмас. Суғориладиган бир кг бўз тупроқ таркибида 160-200 мг алмашинувчан калий бўлганда (кам таъминланган), бир га майдонга қўлланилган 100 кг калий (K_2O) ҳосилдорликни 49 ц/га оширади. Куруқ модда, қанд ва витаминларларнинг миқдори ҳам сезиларли даражада кўпаяди.

Кўчатларни ўтқазиш билан бир вақтда гектарига солинадиган 10 кг азот, 20 кг фосфор ва 10 кг калий

ниҳолларнинг дуркун ривожланишига, илдиздан ташқари пуркаладиган 2,5% ли фосфорли ўғит эритмаси мевани тезроқ пишиб етилишига олиб келади.

Помидорнинг ўсиб-ривожланиши ва ҳосилдорлигига бўр, марганец ва рух каби микроэлементлар ижобий таъсир кўрсатади. Айниқса, бўр мевалардаги қанд моддаси ва С витамин миқдорини оширади. Бўр гектарига 3 кг миқдорда солинади ёки 350 г миқдорида ўсимликларга пуркалади.

Микроэлементларни тўла минерал ўғит (NPK) меъёрлари билан биргалиқда қўллаш помидор ҳосилдорлигини сезиларли даражада оширади.



Пиёзни ўғитлаш

Озиқа моддалар пиёз ривожланишнингда стлабки икки ойида жуда секинлик билан ўзлаштирилади. Энг кўп ўзлаштирилиш пиёзбошлар шаклланётган даврга тўғри келади. Пиёзга бериладиган минерал ўғитларнинг йиллик меъёри режалаштирилган ҳосил

ва тупроқнинг озиқа моддалар билан таъминланганлик даражасини эътиборга олган ҳолда, гектарига 100-150 кг азот, 100-150 кг фосфор, 75-90 кг калий қилиб белгилаш керак. Айни меъёрининг 2/3 қисми шудгор остига ва 1/3 қисми қўшимча озиқлантириш пайтида берилади. Азотнинг миқдори юқорида келтирилгандан ошиб кетса, пиёзнинг ўсиш даври чўзилади, вегетатив массасининг миқдори кўпаяди, пиёзбошлар юмшоқ бўлиб, сақланиш хусусиятлари

ёмонлашади. Бундай салбий ҳоллар айниқса, фақат азот билан бир томонлама озиқлантирилганда рўй беради. Ўғитлар меъёрида қўлланилганда юқорида айтилган қусурлар кескин камаяди.

Фосфорли ўғитлар экиш олдидан гектарига 10-20 кг меъёрида солинади. Вазияттақозо қилган ҳолларда қўшимча озиқлантириш ёзнинг биринчи ярмида амалга оширилади, чунки кечки қўшимча озиқлантиришлар пиёзбошларнинг етилишини секинлаштириб юборади.

Пиёз экиладиган майдонларга чириган ёки чала чириган гўнг солинса ҳосилдорлик сезиларли даражада ортади. Янги гўнг ишлатилганда ҳам ҳосилдорлик ошади, лекин бунда қишига ғамланадиган пиёзбошларнинг сакланиш хусусиятлари ёмонлашади.

Сабзини ўғитлаш



Ўзбекистоннинг суғори-ладиган бўз тупроқли ерларида олиб борилган тажрибаларнинг натижаларига қараганда бир га майдонга 150 кг азот, 100 кг фосфор ва 50 кг калий солинганда, сабзининг Сарик Мирзои 304 нави учийил давомида ўртача 277

ц ҳосил берган. Таркибидаги қуруқ модда 12,5% ни, қанд моддалари 7,4% ни, каротин 7,4% ни ва С витамини 6,4% ни ташкил қилган.

Азот микдорининг янада оширилиши (гектарига 200 кг) маҳсулот сифатига салбий таъсир кўрсатган. Ҳосил олти ой сақлангандан кейин унинг таркибидаги қуруқ модда ва қанд

миқдори мос равишда 0,7 ва 0,4% га камайганлиги, табиий нобудгарчилик 1,5-2,0 марта ошганлиги аниқланган.

Фосфорли ўғитлар сабзи ҳосилининг ўзгаришига унча кучли таъсир кўрсатмайди. Фосфорли ўғитларнинг таъсири кўп жиҳатдан тупроқларнинг ҳаракатчан фосфор билан таъминланганлик даражасига боғлиқ. Меъёрида қўлланилган фосфорли ўғитлар сабзининг илдиз меваси таркибидаги қуруқ модда, қанд, каротин моддалар миқдорини сезиларли даражада оширади.

Сабзи ҳосили сифатининг ошишида калийли ўғитлар ўзига хос аҳамият касб этади. Тупроқда калийнинг танқислиги сезилганда, ўсимликлар танасида углевод алмашинуви бузилади, баргларда кўп миқдорда моносахаридлар тўпланади, реутилизация, фотосинтез жараёнлари ва шунингдек, оддий қанд моддаларининг мураккаб қанд моддаларига айланиши бузилади. Сабзидан юқори ва сифатли ҳосил этиштириш учун ҳар га майдонга 50-75 кг калий (K_2O) қўллаш тавсия этилади.

Қандлавлагини ўғитлаш

Қандлавлаги тупроқдан озиқа моддаларини олиб чиқиб кетиш бўйича дала экинлари ўртасида олдинги ўринлардан бирини эгаллайди. Этиштириладиган 400 ц ҳосил билан тупроқдан 180 кг азот, 55 кг фосфор ва 250 кг калий ўзлаштирилади. Олиб чиқиб кетиладиган озиқа моддаларининг миқдори тупроқ-иклем шароитлари ва ҳосил миқдорига қараб кескин ўзгаради.

Қандлавлаги озиқа моддаларини ўсиш даврининг охиригача, деярли ҳосил йиғиб-териб олингунга қадар талаб қиласди. Ўсиш даврининг бошларида азот, фосфор калий кам ўзлаштирилади. Лекин бу даврда илдиз тизими ҳали

яхши ривожланмаганлиги сабабли осон ўзлаштириладиган фосфорли бирикмаларга ўзида кучли эҳтиёж сезади. Кейинчалик қандлавлагининг озиқа моддаларига бўлган талаби кескин ортади ва июль-август ойларига келиб энг юқори даражага етади. Август ойининг бошларига қадар барча озиқа моддаларининг 70% га яқини, кейинги бир ярим ой давомида эса қолган 30% и ўзлаштирилади. Бу даврга келиб барг қуруқ моддасининг 60% дан қўпроғи ва илдиз қуруқ массасининг қарийб 1/3 қисми шаклланади.

Агрокимёвий тадқиқотларнинг маълумотларига кўра гектарига 120 кг азот, 90-120 кг фосфор ва 90-100 кг калий қўллаб, гектаридан 7-10 т қўшимча қандлавлаги ҳосили олиш мумкин.

Барча тупроқ типларида уруғларни экиш билан бир вақтда гектарига 10-15 кг азот, 15-20 кг фосфор ва 10-15 кг калий солиш яхши самара беради. Ўғитлашнинг бу усули ўсимлик вегетация даврининг бошида озиқлантириш шароитини яхшилаш билан бирга қандлавлаги ҳосилини анча оширади. Таркибида аммоний шаклдаги азот тутадиган ўғитларни қандлавлаги қатор ораларига қўллаш мақсадга мувофиқ эмас, чунки унинг уруғи таркибида углеводлар захираси анча кам бўлганлиги сабабли ўсимталар аммиакдан заҳарланиши мумкин.

Калийли ўғитлар ичida сильвинит маълум устунликка эга. Асосий калийли ўғитларни қандлавлаги учун қимматининг пасайиб бориши тартибида қуйидагича жойлаштириш мумкин:

40% ли калийли туз – каинит ва шёнит – калий хлорид ва калий сульфат.



Картошкани ўғитлаш

Картошкадан юқори ҳосил етиштириш учун тупроқда озиқа моддалар мўл бўлиши шарт, бу бевосита унинг илдиз тизимини кам тарақкий этганлиги билан боғлиқ. Илдизнинг 60% дан кўпроғи

тупроқнинг 0-20 см қатламида, 20-25% и 20-40 см қатламида, 7-10% и 40-60 см қатламида ва атиги 2-3% и чукур қатламларда тарқалган.

Униб чиққандан то шоналашнинг бошланишигача ўрта кечпишар навлар 20-27% озиқа модда тўпласа, шоналашдан гуллашнинг охиригача 40-60 ва гуллашдан кейин 20-33% озиқа модда тўплайди. 10 т картошка туганаклари (шунга мос равишдаги поя ва барглари билан бирга) навларига боғлиқ ҳолда турли тупроқ-иқлим шароитларида тупроқдан 40-70 кг азот, 15-20 кг фосфор ва 60-90 кг калийни олиб чиқиб кетади. Бу албатта, кўп микдорда минерал ўғитларни қўллашни тақозо қиласди. Лекин тупроққа солинадиган ўғит меъёрлари, қўллаш муддатлари ва ўғит таркибидағи асосий озиқа моддалар (NPK) нинг нисбати картошка ҳосилдорлиги ва ҳосил сифатига турлича таъсир кўрсатади.

Картошкани ўғитлаш тизимида азот микдорининг устун бўлиши ферментатив таъсир йўналишини крахмал тўпланишига тескари томонга қараб силжитади. Ялпи ҳосил микдори азот меъёрига боғлиқ равишда ортиб борса-да, ҳосилнинг сифат кўрсаткичлари азот микдори гектарига 200 кг дан ошганда кескин камаяди.

Кузатиш ва тадқиқотлар натижаларининг кўрсатишича, тупроққа азот оширилган меъёрда солинганда, картошка туганаклари йириклашади, лекин улар кўп ҳолларда нуқсонли бўлиб, ичидаги ёриқ ва бўшлиқлар ҳосил бўлади. Вирус касаллигига чалинадиган ўсимликлар сони ортади.

Картошканинг минерал озиқланишида фосфорнинг аҳамияти жуда катта. У азотга тескари ўлароқ, картошка туганаги сифат кўрсаткичларини сезиларли даражада яхшиланишига ёрдам беради. Фосфор меъёри гектарига 50 кг дан 200 кг га оширилганда (150 кг азот ва 60 кг калий фонида) туганаклар таркибидаги крахмал миқдори 13,31% дан 13,86% га етган. Шу билан бир вақтда витаминларнинг миқдори ва маҳсулотнинг сақланиш муддати ҳам ошган. Фосфорли ўғитларнинг самарадорлиги кўп жиҳатдан уларни қўллаш муддатларига ҳам боғлиқлиги аниқланган.

Картошка ҳосилдорлигини ошириш ва туганаклар сифатини яхшилашда калий элементининг роли бекёёсdir.

Калийли ўғитлар таркибидаги хлор ионлари ўсимликларнинг ривожланишига салбий таъсир кўрсатишини ҳисобга олиб, унинг асосий қисми кузда, тупроқни асосий ўғитлаш даврида солинади.

Картошка маҳаллий ўғитларга ўта талабчан экин. Эртаги навлар вегетация даври қисқа бўлганлиги сабабли гўнгдан унумли фойдалана олмайди, кеччишар навларнинг гўнг таркибидаги озиқа элементларидан фойдаланиш коэффициенти бирмунча юқори.

Гўнг айниқса, енгил гранулометрик таркибли, етарли даражада намланадиган тупроқларда яхши самара беради. Кўп сонли тажриба натижаларининг кўрсатишича, турли тупроқ-иклим миintaқаларида бир га майдонга солинадиган 20-40 т гўнг ўртача 2,5-6,0 т кўшимча ҳосил беради.

Маҳаллий ва минерал ўғитларни биргаликда қўллаш ҳосилдорликни янада ошишига хизмат қиласди. Турли тупроқ-иқлим шароитларида ҳар 10 т гўнгга 10-15 кг миқдорида азот қўшиш тавсия этилади.

Тадқиқотлар натижаларининг кўрсатишича, азот, фосфор ва калийнинг ҳар бири гектарига 20-30 кг миқдорда нитрофоска ёки нитроаммофоска шаклида берилса, ниҳоллар баравж ривожланади.

Қўшимча озиқлантиришларнинг энг қулай муддатлари тўлиқ ниҳоллар пайдо бўлиш давридан шоналашгacha бўлган даврdir. Кеч муддатларда амалга оширилган қўшимча озиқлантириш вегетация даврининг чўзилиб кетишига сабаб бўлади. Қўшимча озиқлантиришда тупроққа асосан азотли ўғитлар солинади.

Фосфорли ўғитлар билан ($20 \text{ кг } P_2O_5$) ниҳоллар шоналаш даврида ёки йиғим-теримдан бир ой аввал илдиздан ташқари озиқлантирилса, ҳосилдорлик гектарига 10-15 ц га, туганаклардаги крахмал миқдори эса 1,9-3,1% га кўпаяди.

Умуман олганда, юқори меъёрда солинган азотли ўғитлар туганаклар таркибидаги крахмал миқдорини 0,2-0,7% га камайтиради, фосфорли ўғитлар эса, 1-2% га оширади. Калийли ўғитлар, айниқса таркибида хлор тутган калийли ўғитлар, крахмал миқдорига салбий таъсир кўрсатади. Қўллаш меъёрига боғлиқ равишда гўнг ҳам крахмал миқдорини 0,5-1,0 % га камайтириши мумкин.

Бўз тупроқли худудда эртапишар картошка навлари учун гектарига 120-150 кг азот, 80-100 кг фосфор ва 60 кг калий, кечпишар навлар учун эса 200-250 кг азот, 150-160 кг фосфор ва 100 кг калий қўллашни тавсия қиласдилар. Картошканни такрорий экин сифатида экиш режалаштирилганда, гўнг тўлалигича, фосфорли-калийли ўғитлар йиллик меъёрининг

70-80% и кузги шудгорлашда, қолган қисми эса (29-30% и) ерни экишга тайёрлашда киритилади. Кartoшкага йиллик азот меъерининг 20% и тупроқни экишга тайёрлашда, 30% и биринчи озиқлантиришда (ниҳоллар тұлиқ униб чиққач) ва 50% и ғунчалаш даврида құлланилади.

Гектарига 5 т чириган гүнг ва 100 кг аммиакли селитра туганаклар остига ташлаб экилса, ниҳолларнинг униб чиқиш суръати жадаллашади.

Кartoшка етиштиришда аммоний сульфат, донадор суперфосфат ва калий сульфат тенгги йүқ үғитлардан ҳисобланади.



Бедани үғитлаш

Беда пичани ва уруғининг ҳосилдорлигига минерал үғитлар ўзига хос таъсир күрсатади. Құшимча ҳосилнинг асосий қисми фосфорлы үғитлар ҳисобига, камроғи калийли үғитлар ҳисобига олиниши ҳам тажрибалар асосида исботланган.

Азотли үғитлар беда ҳаётининг биринчи йилида, ҳали туганак бактериялар фаолияти жадаллашмаган пайтда, ижобиي таъсир күрсатади. Иккинчи ва учинчи йилларда бериладиган азот аксинча, беда ҳосилдорлигига салбий таъсир күрсатиши мумкин.

Калийнинг миқдори гектарига 200 кг га еказилганда, умумий илдиз сонининг ортиши йирик илдизлар сонининг күпайиши ҳисобига содир бўлади. Калийли үғитлар беда

пичани таркибидаги хом протеин ва ёғсимон моддалар миқдорини ҳам оширади.

Бедага қўлланиладиган фосфорли ўғитларнинг самарадорлиги биринчи навбатда тупроқ таркибидаги ҳаракатчан фосфорнинг миқдорига боғлиқ. Дала тажри-баларининг натижалари бир кг тупроқдаги ҳаракатчан фосфорнинг миқдори 5-10 мг бўлганда, ҳар бир га майдонга 300 кг, 50-60 мг бўлганда эса 60-120 кг фосфор (P_2O_5) солиб, 500 ц гача беда пичани олиш мумкинлигини кўрсатган.

Беда арпа, сули, маккажўхори билан аралаштириб экилганда, азотнинг йиллик меъёри гектарига 150-200 кг гача етказилиб, унинг 50% и экиш олдидан, қолган қисми маккажўхори поясининг бўйи 1 м га етгунга қадар берилади.

Беда ҳосилини оширишда микроўғитларнинг аҳамияти катта. Ўтлоқи тупроқларга шудгор остига микроэлементлар қўшилган донадор суперфосфат солингандан, беда пичани ҳосилдорлиги 18,4-36,4% га, уруғ ҳосили эса, 31,9-53,2% га ошган.



Тамакини ўғитлаш

Ўзбекистоннинг тупроқ-икълим шароитлари юқори сифатли, хушбўй тамаки етиштириш имконини беради. Самарқанд вилоятининг Ургут тумани тамаки етиштиришга ихтисослашган бўлиб, ҳозирги кунда ҳар

га майдондан 20 ц ва ундан ҳам юқори ҳосил олинмоқда, ҳолбуки бу кўрсаткич асримизнинг 60-йилларида 7-10 ц ни ташкил қиласади.

Ҳосилдорликнинг бу даражада қўтарилиши биринчи навбатда ўғитлардан тўғри ва оқилона фойдаланиш билан боғлиқдир.

Бўз тупроқларда ҳар га майдондан 20 ц тамаки ҳосили олиш учун 90-120 кг азот, 120-150 кг фосфор ва 120-150 кг калий қўллаш тавсия этилади.

Тажриба маълумотларининг кўрсатишича, озиқа элементлари алоҳида-алоҳида вабиргаликда қўлланилганда тамаки баргининг ҳосилдорлиги сезиларли даражада фарқ қиласди.

Тамаки етиштиришда ўғит қўллаш муддатларини тўғри белгилаш жуда муҳим. Тадқиқотларнинг натижалари тамакига азотли ўғитларни фақатгина қўшимча озиқлантириш сифатида қўллаш лозимлигини кўрсатади. Азотли ўғит меъёри қисман ёки тўлалигича экишгача берилса, тамаки баргининг сифат қўрсаткичлари кескин пасаяди.

Тамаки етиштиришда қўшимча озиқлантириш ва суфориш муддатлари бир-бирига мослаштирилади. Биринчи қўшимча озиқлантиришда (экилгандан кейин 8-10 кун ўтгач) йиллик азот меъёрининг 25% и, иккинчи қўшимча озиқлантиришда эса (биринчи қўшимча озиқлантиришдан кейин 15-20 кун ўтгач), 35% и ва учинчи қўшимча озиқлантиришда (иккинчи қўшимча озиқлантиришдан кейин 15-20 кун ўтгач) 40% и берилади.

■ | МЕВАЛИ ДАРАХТЛАР, ТОК ВА ТУТНИ ЎҒИТЛАШ

Ҳаётининг давомийлиги, ер усти ва илдиз тизимининг жадал ривожланиши билан мевали дараҳтлар бошқа қишлоқ хўжалик экинларидан фарқ қиласди. Данагидан ва уруғидан кўпаядиган мевали дараҳтлар илдиз тизимининг ривожланиши бўйича бир-биридан ажралиб туради. Масалан, олча, гилос, олхўри каби данакли мевали дараҳтларнинг илдизи уруғли мевали дараҳтларнига нисбатан кучсиз ривожланади.

Нокнинг илдизи бошқа мевали дараҳтларнинг илдизига нисбатан тупроқнинг чукур қатламларига кириб боради.

Мевали дараҳтларнинг илдиз тизимининг тарқалиш диаметри улар танаси диаметридан 3-4 марта катта. Кўп ҳолларда илдизнинг тарқалиш диаметрини аниқлашда дараҳт ёшини 2 га бўлиш усулидан фойдаланилади. Одатда дараҳтларнинг тик илдизлари тупроқ профили бўйлаб 10 м ва ундан ҳам чукур кетади.

Мевали дараҳтларнинг ривожланишига тупроқдаги осон эрийдиган тузлар, биринчи навбатда Na нинг концентрацияси кучли таъсир кўрсатади. Гилос, олча, шафтоли, ўриқ, олхўри ва бошқалар мўътадил, олма, нок, смородина кабилар кучсиз нордон мухитни талаб қиласа, малина ўртача нордон мухитда ҳам яхши ҳосил беради.

Мевали дараҳтлар ҳаётининг турли даврларида турли миқдорда озиқа моддаларни ўзлаштиради. Янги ҳосилга кирган пайтда дараҳт турига қараб тупроқдан 6-44 кг азот, 2-7 кг фосфор ва 6-35 кг калий ўзлаштирилса, улғайиб боргани сари бу миқдор ортиб боради.

Р.Р. Шредер номидаги Ўзбекистон боғдорчилик,

узумчилик ва виночилик институти маълумоти бўйича олма 120 ц/га ҳосили билан тупроқдан 80-85 кг азот, 25-30 кг фосфор ва 85-90 кг калийни олиб кетади.

Маълумки, мевали дараҳтлар тўла ҳосилга киргунга қадар бир неча босқични босиб ўтади. Ҳар бир босқич учун ўзига хос ўғит меъёрлари белгиланади.

Боғ яратиш дараҳт кўчатларини етиштиришдан бошланади. Кўчат етиштириш эса бир неча (2-3) йил давом этади. Бу даврдаги тадбирлар тизимида тупроқларни маданийлаштиришга алоҳида эътибор берилади. Тупроқ кузда 30-45 см чуқурлиқда ҳайдалади. Шудгор олдидан тупроқ унумдорлигини ҳисобга олган ҳолда гектарига 30-100 т чала чириган гўнг, 60-100 кг фосфор, 70-80 кг калий сочиб чиқилади, сўнгра сидерат сифатида биронта дуккакли-дон экин етиштирилади.

Мевали дараҳт уруғи экиладиган майдонга кузда 20-50 т микдорда чала ёки тўла чириган гўнг, 100-150 кг фосфор ва 60-90 кг калий киритилади. Экиш билан бир пайтда гектарига 20 кг P_2O_5 берилса, уруғлар тез ва қийғос унади. Бу даврда азотли ўғит қўллаш салбий натижа беради.

Ниҳоллар ўзини яхши тутиб олгандан кейин (3-4 чинбарг даври) гектарига 40-50 кг азот киритиб, биринчи қўшимча озиқлантириш, орадан 20-25 кун ўтгач шу меъёрдаги азот билан иккинчи қўшимча озиқлантириш амалга оширилади.

Озиқлантириш учун гўнг шалтоғи ва парранда ахлатидан ҳам фойдаланиш мумкин. Бунда гўнг шалтоғи 5-10 марта суюлтирилади ва гектарига 10-15 т ҳисобида 4-5 см чуқурликка солинади. Парранда ахлати сув билан 1:2 нисбатда аралаштирилади ва бир неча кун қолдирилади. Кейин 8-10 марта суюлтирилиб, гектарига 0,8-1,0 т ҳисобида солинади.

Ўзини тутиб олган ниҳоллар иккинчи йилнинг баҳорида 100-150 кг, июнь ойида 75-100 кг меъёрида азот (N) билан озиқлантирилади. Данакли меваларнинг ниҳоллари учун бу меъёр 1/3 - 1/4 марта камайтирилади.

Мевали дараҳт кўчатларини озиқлантириш. Етилган ниҳолларни кўчат қилиб ўтқазиша кўпроқ хандақ (эни 40-50 м чуқурлиги 50-60 см) усулидан фойдаланилади. Маҳаллий ўғит йиллик меъёрининг ярми хандақ ковлаш учун режалаштирилган чизик бўйлаб ва қолган ярми хандақ остига ташланади. Азотли ўғитлар солинмайди. Фосфор ва калий ҳам хандақ остига ташлангач, кўчатлар ўтқазилади. Ҳар бир кўчат ўрасига 20-30 л сув қуйилади ва кўчат танасининг атрофи торф, компост ёки гўнг билан мульчаланади.

Кўчат учун ковланадиган ўранинг катталиги қуйидагича: олма ва нок учун 100-60-0,5; олча, гилос ва олхўри учун 80-40-0,3; смородина, малина ва бошқа бутасимонлар учун 50-30-0,15. Бу ерда биринчи рақам ўранинг энини (см), иккинчи рақам чуқурлигини (см) ва учинчи рақам ҳажмини (м^3) ифодалайди.

Кўчат ўраларига янги ёки чала чириган гўнг ташлаш мақсадга мувофиқ эмас, чунки уларнинг чиришидан тупроқ қатламларида ҳосил бўладиган чала оксидланган бирикмалар кўчатларни тутиб кетишини қийинлаштиради. Шунингдек, калийли ўғит сифатида калий сульфат топилмаса, калий хлориддан ҳам фойдаланиш мумкин.

Ёш ва ҳосилга кирган мевали дараҳтларни озиқлантириш. Кўчат ўтқазилгандан кейин ёш мевали дараҳтларни озиқлантириш муҳим аҳамиятга эга. Бу даврда дараҳтларнинг жуссаси кичик бўлгани учун қатор ораларида картошка, сабзавот экинлар, хашаки илдизмевалилар ва беда етиштириш мумкин. Лекин мазкур экинларга тупроқ

унумдорлигини янада оширишни таъминлайдиган даражада маҳаллий ва минерал ўғитлар солинади. Енгил механикавий таркибли тупроқларда люпин, хантал ёки вика ва сули аралашмаси кўкат ўғит сифатида етиштирилади.

Битта кўчат ўраси учун белгиланган ўғит меъёри

Ўғит тuri	Уруғли мевалар	Данакли мевалар	Бутасимон Мевалар
Гўнг (тўла чириган) кг	20-30	10-15	8-10
Аммиакли селитра	0,06	0,04	0,02
Калий сульфат	0,15	0,06	0,04
Суперфосфат	1,0	0,4	0,2
Жами: озиқа моддалар (соф модда)	N-20 P-200 K-60	N-14 P-80 K-30	N-7 P-40 K-18

Тупроқ-икклим шароитларини ҳисобга олиб, битта дарахт танаси атрофида 1 кв м юзани ўғитлаш учун 3-4 кг гўнг, 5-10 г азот, 4-10 г фосфор ва 3-5 г калий тавсия этилади. Келтирилган рақамлар гектарига 30-40 т гўнг ва 30-100 кг соф озиқа моддага эквивалентdir.

Мевали дарахтларга бериладиган ўғит меъёри уларнинг ёшига боғлиқ равишда ўзгартириб борилади. Масалан, дарахтнинг ёши 6 га тенг: у ҳолда илдизининг тарқалиш

диаметри 3 м га (6:2), юзаси эса 7 кв м га тенг бўлади. Агар 1 кв м юза учун 4 кг гўнг, 5 г азот, 5 г фосфор ва 5 г калий лозим бўлса, 6 ёшли дараҳт учун бу рақамлар 28 кг гўнг ва 35 кг дан азот, фосфор, калийга тўғри келади. Шу йўл билан турли ёшдаги мевали дараҳтлар учун ўғит меъёрини ҳисоблаш мумкин.

Етук мевали боғларнинг қатор ораларида қўшимча экинлар етиширилмайди, фақат кўкат ўғит сифатида айrim дуккакли-дон экинлари етишириш тавсия этилади. Уларга фосфорли ва калийли ўғитлар ва гўнгнинг 2-4 йиллик захираси бир йўла солинади.

Турли ёшдаги мевали дараҳтлар учун белгиланган ўғит меъёри

Дараҳтнинг ёши	Гўнг, кг	Минерал ўғитлар, г		
		N	P ₂ O ₅	K ₂ O
2	4	5-10	4-10	3-5
4	20	22-45	20-45	15-20
6	30	35-70	30-70	20-30
8	40	50-100	40-100	30-50
10-12	50-55	60-120	50-120	50-60

Токни ўғитлаш. Ток ўзининг серҳосиллиги ва ўғитларга талабчанлиги билан ажралиб туради. Шу боис токзор учун ажратиладиган майдон тупроқлари унумдорлигини ошириш учун ҳайдашдан олдин 50 т гача гўнг, 700-750 кг фосфорли ўғит ва 100-150 кг калийли ўғит солинади. Мумкин қадар таркибида хлорни тутмайдиган калийли ўғитлардан фойдаланиш керак. Кўчатларнинг авжи паст бўлса, май-июнь ойларида 50 кг азот, ва 40-50 кг фосфор билан қўшимча озиқлантирилади.

Ҳосилга кирган токлар ҳар йили гектарига 100 кг азот, 90 кг фосфор ва 30-40 кг калий билан озиқлантириб борилади. Биринчи озиқлантириш май ойида (60 кг азот, 45 кг фосфор, 15 кг калий), иккинчиси эса июнда (40 кг азот, 45 кг фосфор, 15 кг калий) ўтказилади. Ҳар икки йилда бир марта 20-30 т/га миқдорида гўнг солинади. Компостлар қўллаш узум ҳосили ва сифатини оширади.

Тутни ўғитлаш. Тут меваси ҳосилдорлигини ошириш ва барг сифатини яхшилашда минерал ҳамда маҳаллий ўғитларнинг аҳамияти катта.

Тут етиштириш режалаштирилган майдон тупроқлари олдиндан маданийлаштирилади (30-40 т/га гўнг, 60-80 кг фосфор ва 45-50 кг калий билан) ва кўчат етиштирилади. Етилган кўчатлар кўчириб ўтқазишда гектарига 60-180 кг азот ва 30-100 кг фосфор билан озиқлантирилади.

Минерал ўғитлар икки муддатда: кўчатлар экиб бўлингач азот йиллик меъёрининг 50% и, орадан бир ой ўтгач азотнинг қолган қисми ва фосфорнинг йиллик меъёри тўлалигича солинади, изидан сугорилади.

Ҳаётининг иккинчи йилидан бошлаб гектарига 100-250 кг азот, 50-100 кг фосфор ва 30-50 кг калий тавсия этилади ва ўғитларнинг йиллик меъёри тўлалигича эрта баҳорда сугориш олдидан тупроқقا солинади. Тутга ўғит меъёрларини белгилашда майдон тупроқларининг агрокимёвий хаританомаси маълумотларидан унумли фойдаланиш ва режалаштирилган ҳосилни ҳам ҳисобга олиш мақсадга мувофиқdir.

Үсиш фазалари



**Ұсимликтің ұмма үсиш фазаларыда
микроэлементтарға бўлган талаби**

 | **ФОЙДАЛАНИЛГАН АДАБИЁТЛАР РЎЙХАТИ**

1. Мусаев Б.С. Агрокимё / Дарслик / Тошкент 2001.
2. Каримов М.У. Ўғит қўллаш тизими / Дарслик / Тошкент 2017.
3. Туркия Республикаси Озиқ-овқат қишлоқ хўжалиги вазирлиги ҳамда “Денизбанк” ҳамкорлигига тайёрланган “100 та китоб”дан иборат тўплам.

Интернет сайтлари

1. <https://telegra.ph/Problemy-rastenij-10-11>
2. <https://www.ogorod.ru/ru/now/fertilizers/9523/3-osnovnyh-elementa-pitanija-rastenij.htm>

91-китоб

Қишлоқ хұжалигыда ишлатылған үғитлар ва уларни құллаша

AGROBANK

100 китоб түплами

91-китоб

Қишлоқ хұжалигыда ишлатылған үғитлар ва уларни құллаша

AGROBANK

100 китоб түплами

91-китоб

Қишлоқ хұжалигыда ишлатылған үғитлар ва уларни құллаша

40.40 Қишлоқ хұжалигіда ишлатиладиган үғитлар ва уларни
Ү 99 құллаш [Матн] : илмий нашр / «Агробанк» АТБ.-Тошкент:
"ТАСВИР" нашриёт уйи, 2021. - 142 6.

ISBN 978-9943-7174-7-3

УҮК 631.8

КБК 40.40

Лойиха ғояси мұаллифи ва ташкилотчысы
“Агробанк” АТБ

100 китоб түплами

**ҚИШЛОҚ ХҰЖАЛИГІДА ИШЛАТИЛАДИГАН
ҮҒИТЛАР ВА УЛАРНИ ҚҰЛЛАШ**

91-китоб

Нашриёт уйи “Тасвир”
Тошкент – 2021

Таржимонлар:

Тошкент давлат шарқшунослық университеті
“Таржима ва тил марказы” таржимонлар гурухы

Мұхаррир-мусақхұх:
Г. Чоршанбиева

Компьютерда тайёрловчилар:
З.Б. Хошимов, Н.С. Сайидахмадов

Дизайнер:
А.Х. Комилов

Нашриёт тасдиқномаси: № 7404, 02.02.2021
Босишига 16.04.2021 да рухсат этилди. Бичими 60x84 ^{1/16},
Fira Sans гарнитураси. Офсет босма усулида чоп этилди.
Адади 830 нұсха. Буюртма рақами: 1112

“Colorpack” МЧЖ босмахонасида чоп этилди.
Тошкент шаҳар, Янги шаҳар күчаси, 1А.